




204

Coll.



204

P O E S I E
PIEMONTESI
DEL P.^E IGNAZIO ISLER

GIA' MINISTRO PROVINCIALE
DE' CANONICI REGOLARI D' ITALIA
E CELEBRE POETA NEL DIALETTO
PIEMONTESE.



*Prima Edizione compita secondo l' originale
dell' Autore*



TORINO 1799.


PRESSO LO STAMPATORE DENASIO

Nell' isola di san Filippo.

THE HISTORY OF

THE CITY OF

NEW-YORK

FROM THE FIRST SETTLEMENT

TO THE PRESENT TIME

BY JACOB LEVINSKY

OF THE CITY OF NEW-YORK

AND OF THE STATE OF NEW-YORK

IN TWO VOLUMES

VOLUME THE FIRST

NEW-YORK

PRINTED BY J. LEVINSKY

AT THE NEW-YORK PRESS

NO. 10 NASSAU ST.

1847

NEW-YORK

PRINTED BY J. LEVINSKY

AT THE NEW-YORK PRESS

NO. 10 NASSAU ST.

1847

NEW-YORK

A L

LEGGITOR PIEMONTESE

Tutti i Popoli dell' Universo si recano a pregio di leggere, e scrivere la propria Lingua. Se nel Piemonte esista pure questa inclinazione di scrivere, e leggere nel proprio linguaggio, si è più volte provato e col rapido smercio della Grammatica del Pipino, e colla grata accoglienza che si fece in addietro a queste stesse poesie, vivente ancor l'Autore già in parte stampate, e coll' applicazione, con cui si accinsero parecchi dotti Personaggi a coltivare il nostro Piemontese idioma, tra cui meritano singolar menzione il Dottor Fisico BROVARDI, e l'Abate Silvio BALBIS.

Che il Piemontese dialetto sia infatti ameno quando è scritto nella sua semplicità, ed abbia almeno come gli altri idiomi le sue bellezze native, non v'ha chi 'l contenda, fuorchè quelle persone nauseate, cui altro non sa piacere, eccetto ciò che vien d'oltremonte. Il Piemontese ha una precisione particolare nello esprimersi, una vivacità semplice, una costruzion facile, e sa esser grave, e faceto quando abbisogna.

Ben sarebbe un vantaggio desiderabile, particolarmente per le persone rurali, che avessero elleno un qualche libro scritto nel linguaggio natío, onde apprender potessero i loro principali doveri, in vece che son costretti a leggere una lingua straniera, la quale, col pochissimo studio che hanno, appena possono intendere. E sarebbe poi, come da taluni si esagera, così difficile impresa la lettura di questo idioma, massime quando venisse adottato un metodo piano e comune di ortografia?

Comunque siasi, convinto io dalla speranza, che il nostro Piemontese dialetto ha una multiplice folla di cultori, e di amici, tanto più quando si fa sentire accompagnato dal suon della rima, presento al Pubblico queste Canzoni, che son parto del celebre P. ISLER Trinitario calzato, il quale per antonomasia era detto l'*Orazio Piemontese*. Evvi quì l'intiero suo Canzoniere fedelmente desunto dallo stesso manoscritto originale del Poeta. Evvi quì l'utile misto col dolce. Evvi un libretto dilettevole, ed istruttivo in linguaggio patrio. Se non evvi tutta quella ortografia che da taluno si pretenderebbe, io dirò, che gli stabilimenti di essa sono ancor troppo arbitrarj, e che io presento quì un Canzoniere, non una Grammatica. Vivi felice.

Lo Stampatore DENASIO

I N D I C E

U na Figlia d' un Giardiniere bionda come una zingara, innamorata d' un Barcaruolo pag.	3
Le deformità d' una Figlia, che stimandosi bella, vuol maritarsi	5
Una Donna malcontenta del suo marito	9
Il Morito si-lagna della Moglie	15
Il paese della Cocagna	21
Il matrimonio della Figlia di Martino Potagi con Gio. Pietro Bragari	24
Delle signorè Magne	26
Espressioni amorose di Bartolommeo verso Catarina	29
Risposta di Catarina a Bartolommeo	32
Dialogo sopra il contrasto di due Figlie che hanno un solo amante tra tutte due	35
Versi da cantarsi a tavola per bere	40
Dialogo tra un Marito stitico, e sua Moglie lubrica di corpo	41
Contrasto di uno, che, stimolato da un altro a levarsi di letto, non vuol levarsi	45
Testamento di Lucrezia Gelofrada	48
Barba Gironi, e Slanfrinaja sua moglie, che dopo 30 anni di matrimonio hanno avuto un figlio maschio	53
Matrimonio delle Figlie di Lucrezia Gelofrada	57
Due Vecchi-innamorati d' una figlia	63
Delle qualità delle Donne	68
Sopra le Nuore, e le Madonne	72
Sopra il Giuoco del Seminario	79
Le astuzie degli Scuolari	83
Un Giovine pentito d' avere sposato una Vecchia per interesse	86
Il Ruotatore	91

<i>Il Testamento di Giacomo Trös</i>	93
<i>Lamenti di due Serve contro le loro Padrone</i>	98
<i>Sfogo lamentevole di Gervasio abbandonato dalla sua Biasina</i>	107
<i>Dialogo tra due Fratelli, uno de' quali non vuol travagliare</i>	110
<i>Giorgio a Catarina</i>	112
<i>Un Padre imbrogliato, che non sa a chi debba dare la sua Figlia</i>	116
<i>Del Ferravecchio</i>	123
<i>Le Serve de' Preti secolari</i>	127
<i>Regole, e Costituzioni lasciate dal Successore di Giacomo Trös</i>	132
<i>Le Donne che vogliono il comando di casa</i>	137
<i>Antonio Pianca che vuol sposare ec.</i>	143
<i>Li Cronichismi</i>	146
<i>Il Libertinaggio di questi tempi</i>	151
<i>Le Vedove</i>	155
<i>I Vedovi vecchi innamorati</i>	158
<i>Sebastiano Bodino</i>	161
<i>Dialogo d' un Medico, e Marion</i>	163
<i>Il Ceco mendicante</i>	166
<i>Una Monaca mal contenta</i>	170
<i>Del Magnino alla moda</i>	172
<i>Pentimento Fratesco</i>	178
<i>Le Bizzocche</i>	181
<i>Le Madregne</i>	187
<i>Le Figlie di Stefano Brombo</i>	191
<i>Dialogo tra Madre, e Figlia che vuol marit.</i>	193
<i>Uno che si vorrebbe maritare, ma non sa a qual Donna appigliarsi</i>	197
<i>Le Figlie da maritare</i>	201
<i>Le Mode</i>	203
<i>I Giovani innamorati</i>	209
<i>Le Donne sgraziate per i cattivi Mariti</i>	211




*Una Figlia d' un Giardiniere bionda come una
zingara innamorata d' un Barcaruolo.*

CANZONE I.

La Biondinna del Giardinè
L'è annamorà d' un galinè,
Ch'a veul fè 'l pofarbaco e 'l gròs
Subit ch'a l' hà sinch sòld addòs.
A l' hà 'l capèl bordà d' argènt
Portand da là so ciò rusnènt
Pavaire manch longh d' un trabuch
Fasand 'l fièr coul mamaluch.
Oh! s' i vedèise a fe l' amor
Coul fant da piche, e dama d' fior,
A l' è un piasì, con che affèssion
As dan d' j bodro, e d' j pession.
As veulo peui una gran bin,
Tut 'l dì stan ant 'l giardin
Al gròs calor a comèdiè
Piandse pòch sust pr travajè.
Vènta peui dì, ch' à l' è un faseul,
Veul fè 'l grassios un barcareul,
Ch' a l' hà d' manèrè, e tut 'l deuit
Ch' a l' hà un borico a plèi bescheuit.
S' una sol sèira, o una matin
Chial peul nèn fè sò san tròtin,
Vènta senti, con che dòlor
Fan d' j sospir pr sout, e dsor,

4
Chila dlong maa da a l' andoman
Quaich un a vedlo pr sotman
S' mai d' vote pr desgrazia aj fus
Tacà la frèv, o sautà 'l flus.
Ma quand a torna, òh che gran gòi!
Tutti doi smio squasi fòi,
Anlora as fan d' ij compimènt,
Ch' a l' è un piasì tnie da mènt,
As fico d' vòte ant un canton,
E s' van contand mile rason,
E j seu torment da soi a soi,
Ch' ai crepa 'l cœur a tutti doi.
La mare peui ch' hà d' cognission,
Ai veul pa dèie d' suggestion,
Pr costa gran rason, ch' a dis,
Ch' a vènta nèn sgustè j' amis.
A son comprasse un bèl tabas
Pr fè d' armor, e gran fracas,
E ciaudronè tutta la neuit,
Guardè che landa, e che bèl deuit!
Vnomo un pò alla concluson:
A l' han da bsògn d' euli d' rolon,
Loli veul di d' un bon toiror
La mare, e fia, e col sfojor.



*L: deformità d'una Figlia, che stimandosi bella,
vuol maritarsi.*

CANZONE II.

A j'è un parti ch'è bèl
E bon d'una matòta
Ma l'è sènsa fardèl,
E sènsa dòta,
A l'è mach auta un fus,
Tuta goblua, e stòrta,
Con coul mostas, cb' aj lus
Tra giauna, e smòrta.
L' hà pro doi gran òjas,
Ma l' un, e l' autr ai cola
E tutt 'l dì 'l morflas,
Ch' ai va ant la gola,
L' è pitocà da bon
Da quantità d' vairòle,
E sout a coul manton
Carià d' scròle.
Pièn d' rasca l' hà 'l testas,
L' è tuta una marsògna
Con un sèrt òdoras
Giust da carògna;
Na lupia ant 'l cupis,
Cha par una borèla,
Pi còtia, ch' un atis,
S' un va a tochèla,

Sul nas a l' hà un boton,
 Ch' è gròss com' una bòcia,
 La plofra del manton,
 Ch' ai fa sacòcia,
 A l' ha un pi bèl bochin
 Pi largh ch' una savata,
 E con un mostassin
 Fait a pignata.

L' hà quatr dènt rancian,
 Cha tardo pa a tombèje,
 Cha buto scœur ai can
 Mach a buchèjè;
 A l' hà un armada d' poj,
 L' è tuta mal uguala
 D' un bras, e d' un genoi,
 E d' una spala.

A mangia com' un crin,
 E bèiv com' una vaca,
 A l' è sèira, e matin
 Sèmpre ambriaca,
 E s' a veul di quaich mot,
 Oh che bruta grimassa,
 Con col sò laver d' sout,
 Ch' 'l dsor ai passa.

A va tuça a sautat,
 E fa piasì guardèla
 Con col sò bastonat
 Andè d garèla,
 A tèn sèmpre tranfià,
 E minca pòch a baja,
 A l' è mèsa scortià
 D' un' angonaja.

L' è sèmpre anspirità
 Pr ritènsion d' urinna,
 E croëte an quantità

Tut giù dla schinna:
 A l' hà un gavas, ch' fa por
 Pòtèr de diri baco,
 E le ganasse or or
 A s' ji destaco.

Ma l' è pa ancor 'l tut,
 Ansèm a la cancrenna
 L'è un pès ch' a l' hà 'l scorbut,
 Ch' ai da gran pènna,
 A l' è un umor da mul,
 E ansèm a la dernèra
 A l' hà un ciavèl sul cul,
 E doi sla cèra.

Le gambe crepassà,
 Ch' ai van coland tavòta,
 Ai tèn sèmpre fassà
 Con pèl d' marmòta,
 Son faite a turnicat,
 E squasi a sivignòla
 Pi piènne d' pertusat,
 Ch' una pongòla.

L' è lèsta com un ciuch,
 Patiss la caussinera,
 A tomb del mal massuch
 Ma d che manèra;
 Pi grassa d' un toiror,
 Ma l' è d' un gran bèl plagi,
 L' è giusta del color,
 Ch' a l' è 'l bernagi.

Ma lo ch' è pi fatal,
 Le sfite a la dèsoło,
 E 'l bagagias ch' è un mal
 Ancor pi dròlo;
 A l' è faite al faussat,
 Tuta bsincà, e stransia,

Miraco se 'l Folat

A la pijria.

A scracia ch' a fa por,
L' hà dodès fontanèle,
Stè a vede, ch' ai va ancor
Surtì le buèle;
A l' hà l' odor d' punas,
E vènta sèmpre stèje.
Lontan sinch, ò sès ras,
S' un veul parlèje.

A l' hà un ditèt maunat,
Ch' a l' è sigur ch' aneuja,
A tira d' rut, e d' pat
Com una treuja;
E peui pr compimènt
Vènta sovèns netièla,
Ch' a l' hà continuamènt
La cagarèla.

L' hà tut 'l stomi scheuit,
E pur sta tartavèla
As crad d' avèje doeuit,
E d' èsse bèla,
A l' è mèsa scarnà,
Tuta caria d' poterle,
Con sinch onge ancarnà,
E sènt caterle.

A cost partì famos
Sa sa chi veul attende
Pr fèsse dunna spos,
Ch' as fassa antèndè,
Fè nèn j tamnandan,
Se pur n' avì l' anvía,
Na treuve pà doman
N' altra paria.

Una Donna malcontenta del suo Marito.

CANZONE III.

Mi pòvrinna ch'i son desgrassià,
 Marcè fie tute,
 Venime a scotè
 E bèle e brute
 Già da maridè:
 Abie giudissi,
 Giughè nèn d' caprissi
 D' fè le corive
 Pr nèn peui pèntive
 Com l'è arivà
 A mi: ij heu la sfortunna
 D' un omo' gelos
 Cha bat la lunna
 Brut, vèj, e bavos;
 E pr spièghève le soe qualità,
 L'è un gonzo, l'è un habi
 L'è un trubi, l'è un coco
 L'è un gnèro,
 Si ch' i l'heu fatta la folairà.
 Mi podia pa pi sòportè
 D' andème tavòta
 Cogè da sprmì:
 Costa marmòta
 M'hà comènsà di:
 Bon di Margrita,
 Mia giòja, mia vita,

Voi an sostansa
 Sè mia spèransa,
 E me bèl còrin:
 Mi, malanagi!
 Da coi bombonat
 Son pòch al viagi
 Tombà al trabiciat,
 Tra tant adèss j son bèla e dispèrà.
 L'è un gonzo &c.

O che dròlo d'sèrvèl fait a cròch,
 Mi crad, ch' ai na sia
 Pa gnun d' coula sòrt
 Con fantasía,
 E un umor così stòrt:
 Che bon pro fassa
 Da coula ganassa!
 Semper armogna
 Grassios com la rognà,
 Nojos com la pèst;
 Da tutte bande
 A m' vèn tètassion
 Pr tante lande
 Gabèle, e quèstion
 D'andè a butèlo pr drugia ant un prà.
 L'è un gonzo &c.

Quand a m' vad con quaichun a parlè
 Oh! che bruta cèra,
 Che òjass s buta tè,
 O! che galèra,
 Ch' a m' fa sopportè;
 E lolì dura
 Dij dì con dle smanne,
 Ch' a l' è sigura,
 Ch' a m' fa vni le canne
 Con tuta rason,

S' i m' veui scusème
 Con coul martinass,
 L' è meud pr fème
 Fracassè 'l mostass,
 Vènta ch' j tènnà la lènga sarà,
 L' è un gonzo &c.

Mi seu pa com i l' abia da piè,
 Pr fè, ch' un ij fassa
 J' è mai nèn d' bin fait,
 Con che bilassa
 Ch' a m' fa sauté 'l lait,
 Mi rèsto fola
 Su mia paròla,
 D' vòte i m' daría
 Pr gran bisaria
 Dla tèsta ant ij ciò:
 Quand pi i m' studio
 Pr dèje ant l' umor,
 Tant pi coul flubio
 M' arbùta, ch' fa por,
 Considèrève che vita aurrabià.
 L' è un gonzo &c.

Mi son stofia d' parièje 'l mangè;
 Cha vada an galèra
 Tavòta ch' a veul,
 J' è pa manèra
 D' servì coul faseul,
 Bin ch' i podèissa
 Fè tant, ch' i mantnèissa
 Una cusinna
 Dla ròba pi finna,
 Ch' as peussa trovè,
 Tutun saría,
 Prechè coul trombon
 Tant a trovria

Mai nèn, ch'a fuss bon,
 Fòra arfilèje sinquantà barà.
 L'è un gonzo &c.

Neuit e di tèn parlà dasprchial,
 Ch' a smia, ch' a l' abia
 Le asiènde d' un stat,
 E sauta an rabia
 Pistand com' un mat;
 Sèmper a vira
 Com' un, ch' a dèlira,
 Mai a s' arèsta
 Dle man, ò dla tèsta
 Da fè mile gèst:
 Quanti ant le fèrie
 Ficà ant l' ospidal
 Fan pà d' matèrie,
 Com coust animal
 Così lunatich, così stravirà.
 L'è un gonzo &c.

A son còse da fè slambanè
 Sènti coul brdòvia
 An convèrsassion
 Mnè la gasòvia
 Fasand 'l gascon:
 Che d' rasonasse
 Che d' pataflanasse,
 Ch' a l' han nè tira,
 Nè grassia, nè mira,
 Ch' a va mai spuand!
 E gara avèje
 Tant cœur, e tant front,
 Ch' un volèis fèje
 Quaich peit comtrapunt
 Sarà d' fèsse ranchè la corà.
 L'è un gonzo &c.

J'è quaich vòta, ch'aj sauta col rat
 Ch'am ciama, ch'i fassa
 Quaich gnògna coul fòl,
 E ch'i l'ambrassa
 Bin strèit ant'l còl,
 Oh! sì ch'anlora
 Mi seu nèn, s'i piora,
 O s'i sgrignassa
 A piènna ganassa
 Bucand coul mostass,
 L'hà ji heui ch'ai pioro,
 L'è nacc, e baleus,
 D'rupie su'l moro,
 Ch'a smio dle preus,
 La bouca storta, e la pèl giamolà.
 L'è un gonzo &c.
 A peul gnanca sciairème mangè,
 E quand a m'agrada
 Piè un pòch un bocon,
 Vènta ch'i vada
 Sgrufiè da scondon,
 E antorn dla sia,
 Quand j'heu la pvia;
 E li ch'i pènsa
 D'avèje passiènsa
 E gnanca parlè,
 S'nò noi i foma
 Dj sèrt rabadan
 Tant ch'is tiromo
 Dj dènt, com doi can,
 Ch'i fomo coure tut l'vsinè.
 L'è un gonzo &c.
 Basta di, che pi d'doui, o tre
 J'è gnunne servènte
 Ch'a peusso règnè

Pr gran lamènte
 Ch' ai fa tròp giunè;
 Tra tant a vènta
 Fè mi la servènta,
 Ch' mi m' strapassa,
 Fè mi la ramassa,
 E stringa dla pèl;
 Almanch avèislo
 Pa tanti difèt,
 Almanch mandèislo
 Al hòja j sospèt
 Pr nèn sèntimé fè tante arvirà.
 L'è un gonzo, &c.
 Piè un pò tute l' èsèmpi da mi,
 Voi aitrè matòte,
 Ch' i sé carpiònà;
 Piè guarda d' vòte
 Ch' i restèisse anganà,
 Essè pa fòle
 Tacandve a d' paròle,
 Quante caresse
 Ch' av fan con d' promesse
 Sti vèi desdèntà,
 E peui av tènno
 Sogète com d' can,
 E 'l pès, ch' av mènno
 Peu ancora le man,
 Basta ch' i fasse quaich pcita sgarà.
 Son d' gonso, son d' babi,
 Son d' trubi, son d' coco,
 Son d' gnèro;
 Gara, s' i fè cousta folairà.



*Il Marito si lagna della Moglie.
Risposta all' antecedente sull' aria stessa.*



CANZONE IV.

Che cagninna, che dispèrassion!
 Sì sì dime pure,
 Ch' i son un tavan,
 Sènsa ch' i giure
 Le gènt a credran:
 Oh che folia!
 Chi sà s' i durmìa,
 O s' i revava,
 O còsa i m' toirava
 Disènd coul gran sì:
 J' heu pr desgrassia
 Pià un fidècomiss,
 Ch' a l' ha nè grassia,
 Nè deuit, nè d' ardriss,
 Ma le manèrè d' un cabassinàs.
 L' è scrosa, bavosa, nojosa,
 Svergnosa, una tiòrba.
 Si ch' i l' heu pialo' l bèl bagagiass.
 M' era vis ch' 'l formag piasèntin
 A m' era tombame
 Giust sui macaron;
 Ma i son trovame
 Gabà pr da bon:
 Peussa tachèje
 La bsèst e rablèje

Coula canaja
 Ch'am dèro la baja
 Fasandme j conchè;
 Con rusa dròla
 M'an mname là d'neuit,
 E mi badòla
 Son d'longh restà cheuit
 Quand im butèr a squadrè coul sumias,
 L'è scrosa &c.

Am piasir coul bèl stomi arlevà,
 E pur s'è mai dassè
 Pi furb nissun cioch,
 S'èrla pà fasse
 Le puppe con d'bioch,
 Ma despojandse,
 Ma peui a cogiandse
 Li ch' i buchère,
 Li sì ch' i restère
 Tut maravios;
 Peui s'è gavassee
 J'dent tuit pòstis
 Dalle ganasse,
 E i brin dal cupis;
 Sì ch' im trovèr ant un bel ambaras.
 L'è scrosa &c,

Fur dcò coula dòta, e fardèl
 Ch'am dèro ad intende,
 Fasandme un éclat,
 Ch'am fèr arènde
 Pr fè coust contrat:
 Pr mi credia
 Sècond ch'as disia
 Pr ròba vèra
 Ch'a fus reditèra
 D'un bon bocon gras;

Dòp 'l marìngi,
 Chi avría credù,
 Che coust potagi
 Aveiss gnanca avù
 Lò ch'a podria valeje un spuas.
 L'è scrosa &c.

Ma da già ch' a lè povra com Giob,
 Almanch a patieissa
 Nèn tant 'l fumat,
 E ch' a l' aussèissa
 Nèn tant 'l cacat:
 Ela pa dròla,
 Gnanch' mèsa paròla
 Mi peus nèn dila
 Ch' a veul nèn sufrila,
 S' ij treuvo da di?
 A veul, ch' i passa
 Lì pr' l' pertus,
 E ch' i la lassa
 Fè tut all' arbus,
 Mi la faria mangè dai cròvass.
 L'è scrosa &c.

Pur manch mal s' a l' avèjssa del deuit
 Sta bruta catorba
 Con coul mostass piat,
 Ma l' è una sòrba
 An tutti j seu trat,
 Mach a buchèla
 Son cose d' campèla
 Giù dla bialèra,
 O con na sivera
 Sù quaich liamè,
 A l' hà una tèsta
 Da piantè d' passon,
 L'è pronta, e lèsta

Al par d' un canon:
 Vahi mi che rabie con coul buata
 L' è scrosa &c.

A fa rie sentila a cantè
 Con coula bocheta
 Da fene un bornèl,
 E la voseta
 Da spaciafornèl,
 Quante grimasse
 Ch' a fa con d' smorfiasse
 Con coul brut muso
 Tavòta pien d' ruso,
 E tant mal forgià,
 Pure sta plandra
 S' figura d' cantè
 Com na calandra
 Fasandse sauté
 Coul mantonat fait a ghisa d' cajnass.
 L' è scrosa &c.

Minca pòch vè ciamandme dij dnè
 O pr d' ampodrura,
 D' esensa, e d' rossat
 Pr fè figura
 Con dèsse sò blat;
 Ela curiosa,
 Che cousta morfiosa
 Veuja tiffèsse,
 E veuja butèsse
 Peu ancora su' l fus?
 I son pr fèje
 Portè d' sira d' gran
 Pr amberlifèje
 Coul moro da can;
 Chi m' hà mai vist un pi bèl umorass?
 L' è scrosa &c.

S' i savèisse, ch' an tuti j' afe

Sta bruta borica

Sa nèn dèsse pas

Salvand ch' a fica

Pr tut 'l sò nas,

Che conterloira,

Che brava dòtoira,

Fè la prudenta,

La dòta, e sapienta

Sta tèsta d' oulouch,

Chila credèndse

Parlè d' avocat

Spua d' sèntèse,

D' rason da savat,

Ch' a mèritria fiachèje 'l mostass.

L' è scrosa &c.

Lò ch' a l' è ch' a la guasta d' autut,

L' è coula servlassa

Così sgangarà,

Così durgnassa,

E tant pignatrà:

Con che passièsa,

Con che continèsa

Vènta ch' i passa

Con coula mulassa

Continuament:

S' i veui arprènde

La soa òpinion,

A veul pa intènde

Nessunne rason,

Salvo ch' i m' buta pistèje 'l testas.

L' è scrosa &c.

Una còsa ch' j' peus nèn sufrì

Da cousta gavòta

Ch' ant ogni stagion

A sta tavola
 Cougià su 'l tisson;
 Oh! che figura
 Fà coula freidura
 Con coula plissa,
 Con coula manissa
 Del pèil aramì,
 Mi la fichria
 Pr rabia ant un forn,
 E j' attachria
 Feu drint, e d'antorn
 Pr libèrème da coul trombonass.
 L'è scrosa &c.

Voi ch'j veule carieève d bosch vard,
 Vouli ch'jv la dia
 Tut fora d'j dènt,
 L'è una folia
 Ch'j fè, povra gènt,
 Fumèle, e tèila
 Dal cial d'la candeila
 L'è difissiosa
 La còsa, e scabrosa
 Podèjla andvinè:
 Andeje adasi,
 Prchè an còclusion
 Mi sento squasi
 Pr tut sta rason,
 Cha l'è un sproposit butesse coust lass.
 Son scrose, bavose,
 Nojose, svèrgnose,
 Son d'tiorbe.
 Lassèje stè cousti brut bagagias.



Il Paese della Cocagna

CANZONE V.

Col famos pajis d'cocagna
 A l'è peui un gran pajis,
 Gnun lavora la campagna,
 Pur a smia un paradis:
 Lì chi veul fè 'l gargh lo fassa
 J'è pa gnun ch' a l'ambarassa,
 Fà nèn bsògn d'travajè
 Pr vagnèsse da mangè.
 Le strà son tutte sternie
 Con d'rubidole, e d'piasentin,
 E le pèrtie son guarnie
 Con d'sautisse, e con d'bodin;
 S' i vedejsse le ciovende,
 Loli sì ch' a lè un bèl rènde,
 Fan d'salam tant desformà,
 Ch'ogni doi fan la sòimà.
 La rosà, ch'vèn an campagna,
 L'hà un savor da paradis,
 Couf, ch' a tasto coula bagna,
 Sì ch' aj fà lechè j barbis;
 Bin ch' 'l sol aj bata ansima,
 Tant a rèsta giust com prima,
 Ansi anlora a rèsta mèi,
 Prchè a gèila pà i buèi.
 Ogni smanna a pieuv na vòta
 Dij fidèj, e d'macaron,

Elo, pà una bèla bòta
 Sèmpre avèjne dij baron,
 Fà pà bsògn d'acomodèje,
 J'è la pènna mach d'mangièje,
 Son già bèi anformagià
 Con sò bur, e la servlà.

An fiocand aj ven d'lasagne
 Larghe tre tràvers d' di,
 E d'michete a gran cavagne
 Con dij bon maron candi;
 Quand aj vèn peui la tempèsta
 Tutti anlora fan gran fèsta,
 Ch'a l'è tuta mach d'bonbon,
 D'ale, e d'cheusse de capon.

Dla polènta bèla; e consa
 I fossai son pièn, e ras,
 Basta andè con una bronsa
 I na pie fin ch'av pias,
 J'è squasi gnün ch'a na toca
 Bin ch'a fonda tuta an boca,
 Fòra cousti sènsa dènt,
 Ch'a na mangio alègramènt.

Le nosère fan d'quajete
 Basta andèje destachiè;
 E le roui caria d'tartlete,
 Pi ai na tomb, e pi j na jè;
 J'morè cuvèrt d'ofèle,
 E j'arbron guarnì d'giambèle,
 E le trifole semnà
 Son le dmore dle masnà.

S'i volì d'ròba candia,
 Andè antorn dle bussolà,
 A lè pà tabornaria,
 J'è da fène d'linsolà,
 A j'è pà nissunne ronxe

Ch' a sia privo d' feve punze,
 Piène pure dle carà
 Con man nua, e j' eui sarà.
 Ma s' av pias d' ròba pi finna,
 V'assicur ch' aj manca nèn,
 D' mandolasse a la plarinna
 Ai na j' è dij erbo pièn:
 S' a lè pr d' pastissaria
 Iv na lève d' longh l' anvìa,
 Andè mach ant ij rivass,
 I na treuve minca pass.
 Quand i veule peui tratève
 Tant al dì, com a la neuit,
 Prontè mach 'l tavo, e stève,
 Ch' j osèi vènno bèi, e cheuit,
 Le pernis, e le becasse
 Son comunne com d' lumasse,
 I polastr, e colombòt
 Son pì spass ch' j passaròt.
 D' ogni part ai cor d' fontanne
 Ch' a fan tute cabarat,
 Portè mach le cope, o d' sanne
 Pr ciucè del vin ciairat,
 Moscatèl, e malvasia
 E peu ancor del mej ch' ai sia,
 L' è un bèl còmod a cimpè
 Sènsa spènde pa'n doi dnè.
 D' vòte mai pr gargarìa
 I volèisse stè a durmì,
 Stè sigùr, gnun av desvìa
 Fuslo pure gròs mèsdì,
 Acogià ch' j sie an stansa
 Ronfè pur a crepapansa,
 L' è la mòda del pajis
 Ognun fè com a j' è viù.

S' quachadun ai veul andèje
 Venna si amparè la strà,
 Ma l'è còsa da pensèje
 Ch'a lè pa una folairà,
 Perchè vènta sèmpe core
 Pr dè agn, e quindès ore
 Ant 'l dur, e ampò ant 'l mòl
 Ant la pauta fin al còl.

*Il matrimonio della Figlia di Martino Potagi
 con Giovanni Pietro Bragari.*

CANZONE VI.

J' è la Fia d' Martin Potagi
 Desgagià com un pajè,
 L'ha stant agn e d'avantagi
 S'è vojusse mariè.
 A l'ha pià Giamper Bragari,
 Ch'a lè ancor un bel gioynot,
 A l'avrà sènsa gran svari
 Quatr borle pr spalòt.
 Un piston, e una ramassa
 Son i mòbil d' soa cà,
 Un linseul, e una pajassa
 Con un' èrca desfondà.
 L'han avù da fe tre smanne
 Per anyitè tuti i parènt,

I sottrour, e cura arianne,
Sbiri, bòja, e gavadènt.

L'han fa 'l past a sta marioira
Con un pòrs, ma d'bèla sòrt,
Ch'a trovèro ant la ratòira
Pr là dsour sul solè mòrt.

A ste nòsse s'è comprasse
Una cara d'vin ciairat,
Tuit han vist quand a s'è mnasse
Sigilà ant un bon barlat.

Ma scotè costa ch'è dròla,
L'han vojula fè strènè,
L'ha tirà una parpajòla
Bèla, e fatta con doi dnè.


Oh che nòsse strèpitose!
S'è mai vist un autrstant;
Basta di, ch'andèr a spose
Finna coul ch'fa balè i can.

E per fè pi bèla giòla,
Furnì 'l past, s'è dait un bal,
J'era un sonador d'subiòla
Assetà ansima al trabial.

Sènsa tute st'alègrie,
Che sarnada j'han fait fe!
J'era doe cirimie,
Dès ciochin da mulatè.

Maraman Giampèr Bragari
Con sò Cheur s'è andà arposè,
Son virasse 'l tafanari,
L'han fait nèn ch'petesé.

Coul ch'ha fait sta mariura,
S'è vagnasse un bèl capèl,
Già d'un pès na tnio cura
Atacà sòut al fornèl.



Delle signore Magne.



CANZONE VII.

Signore Magne
 S' i bèive del vin dos
 Con dle castagne
 J' avroma 'l tèmp vèntos,
 S' i gionse d' fasolat,
 Che tron e che gran sciat
 An mèa le montagne
 As veulo fè sènti signore Magne.

S' i bute ancora
 D' cisèr, e cisèrche pr dsora
 Con d' fava fricassà,
 Ohimè! che brut armor
 Veul fè vostr as da fior,
 Ciapè un pò le filagne
 A stranuè pr là
 Signore Magne.

Piè d' siole an mnèstra
 S' i veule carighè bin la balèstra,
 Con d' uva sla rosà,
 S' at intra d' ris al lait,
 L' è giusta vostr fait
 D' andè per le caussagne
 Fasand i veust consèrt
 Signore Magne.

Et' argin v sansa
 V' andrà costè d' camise an abundansa,
 Prchè ch' a peul pa d' manch,

Ch' a forsa d' petàrèi
 Na fasse dij bindèj
 Da empìne dle cavagne
 Pr vènde ai strassa miu,
 Signore Magne.

J' eu mach pagura
 Ch' i veuje rendne l'aria tuta scura
 A forsa d' gran nebias,
 Ma j' eu peu ancor pi por
 Ch' i dvènto del color
 D' sofram, e breu d' lasagne
 Per costi veust perfum
 Signore Magne.

Andè ant le stale
 Tirève la camisa su le spale
 Ch' i sie d' libertà,
 Li sènsa sugèssion
 Podì tirè 'l canon
 Tra voi aitre compagne
 Con tut 'l gust del mond,
 Signore Magne.

Ma piève guarda
 Ch' d' vòte v' scapèissa la mostarda
 Tut giu per i caussat,
 Prchè s' i veustri arsòrt
 A son nèn bon e fòrt,
 Ch' a l' abio dle mangagne,
 Le frange v' scapran,
 Signore Magne.

E s' la cisrèra
 Vnèis a spatarèsse un po pr tèra.
 La bsèst che rabadan,
 L' è vèi ch' a peul giutè
 A cresse 'l liamè,
 Ma peui pr le campagne

Miraco s' a l' è bon,
 Signore Magne.

Am vèn an tèsta

D' mandève dont a fan quaic grossa fèsta
 A desparè i mortrat,
 Prli i podrie ancor
 Pro fève gran onor
 Per fè sauté d' safagne
 A tuti i bombardè,
 Signore Magne.

E s' un sol viagi

La gènt a v' sèntiran, fè pur coragi,
 Vedri lò ch' a sarà,
 Ch' a fassa bèl o brut,
 Sarè ciamà pr tut,
 E li veui ch' i guadagnè
 A galossà i quattrin,
 Signore Magne.

Ma s' i volèisse

Fe cost mestè, vèntria peui ch' i andèisse
 Sòvèns a l' arsenal
 Pr fève butè un gran
 Ai vòstri patapan,
 Prchè da ste cocagne
 I restrè sfogonà
 Sgnore Magne.

E così piève

Anpò sta bèla arsèta ch' j veui dève,
 Piantève un bon stopon,
 Stopève bin l' ussat,
 Ai manca pa d' cornat,
 Vèntirà pèrò ch' ij bagne
 D' senevra, e d' acqua fort,
 Signore Magne.



*Espressioni amorose di Bartolommeo
verso Catarina,*



CANZONE VIII.

Catlinna mi t' lo giur,
E tènlo pr sigur
Ch' it m' has robame 'l cheur,
I son tant carpionà,
E marca dla vrità,
Buca com i desvènno
Ch' i n' eu pi nèn ch' 'l fià.
Coul viagi ch' i t' trover
Astà là su coul chér,
E chi t' dère d' l' eui,
I son sta pià talmènt
Per ditlo francamènt,
Ch' i stèr sènsa paròla
Li tut ant un momènt.
I m' son sèntì arversè
Dan tèsta fin ai pè
Tut quant 'l sang ch' i avin,
To sguard a m' ha altèrà,
E tant anamorà,
Ch' a m' ha tut anfiame
E 'l cheur e la corà.
Così pr dite 'l tut,
L' è lò ch' i m' son ardut
A fè cost viagià
E piè tò sèntimènt
Con coul d' ij teu parènt

Pr fè le prometiure
Sèns' aïtri compimènt.

Un paira d' bèi orcin
Con quatr vir d' dorin
Mi t' heu portà d' argal,
Buchie si ant un papè,
Sta nèn tant a pensè,
A vènta prèst arsolve
S' i t' veule maridè.

Oh! Dio che gran stènt
A di tò sèntimènt,
E sastu nèn parlè?
Dì su zichin zicat,
E parla franch e nat
S' i t' m' as an bonna idèa,
O pur ant ij garat,

E còsa tènstu fait,
Astu già fòrsi dait
Paròla a quaich sfòjour?
Ch' a t' abia caparà,
Dì pure la vrità,
Ohimè! ch' i t' stas tròp chièta,
Da lì m' na vèn 'l fià.

Almanch fame 'l piasì,
E dime prèst un si,
O dime duina un nò,
Furnisla an santa pas,
Cos' elo mai ch' it has
A tnime su la còrda,
E mnème pr 'l nas?

O via dime almanch
Prchè ch' i t' parle gnanch,
Cos' astu ant 'l gabus?
Avrastu fòrsi por
Ch' i sia trist d' umor,

O pur d'una famia
 Da fète desonor?
 Ma giuranon da doi!
 T'has bin l'umor ch'è croi,
 Son còse del malan,
 Veustu fè d'vantè mat
 Tò Brtromè Burat,
 Ch'pr toa bèla cèra
 S'butria a ghisa d'gat.
 Via là t'has peui pro fait,
 A m'vèn giunai 'l lait,
 La landa l'è pro mnà,
 I son pa da lontan
 Vnu si a fe 'l bagian,
 It' m'smie una smorfionna,
 E un bèl mostas da can.
 Da già ch'a l'è così,
 Mi t'lasso ampò 'l bon dè,
 E vad a fe 'l fait me,
 Ma ti testas d'massuch
 Ch'i t'stime gnanch un pluch
 Tò Brtromè, ch'rijria
 S'i t'stèisse astà s'un such.





*Risposta di Catarina a Bartolommeo
sull'aria antecedente,*



CANZONE IX.

Aspèta Brtromè,
Cos'astu pensà d' fe
D' volèime piantè lì?
Nò nò, me corin bèl,
Achièta tò servèl,
T'avras pa pr chitème
Un cheur così crudèl.
I t' sès bin impassient,
Dà tèmp ampò un momènt,
T' has pa i Fransèis darè,
Fin or t' has ciancià ti,
Or lasme parlè mi,
E veustu nèn ch' i pènsa
A lo ch' i dèvo di?
Così me sèntimènt.
A l'è pa difèrènt
Da coul ch' a sia 'l tò,
I t' m' has savù andurmì,
E cossì bin cuij,
Ch' i t' m' oblighe a dovèite
Per fòrsa di ch' d' sì.
D' long ch' i t' hai vist intrè,
Mi t' peus assigurè
Ch' i son restà ancantà,
A sègn ch' ij heu pa podù
Gnanch dite bin venu,

Nè profèrè paròla
 Quandbin j' avèiss vojù.
 I n' eu pa mai antèis
 D' volèite tni sospèis,
 L' è tut descours an van,
 Vèntria bin ch' i fus
 D' un cheur pi dur ch' un us,
 Quand i t' volèiss nèn piète
 S' i t' fusse an mès al trus.

Coul di ch' i t' hai vedù
 I m' son bin pro acorsù
 Ch' i t' sès stait pià da bon,
 E mi pr dite 'l giust,
 J' n' heu sènti tant gust,
 Ch' a par ch' 'l cheur volèissa
 Surtime dant 'l bust.

I inia dit tra mi
 E chi elo mai cost si
 Ch' a m' fa tant bèi ocin?
 Che giovo dèsgagià,
 Bin fait e bin piantà,
 J' è gnun ant nòst vilagi
 Così bin arvià.

J' avria mai sognà
 Ch' i fuss' tant fortunà
 D' avèje un tal sfojor,
 Mi t' assiguro bin
 Me ciocio, e me corin,
 Ch' la gòi a m' fa andè tuta
 An glòria ant un sestin.

Gètil galan vèn si
 A stète après a mi,
 Ch' i parlo su 'l surios,
 Lo distu pr da bon
 Ch' i t' abie l' intènsion.

D' volèime pr toa sposa!
 Che cara arsolusion!
 Via la comènsme dè
 Loli ch'ant 'l papè
 T'has dit ch' i t' m' as portà,
 Sarà un trat vilan
 Quand j' arfudèis toa man,
 I veui pa ch' i t' lamènte
 D' avèilo portà an van.
 Pr cost è un bèl argal,
 N' heu mai avune un tal
 Da tuti i me sfojor,
 I t' sès bin gènèros,
 Amabil e grassios,
 A j' è nè Re nè Prinsi
 D' un cheur così grandios.
 Pr lo ch' è dla mia gènt
 Saran pro tuit contènt,
 J' è pa da dubitè,
 Così l' affè l' è antèis,
 Fra quatr o sinchsènt mèis
 Vèn via ch' j' acomodromo
 L' empite 'l cul d' apèis.



*Dialogo sopra il contrasto di due Figlie
che hanno un solo amante tra tutte due.*

CANZONE X.

Sa sa chi ha veuja d'riè
 Son bèle drolarie
 Da stampèje
 Da tachèje sui canton,
 Da tachèje sui canton;
 J'è doe fie d'un drolo umor,
 Tra tute doe l'han ch'un sfojor,
 S'veulo dèsse,
 Ciarpignèsse,
 E gavèsse j'eui tra lor.
Una l'ha nòm Biasinna,
 E l'autra Giacuminna
 Tute doe
 Brute loe
 Ch'a fan por,
 Brute loe ch'a fan por:
 Oh! s'i vedèisse coi mostassin,
 Son da dipinse su doi bronssin,
 Còse nòbil
 Pi ch'sti mòbil
 Ai son nèn ant sti confin.
Una dis: mi ch'i son bèla
 Veuì pa usè d'rasparèla,
 Lèvetlo pura
 Pr sicura
 Dal gabus,

Pr sigura dal gabus,
 Cost boconat a fa pa pr ti,
 Sastu ancor nèn ch' a vèn mach pr mi,
 T' sès pur fòla,
 T' sès pur dròla
 A marcè su 'l fus così.
 Oh! che forslue blesse,
 T' sès del colòr dle vesse,
 T' m' fas rie
 Quand i t' die
 Ste rason,
 Quand i t' die ste rason,
 Mach a buchète le gènt han sgiai,
 La gran bagianna ch' i t' sès peul mai,
 Sta ampo cacia
 Scrousa e nacia,
 Vate a sconde ant ij fossaj.
 Oh! pòvra mamalucca!
 I t' sès una trluca,
 Va stermète,
 Va cogète
 Drint ant un gioch,
 Va cogète drint ant un gioch,
 Con coul tò bèl color pavonas
 Ch' a fa pagura fin ai crovas
 Macaronna,
 Sfondradonna,
 Fate arfonde coul mostas.
 S' i son bin ampò brünna,
 Mi temo-pa la lunna,
 J' heu mei tèsta,
 Son pi lèsta
 Ch' i t' sès ti,
 Son pi lèsta ch' i t' sès ti,
 Mi n' heu pa manca d' fème rablè

Com i t' fas ti, ch' i t' sès un busè,
 Oh ! tripassa,
 Bagianassa,
 Com' ancalstu ancor parlè?
 Quandbin i sia sòpa,
 I son pa nèn falòpa
 Nè stransia,
 Nè splufria,
 Tant com ti,
 Nè splufria tant com ti:
 Buchte ampò ti con tò bèl gavas,
 Ch' a t' ha giamai cuvert 'l mostas,
 E ti t' crede
 D' fèmla vede,
 E d' volèime ancor piè 'l pas.
 S' mi i son dla gola gròssa,
 Ti t' sès dij pe ant la fòssa,
 E t' has venja
 Bruta treuja
 D' un mari,
 Bruta treuja d' un mari?
 Ma chi saralo coul bagianas
 Ch' a venja pièsse tant ambaras
 D' una ciòrgna
 Mèsa bòrgna,
 E dernà com' un bahias?
 Oh ! che descors da gnòca,
 Da gonsa, e da massòca,
 T' sès na tòfa,
 E una gòfa
 Spènsièrà,
 E una gòfa spènsièrà,
 Ma sastu nèn con la dòta ch' ij hai
 Ch' i peus curvime tuti i me mai?
 J' heu d' bagagi,

J'heu 'l fardlagi
Sènsa lò ch'ij èrèditraí.

Dont astu coula dòta,
Ela stermà ant la cròta
Drint la bota
Ch' i t' has sota
La baral,
Ch' i t' has sota la baral?
Fame un pò vede coul tò fardèl,
Vènta ch' a sia quaiçòsa d' bèl,
Malanagi
Sia ai bagagi!

I t' has gnanch un stras d' barbèl;
La pèst ala bagassa!

Cos' astu ti mascassa
D' ampacète
Da crussiète
Del fait me,
Da crussiète del fait me?
Com' astu ti da fichè tò nas?
Mostra carògna ti lò ch' i t' has,
T' sès na vèra paterlèra,
Va anpò là brut luv ravas,

Porcassa maladèta,
Adèss adèss aspèta
T' veui mostrète,
T' veui butète
Giù coi dènt,
T' veui butète giù coi dènt,
E con chi credstu avèje da fe?
Chi t' ha mostrate 'l meud d' tratè?
D' mincionète,
D' cansonète
Dla manèra del fait me?

Cos' elo ch' i te dic' ?
 Mostass da fème ríe,
 Sfrontadassa,
 Galupassa
 Ch' i te sès,
 Galupassa ch' i te sès ?
 Pènestu forsi d' fème quajè
 Con toe mnasse, e con tò brajè ?
 S' i t' pío
 Mi t' strío,
 Ch' i t' podrass pi gnanch bajè.
 Lassè anpò mi ch' i dia
 La volontà ch' j' avría,
 A l' è d' pièje,
 E campèje
 S' un liamè,
 E campèje s' un liamè,
 Podría dèsse, ch' a coul odor
 Fòrsi cambièisso coul bèl umor,
 E ch' l' anvia
 J' andèis via
 D' ingiurièsse pr d' sfojor.





CANZONE XI.

Da cantarsi a tavola per bere.

Orsù voi aitre tuti dla brigada
Guardè la pòvra doja a ste d' bada :
Elo pa una vergògna a divlo an rima,
Ch' i na fasse tuti sì poca stima.
O via la, comansè voi compare,
Tra tant ste tuti bin atènt ch' j ampare.
E peui pi prèst la pansa crepa, e sciòpa,
Ch' nèn bèive tuit après criand e tòpa.
E coul ch' a bevrà nèn la sanna piènna,
A bevrà n' autra vòta pr soa pènna.
O via bèive pur, bon pro v' fassa,
Ma gara s' quaicadun i lavèr s' pnassa.
E chi trasgrèdirà sta lège scritta,
Coul li pagrà pr tuti l' eva d' vita.
Archè i volomo pa ch' gnun a dia,
Ch' i sio andait a bèive antorn dla sia.
Ch' an conclusion a l' è pa gnanch vergògna
Portè la bèla ansegna dla bronsògna.
Così la gènt na farà pa miracò
S' i s' diciaromò tuit scolè d' Baco.
Anoi me cari fieui, ch' la doja ròla,
I seu ch' nessun patis 'l fum d' raviòla.
Costa cansen a l' è giamai furzià,
Ma antant mi sènto ampochè ch' a m' ven
(la pvia.
Portè ampò dunna dunna d' coula bagna,
I m' sènto, ch' la saliva ormai s' stagna.

Mi vœui petève un poch a tuti un brindès,
 E s' an bastrà pa d' un v' na petreû quindès.
 Adès netiève pur tuti la boca,
 E peui andè a durmì ch' l' aso v' toca.



*Dialogo tra un Marito stitico, e sua Moglie
 lubrica di corpo.*



CANZONE XII.

Agiut, càra Mojè,
 Ch' i peus pi nèn caghè
 Pr sfors ch' i fassa;
 Astà sul cagador
 I dagh ant un sudor,
 I dagh ant un sudor
 Frèid com la giassa.
 E mi, me car mari,
 I peus pa pi tni,
 Ch' tut a m' scapa,
 E tanta sfoirassà
 A m' rënd tut' arlassà,
 A m' rënd tut' arlassà,
 E bèla, e fiapa.
 J' heu bèl mangè d' bur,
 Ch' tant i cago dur
 Com' una pèra;
 J' heu bèl piè d' sèrvissiat,
 Ch' tant i son a guai,
 Ch' tant i son a guai
 D' ugual manèra,

Mi tènno pur mangià
 D'oeiv dur an quantità
 Con d'geladinna,
 E pens nèn tni sarà
 L'ussat destènèbrà,
 L'ussat destènèbrà
 Ch'j heu al fond dla schinna.

A m'vèn dle spermison,
 Ch'a par ch'a m'seurta un mon
 Dant le buèle;
 L'è peui 'l buèl culè,
 Ch'ant 'l surti a m'fa dè
 Ch'ant 'l surti a m'fa dè
 An ciempanèle.

E mi che suggèssion!
 S'me'cul a fa 'l mincion,
 E ch'a s'dispènsa
 A tirè un pat e mès,
 Le frange vènno après,
 Le frange vènno après
 Sènsa licènsa.

S'i fas quaich brlonat
 Mach gròss com d'fasolat,
 Oh! che gran fèsta,
 E pur j'è n'autr ambreui,
 Prchè a m'fa surti j eui,
 Prchè a m'fa surti j cui
 Fòra dla tèsta.

Ma mi l'è peui bin pès,
 Nessun a m'vèn d'après
 A fè una gnogna
 Prchè d'coul odorat,
 Ch'j heu d'ambra con d'zibat,
 Ch'j'cu d'ambra con d'zibat,
 E carafogna.

Quand i son li ch' i m' sprèm ,
 Vènta sènti che gèm
 I fas alora ;
 Ma con me front an man
 I campo ij sfors an van ,
 I campo ij sfors an van ,
 E ala malora .

Di un pòch s' a l' è pa brut ,
 S' 'l cul a m' ròba tut ,
 E com mai fèla ?
 Tut giù fin su i garat
 L' è sèmpre tut maunat ,
 L' è sèmpre tut maunat
 Dla cagarèla .

Fra tanti lavativ ,
 Siròp e lènitiv
 A gran scudèle ,
 Un' autr avria cagà
 E 'l cheur , e la corà ,
 E 'l cheur e la corà
 Con le huèle .

A dila peui da bon ,
 Che gran dispèrassion
 A l' è la mia ,
 Ch' i dèba esse obligà
 Mach a tnime netià ,
 Mach a tnime netià
 La ciaparia .

J' heu tanti durignon
 Ch' a smio tòch d' piston
 Ant la bedrassa ,
 E j' heu bèl fè e bèl di ,
 Ch' a veulo nèn surti ,
 Ch' a veulo nèn surti
 Dant la tripassa ,

E mi heu tavòta 'l mnu
 Tut fiap e molaciù
 Com la basanna,
 Prchè tut a l'opòst
 Me cul a l'è pi tòst
 Me cul a l'è pi tòst
 Una fontanna.

J' heu mandà piè d' savon,
 E d' euli del pi bon
 A bèla pòsta,
 I veui ancor provè
 D' fème piantè darè,
 D' fème piantè darè
 Una supòsta.

E mi heu giamai fait tant,
 Ch' i seu pa pi a che cant
 Mai arvirème,
 E tut a m' ha vajù
 Pr tñime 'l còrp smovù,
 Pr tñime 'l còrp smovù,
 E amberlifème.

Di un pòch, mia cara gènt,
 S' a l'è un divèrtimènt
 Da crepè d' rìe?
 Dont eve mai sèntì,
 S' i veule pure dì,
 S' i veule pure dì
 Ste drolarie?

S' a veulo me parèr,
 N' armèdi bin lingèr
 M' ij mostro ancora,
 A chila un bon stopon,
 A chial an leu d' savon,
 A chial an leu d' savon
 Un gavabora.

*Contrasto di uno, che, stimolato da un altro
a levarsi di letto, non vuol levarsi.*

CANZONE XIII.

Lèvte Tòni su da lì,
Astu pa 'ncor pro durmi,
Veustu 'ncor nèn dète deuit
Bruta cèra da pom cheuit.
Lèvte Tòni su da li
Astu pa 'ncor pro durmi.
Va 'npò attènde ai teu mascogn,
Lassa stè a durmì chi ha bsogn,
Mi t' vad mai a destorbè
Quand ti t' sès tacà a ronfè,
Va 'npò attènde ec.
Oh! che vita da porcas
Bèla mal a dvantè gras!
Dla manèra i t' has pa por
D' attachè quaich anfrèidor.
Oh che vita ec.
Pur ch' im lèva da cogià
Quand 'l tao sia parià,
Mi n' eu tant com' i na veuj,
Sènsa pième tanti ambreuj.
Pur ch' im lèva ec.
Oh! si-si t' veui argalè,
Spèta l' ora del disnè,
I t' veui dète d' brle d' pòrs,
Lassa pura fè da Giòrs.
Oh si-si ec.

Cosa tènstu tampestà,
 Sta 'npò chièt ch' i t' pèrde 'l fià,
 I venj ste sì a tò dispèt
 A gargarisè ant 'l lèt.
 Cosa tènstu ec.

M' astu 'ntèis mostass da cam,
 Veustu stè fin a doman
 Con le toe msènne a meui
 A marsè tutti i linseui?
 M' astu 'ntèis ec.

Alo 'ncor da durè 'n pèss?
 Va 'npò al bòja brut incrèss;
 Astu 'ncora nèn pro mnà
 Costa diafcne d' landnà?
 Alo 'ncor ec.

T' has bèl fè, t' has peui bèl dì,
 Pènsa pur pa pì d' durmì,
 S' it' dovèissa piè pr i bras,
 E striplète giù dal gias.
 T' has bèl fè ec.

Ch' a t' peussa sauté 'l flus,
 Va al malan, e sarme l' us;
 S' i dag man ai me scarpas,
 Mi t' ij sbato ant 'l mostas.
 Ch' a t' peussa ec.

I t' lo veui durvì pì largh
 Già ch' i t' veule 'ncor fè 'l gargh,
 Veui ch' i t' staghe strojassà
 Con le fnèstre sbalassà.
 I t' lo veui ec.

Canpa pura d' rabia 'l pis,
 Mi m' sbaruo pa 'n stis,
 Fin ch' a fia coul mèsdì,
 Mi veui pa bogè da sì.
 Canpa pure ec.

Ma pr dite la vrità,

Vahi! ch' it sès peui ostinà,

I t' has bin un umoras

Tal e qual com' un mulas,

Ma pr dite ec.

Va a le masche tèsta d' mul,

Còsa m' tènstu rot 'l cul?

Lassme 'n pòc arposè an pas,

Vèna 'l bèsst al fica nas!

Va ale masche ec.

Si dag man a un savardon,

Si ch' it mostro fè 'l poltron,

Si-ch'-d'-si ch' it dagh tò rèst,

E t' fareu sauté su prèst.

S' i dag man ec.

Pijte guarda, fa pa 'l fòl,

S' i saut su, mi t' tòrso 'l còl,

Veustu 'n pò giughè un douson

Ch' i t' buto a tòc e pson?

Pijte guarda ec.

Senti 'n pò cost poltronas

A fè ancora del bravas:

O via ciapa amprtinent

Costi doi sgrognon sui dènt.

Senti 'n pò ec.

Marcè prèst me bèi vesin,

Arestè cost assassin,

Dunna dunna, agiut, agiut

Mi pover Om ch' j colo tut.

Marcè prèst ec.

Già ch' i t' crie com un mat,

Pijne ancor dontrè sul pat,

E peui và anformè i vsin;

Ch' i tornreù doman matin.

Già ch' it crie ec.

Vate pur a fè squariè ,
 Spèta a vni ch' i t' manda piè ;
 Oh ! podèistu 'npò al prim pas
 Rompte 'l còl, le gambe, e ij bras.
 Vate pur a fe ec.



Testamento di Lucrezia Gelofrada

CANZONE XIV.

Che bèla trastulada,
 Sèntila atèntamènt,
 Lugrèssia Gèlofrada
 L'ha fait sò testamènt.
 Durvì pur bin j' orie,
 Scotè ste drolarie,
 Son còse tant da rie
 Da fève tombe ij dènt.
 A l'ha lassà tre fie
 Con un codògn d' un fieul ;
 Lor aitre son musie,
 E chial è un bèl faseul :
 Una l'ha nòm ciaflassa,
 E l'autra patoflassa,
 La tèrsa Gianaflassa,
 E 'l frèl ha nòm Griseul.
 A j'ha dispòst a pr una
 La dòta fesonant,
 Pr tant ch' a treuvo duna
 Quaich bon partì friant ;

J'ha pa lassà d'paròle,
 J'ha pa lassaje d'fròle,
 A son tre parpajole
 Tut an quattrin contant.
 J'ha faje butè an lista
 Un bèl e bon fardèl,
 Una camisa d'rista,
 E n'autra 'nsèm d'barbèl,
 Una scufiassa ulianna,
 Un fassolat d'lanna
 Con un faudal d'frustanna,
 Ch' l'è bon a fe 'n crivèl.
 Un stras d'una brassièra
 Ch'a l'è tra grisa e bleu,
 Un bèl cotin d'bandèra,
 Ch' or or va tut an breu,
 Con doi caussat d'flanèla,
 Grossè com d'rasparèla,
 Un del color d'canèla,
 E l'autr color del feu.
 Dontrè fassine d'rame
 Con mèsa mina d'sèil,
 E tre manisse grame,
 Ch'a pèrdo tut 'l pèil,
 Con tre plissasse armise,
 Ch'a fon giu mai an frise
 Pr mincionè le bise
 Ch'a vèno al tèmp del gèil.
 D'mobilia j'ha lassaje
 N'archetta desfondà
 Da butè le ghingaje
 Dla gran crèdità;
 Una pajassa mòla
 Com'una ciapa d'sòla,

Con doi linseui d'rairòla,
E un trozio sciancrlà.

A l'han avù fortunna
(Sènti lò ch' vèn après)
D'un urinari pr una
Forà ant 'l bèle mès;
Un ciap d'una sebreতা,
Un quart d'una paleta,
Un scagn, e una bancheta,
Ch'a stanto tnisce an rès.

Una ardènsa marsa
Ficà là ant un canton,
Ch'a fa una tal comparsa,
Ch'a par un sùch d'arbron,
Una cavagna rota,
Un doi, con una bota
Ch'a cola tut pr sota
Quandbin ai sia un tacon.
Un piat, e una scudèla,
Un tond desvernissà
L'è tuta la vassèla
Ch'la mare j' ha lassà, -
Un tòch d'una stagèra,
Cassul, e cassulèra,
E mèsa formagèra
Ma tuta camolà.

Un ola già scrussia
Ansèm a un tupinat
Ch'a l'è sènsa mania
Con dontrè pertusat,
Un as da ciapulòira
Ficà ant una ratoira,
Un tèrs d'una scumoira
Bonnà a scumè i sampat.
An quant a la framènta

A j' è un bon ciapulor,
 Ch' antorn a la polènta
 A taja ch' a fa por,
 Dontrè cujè, e forclinne,
 Tute posade finne
 Del bosch ch' a fan le tinne,
 Con doi cotèi saror.

Una baral mufia
 Stremà darè del forn,
 Un sebèr e una fia
 Sercià con d' còrde antorn,
 Un mortè d' bòsch ch' a dagna
 Per pòch ch' ai buto d' bagna,
 Con so piston d' castagna,
 Ch' a l' ha mai vist 'l torn.

Un lum da vèr brustiaire
 Ansèm al so vilan,
 E trè galinne maire
 Ch' ogni sès mèis a fan,
 Una carèa cagòira
 Ch' ai sèrv d' èrca ampastòira,
 Con una davandira
 Ch' a l' è sènt agn ch' a l' han.

Ampò d' una fusèra
 E na triènna d' fus,
 Un stras d' una portèra
 Ch' a j' è sinchsènt pertus,
 Un tòch d' una gratusa
 Forà tut all' arbusa,
 Una pèila, bin ch' ai scusa,
 L' è un gust com a tralus.

Ma 'l fieul l' ha comodalo
 Ch' ha peul pa nèn stè mal,
 S' antènd ch' a l' ha lassalo
 Erède univèrsal

Daśandie una cabassa
 Pr fè figura an piassa,
 Prchè l'ha una schinassa
 Da bon fachin d'varal.

A coul ch'ha pià la briga
 D'arsèive 'l testamènt,
 S' a l'ha bin fait fatiga,
 L'è pà stait mal contènt,
 L'ha avù pr autèntichèlo,
 E pr ansinuèlo,
 E peui pr arcopièlo
 Un sold d'emolumènt.

Volive ampò ch'iv dia
 Chi l'era coul nòdar?
 A l'è Bastian Granghía
 Coul là ch'a fa i filar,
 E i Tèstimoni l'ero
 Fabian, Gèrvas, e Pèro,
 Simon, e Toni 'l gnèro,
 Tibursi con Gènar.

E chi vorà nèn crede
 Ch'a sia ansinuà,
 Ch'a vada pur a vede
 Ant la comodità.
 Ch'a deurva coul armari,
 Ch'a lèsa coui scartari,
 Ch'a sèrvo al tafanari,
 L'è tut li règistrà.

Pr coi ch'a sènto lèse
 Costa disposission,
 A s'è lassasse arèse
 D'lassèje soa porssion;
 L'è staita gènèrosa,
 L'ha feita da grandiosa,
 D'una cavia rognosa
 Ch'ai sèrva pr stopon.

*Barba Gironi, e Slarfinaja sua moglie,
che dopo 30 anni di matrimonio hanno
avuto un figlio maschio,*

CANZONE XV.

L ha una gòi Barba Giròni,
Ch' a fa d'saut com' un cravieul,
Sui trant agn d' so matrimòni,
Finalmènt a l' ha avù un fieul.
Sui trant agn ec.

Pr piàsì ch' loli j' ha faje,
(Fur da rie da crpè)
An sautand scianchèr le braje,
Ch' ai drochèro giù sui pè.
An sautand ec.

Oh! che bèle trebaudete,
Ch' a j' han faje i seu vesin
Con le mòle, e le paletè
Sui paireui, e sui bronsin.
Con le mole ec.

A j' han fait una sparada
Ch' a smiava giust d' mortrat,
Ma l' è stait una sarnada
Faita a fòrsa d' rut, e d' pat.
Ma l' è stait ec.

A sa nèn còsa s' fassia,
Tant as treuva conturbà,
Basta di, ch' andèr an piassa
Sènsa braje con la spà.
Basta di ec.

Ai sförgionna d'panadasse

Minca poch ant un concat

Dle pi bonne, e dle pi grasse,

Faite tute al breu d'sampat.

Dle pi bone ec.

A j'ha già massà una pola

Ch'a l'avía quindès agn,

Ma pr fè berbotè l'ola

L'ha brusà fin i cavagn.

Ma pr fè ec.

L'ha fità la sòma de 'l osta

Bòrgna, sòpa, e sènsa dènt

Pr mandè 'l sotror an pòsta

Dène part ai seu parènt.

Pr mandè ec.

Son vnu vestì da festa

Tuti quanti a fèje onor

Sènsa cause, e nèn an tèsta,

Scarpèntà com d'sfrosador.

Sènsa cause ec.

Ogni d'un a s'è studiasse

Pr portèje quaich prèsent,

Chi d'povron, e chi d'lumasse,

Chi d'faseui, chi d'pom rusnènt.

Chi d'povron ec.

Slanfrinaja s'è godusse,

Ch'a l'è peui la pajolà,

Gnanch pr seugn s'era credusse

D'vedse fè tante onestà.

Gnanch pr seugn ec.

A j'è andaje doe cidègne

Pr bailèje col fiolin,

Unna l'ha le pupe bòrgne,

L'autra l'è sènsa mimin.

Unna l'ha ec.

Venta vede pèssè e fasse
 Travajà con tuti i fioch,
 Con tre tèile da pajasse
 Ch' a tajèr an tanti toch.
 Con tre tèile ec.

L' ha dait man a un paira d' braje,
 Ch' a portava ai di d' lavor,
 S' angignèr a j' ha desblaje,
 L' ha gavane un cuvertor.
 S' angignèr ec.

Con sò spirit s' è butasse
 Pr volèje fè un cunòt,
 E talmènt a s' è aplicasse,
 Ch' a l' ha riussì un sebròt.
 E talmènt ec.

A s' è piasse pr compare
 Messè Giòrs 'l cartonè,
 Con Argnasca pr comare
 La cugnà del tarponè.
 Con Argnasca ec.

La Marinna j' ha portaje
 Un scuflìot dij pi famos,
 Basta di, ch' a j' ha costaje
 Una bonna pugnà d' nos.
 Basta di ec.

Con la tòrcia d' sira giauna
 Già scrussia a tut andè,
 Ma gropà tut giù con d' cauna
 Son partisse andè a batiè.
 Ma gropà ec.

Quant al nòm a consultèro
 Quand a furo pr camin,
 Finalmènt a concordèro
 A butèje nòm Marin.
 Finalmènt ec.

Tut 'l mond prli surtia
 A buchè sta prussession,
 E Gironi s' n' andasìa
 Rèidi e fièr com' un piston.
 E Gironi ec.

Una ciabrisà parìa
 Dalla sima fin al fond
 Ant coul leu s' è mai sèntia
 Gnanch da peui ch' 'l mond è mond.
 Ant coul leu ec.

L' Arsiprète ch' ha batialo
 L' ha tirà sua stuca après,
 Messè Giòrs l' ha règalalo
 D' una pèssa d' doi e mès.
 Messè Giòrs ec.

Ela pa una bèla strenna
 Ch' a l' ha avù la pajolà?
 D' una tasca bèla e piènna
 D' castagne brusatà.
 D' una tasca ec.

Ma sènti fra j' aitre mance
 Cola li dla lèvatris,
 A j' han daje sènsa ciance
 Da comprè una lira d' ris.
 A j' han daje ec.

Coul ch' a l' ha portà la tòrcia
 L' ha pa fait sò viaggi an van,
 L' ha pa avù una strènna splòrcia,
 Ch' a j' han dait na mica d' pan.
 L' ha pa avù ec.


Ma venoma ale batiaje
 Pr sènti quaicòsa d' bèl,
 Quanta ròba ch' a j' è staje
 Tut parià s' un gran tinèl.
 Quanta ròba ec.

Prima ai fur na bèla ambòsta
 Tra luvìn, e tra ravòt,
 Ch'ero acomodà an compòsta
 Con d' cocomèr, e d' cossòt.
 Ch'ero acomodà ec.

Peui na bèla polèntassa,
 Ma tajà tuta a listin,
 Ch'a fasio una minassa,
 Ch'a smiavo d' bescotin.
 Ch'a fasio ec.

Lò, ch'fèr gòi a la brigada,
 Fur un mas d' bèi ravanat,
 Con un bèl gaviòt d' salada
 Tuta d' pleuje d' fasolat.
 Con un bèl ec.

Peui mandèro a l' ostarìa
 Fè portè un boccal d' vin,
 E la fèsta fur finia
 Dòp avèje cimpà bin.
 E la fèsta ec.



*Matrimonio delle Figlie di Lucrezia
 Gelofrada.*



CANZONE XVI.

Scotè s' pur v' agrada
 Sta bèla novità,
 Le fie d' Gèlofrada
 Son tute arcapità.
 Sotrà ch'a fur la mare

S'è manegià 'l pastis
 Tra amis e tra compare
 Pr dèje dunna ardris.
 Da peui ch'pòch pr vòta
 S'è spatarà la vos
 D'coula bonna dòta,
 E coul fardèl famos,
 Scusè, com a marciava
 La fior dla gioventù,
 E ognun a procurava
 A fèje sèrvitù.
 Vedent loli, s'butèro
 Su j'arie del folat,
 E tute tre restèro
 Suriose com d'pat;
 A pènn a salutavo
 Dla tèsta, o con la man,
 Ma non s'ancomodavo
 D'aussè coul fabrian.
 La gioventù pi fola
 Ch'a n'ero carpionà
 Perdiro la paròla
 Restand bèi, e stonà;
 Ma tuti coui ch'a l'ero
 Nèn tut affait massuch,
 Pian pian a s'la sbignèro
 Tiantandìe astà s'un such.
 Così restèr la piassa
 Ai tre partì pi bon
 Gian Grolla, e Gibrs Tignassz,
 E Bertromè Plandron,
 J'è'l prim ch'a fa 'l ressiare,
 E l'autr a fa 'l magnin,
 Ma 'l tèrs a l'è pa d'vair
 Ch'a fa 'l marcant d'sufrin.

Anlora ste smorfionne
 Posand coul bèl umor,
 Andèro pi a le bonne
 Con costi tre sfojor;
 Con rute soè richesse
 Cambièro d'sèntimènt
 Fasandie sènt caresse
 E mile compimènt.
 Peui senza fè d'mastiure
 A s'acordèr l'affè
 Vnènd a prometiure
 Li subit su doi pè,
 Fasandie alla presènsa
 D'doe tèstassion,
 Ch'a fur Simon Scorènsa,
 E Giaco Scarniflon.
 Gian Gronla veul Ciaflassa
 Perchè ch'ai smia anpoch,
 E Giòrs la Patoflassa
 Perchè son giust doi gnòch,
 La bèla Gianaflassa
 Convèn a so plandron,
 Almanch a s'ambarassa
 La lòsna con 'l tron.
 Pr tuta sicuressa
 S' son tocà la man,
 E dasse pr promessa
 Un bèl quattrin d'Milan,
 E peui a son basasse
 Ma con un affession,
 Ch'antorn a le ganassee
 A j'è restà i nisson.
 E pr finì facènde,
 E stè lontan dai guai,
 A fèro ampò destènde

I seu instrument dotai ;
 Con mèsa parpajòla
 A l'han pagà 'l nodar ,
 Ch'a l'è Bernard Famiòla
 Coul ch'vènd i pom badar.
A l'han spedì Brighèla
 Ch'andèis a dè l'avis
 Après dla parèntèla
 A tuti i bon amis ,
 Ch'a son tuta sgnurìa ,
 E fior dla nobiltà
 Da sapa , piòla , e stria ,
 Da brustia , e cis va là.
Gnun veul pa figurèsse
 La confusion dla gènt
 Ch'andava a ralègrèsse
 Con coi mostas rusnènt ;
 E pcit , e grand marciavo
 Durant poch manch-d'un mèis ,
 E li s' sbergnacavo
 Pr vede coi arnèis.
Tuit i marcant andèro ,
 I ghingajè , e sartor ,
 Prchè ch'a s' figurèro
 D'fè un guadagn da sgnor ;
 Vedèndie peui furnie
 D'tanta provision ,
 A pièro soe ghnìe ,
 E mnèro 'l petandon.
Scotè sta si ch'è bèla ,
 E dègna d'attènsion ,
 Tnijne pa capèla
 Ficà là ant un grupion ,
 E 'l frèl sul' us dla stala
 Podia pi tranfiè ,

Con la cabassa an spala
A fe 'l sirimoniè.

Tra tant ij spos, pr fèsse
Stimè da diligènt,
Andèro ampò a parièsse
Ognun sò apartamènt,
Ch' a smio tre ratèrè
Forgià tute pr stòrt,
Sens us, e sènsa vrèrè
Pr là s' un solè mòrt.

A pièro una sivèra
Pr core, e andé cariè
Ognun tut lo ch' a j'era
Spètant a soa mojè;
An doi, o tre cariagi
L'han tramudà pr fait
I mòbil, e i bagagi,
Na fuslo pura stait.

E peui a son pariasse
Sò past tra mairi e gras
Con d' ranne, e con d' lumasse
Ansèm a tre crovas,
Una piatlà d' servlete,
Un ciouch rusti ant 'l forn,
Con sès, o sèt siolette
Per guarnitura antorn.

Una mnèstra d' fava
Già tuta morinà,
Un bon huij d' crava
Con d' rave carpionà,
Tre pich a la cialòta,
La fricassà d' un foin,
Una stoffà d' marmòta,
Con un ragou d' luvin.

A l'han cujì una minna,
 E quatr cop d'agian
 Pr fè tanta farinna
 Da fè una cheuita d'pan;
 A l'han empì d'sebrete
 Prestaje dai vsin
 D'lambrosca con d'brgnete
 Da fè una brinda d'vin.
 A pènnà son furnisse
 Tuti i sirimoniai,
 Ch'le spose son unisse
 A prèparè i mofaj,
 E dle livrèe scure
 D'un ormesin armis
 Trovà ant le ramassure
 Pr dè ai parènt e amis.
 A l'han guarnì d'sarsiure
 Tre fassolat rancian
 D'tèila d'armnure
 Pr dèje al sgnor Piovan,
 Tra tant ij spos comprèro
 Sò bèl anèl a pr'un,
 Ch'i credo ch'ai costèro
 Pa manch d'un doindnè l'un.
 Furnie le facènde,
 E congrègà i parènt,
 A stèro nèn a spènde
 Sò tèmp inutilmènt,
 Ma pianse ala brasseta
 Ste tiòrbe, e sti gosè,
 A pièro la sbrueta
 Pr core andè a sposè.
 A vede sti mariagi
 Ai n'è surtì dla gènt,
 Tre quart d'conl vilagi
 Marcèr a tni da mènt,

Giamai a s' soni sèntie
 Dle ciabre d'coula sòrt,
 Sigur, ch' vèntava rie
 S' un fussa stait mèss mòrt.
 Che quantità d' ressiura
 S' è vista spatara,
 E d' bran fòra d' misura
 Pr tute le contrà;
 Oh! quanti son levasse
 Su l' andoman brovà,
 Quand a s' son trovasse
 Su l' us la soa porà.
 Sù costi matrimòni
 (Parland li tut ar'ond),
 A j' è da fè un bèl tòni
 Dij pi grassios del mond,
 Sigura ch' un podrìa
 Empi un quintèrn d' papè
 Pr costa drolaria,
 E peui fèla stampè.



Due Vecchj innamorati d' una figlia.



CANZONE XVII.

A j' è naje una gabèla
 Tra Simon e tra Bastian,
 A sarìa pro ancor bèla
 S' a vnèisso ampò a le man.
 A sarìa pro ancor bèla,
 S' a vnèisso ampò a le man.

Tni da mènt s' i digh busía,
 Ai veul esse un brut armor,
 Prchè a vèn da gelosía
 Ch' a son piasse tra d' lor.
 Prchè a vèn ec.

Sti bavo, e langrignaire
 Tuti doi son carpionà
 D' una fia d' un brustiaire,
 Ch' a sta là ant soa cantonà.
 D' una fia ec.

Un è vèi com' una pèra,
 L' autr è vèi com' un serpènt,
 Un a l' è con la dernèra,
 L' autr ciòrgn, e sènsa dènt.
 Un a l' è ec.

Costa fia ha male pènna
 Trant e sèt, o trant eut agn,
 Bianca e rossa com la chènna,
 Desgagiè pa pi ch' un scagn.
 Bianca e rossa ec.

Vènta vede che d' carezze
 Van fasèndie coi griseui,
 Son tant pià da coule blesse,
 Ch' a van tut an breu d' fascui.
 Son tant pià ec.

Un ha faje fè la dmanda
 Da Cristòfo Garnacias,
 L' aut mandèr dall' autra banda
 Gian Antòni Mostafas.
 L' aut mandèr ec.

Son andait con tanta tòla,
 Ch' 'l brustiaire restèr moch,
 Stèr ampò dnans di paròla
 Ancantà com' un oloch.
 Stèr ampò ec.

Maraman con cortèsia

J'ha mandaje fè ampiumè,
An disènd ch' d' una fia
Pi d' un genèr s' peul nèn fè.
An disènd ec.

Maginè sti vèi balòta

Com' a son restà brovà,
A l'è sta una bruta bòta
Pr squarsèje la corà.
A l'è sta ec.

Quand a l'han savù ch' a l' ero

Tuti doi an prètension,
Pofarbaco ch' a sautèro
Anfiàmà con doi lion.
Pofarbaco ec.

Pr dècide la contèisa

Son mandasse a desfidè,
Toni Bioch ha pià l' imprèisa
D' andè chial pr messagè.
Tòni Biouch ec.

Tra mantrè s' son armasse

Da fè por a gat e can,
Con i manni dle ramasse,
E una cròssa a pr un an man.
Con i manni ec.

L' andoman sti gnòch s' levèro

Tuti doi d' bon matin,
Capitèr ch' a s' incontrèro
Sot la fnèstra d' sò gioijn.
Capitèr ec.

Pensè un pòch com' a son fassé.

Dij brut euj quand a s' son vist,
Basta di ch' a son bucasse
Con la rabia d' l' Anticrist.
Basta di ec.

Maraman a comènsèro

Vilanièsse com d'cagnas,

L'un pr l'aut na destachèro,

Ch'a sèntije l'era un spas.

L'un pr l'aut ec.

Un disir a l'avèrsari,

E cos' astu pr pènsè

Bruta cèra da urinari

A volèite ambarassè?

Bruta cèra ec.

Rascasson con la dernèra

Dur d'orìa com' un doi,

Carn da pich, bandi d' galèra,

Carià d'rogna, d'lèndne, e d'poi.

Carn da pich ec.

T'has avù tant' arogansa

Pr mandème a desfidè?

T'veui mostrète la crèansa,

E voltète 'l dnans darè.

T'veui mostrète ec.

I t'fareu passè 'l sproviso,

E la volontà d'fè 'l gròs,

Con un sofi mi t'sbriso,

E t'fracasso tuti j'os.

Con un sofi ec

L'autr vèj drissèr j'orìe

A scotè sti compimènt,

Peui après a fur da rìe

Com' ai arvirèr i dènt.

Peui après ec.

A j'ha dije : tèsta d'aso,

Còsa fastu tant fracas?

S' i t'pío, mi t'craso

Le servèle, gambe, e bras.

S' i t'pio ec.

I son sì con bonna veuja
 D'abassète coul cacat,
 Scardassà, fieul d'una trenja,
 Carn da diao e da piolat.
 Scardassà ec.

Che vision d'mariète
 Rassa d'bòja, mòrt d'fam,
 Spèta adès i t' veui levète
 Coul gatij galup infam.
 Spèta adès ec.

Desdèntà, mostas da bronsa,
 Còsa veustu rasonè?
 I t'pèise gnanch un onsa
 Pòver gnèro mòrt an pè.
 I t'pèise ec.


Sù loli son atacasse
 Pr coi dèss o dodèss brin,
 Tuti doi son arvoitasse
 Ch'a smiavo giust doi crin.
 Tuti doi ec.

Sò gioijn s'è desviasse
 An sentiènd tut cost armor,
 Dunna dunna s'è levasse
 Pr sciairè ampò i seu sfojor.
 Dunna dunna ec.

S'è butasse dlòng a rie
 Ch'a savia la rason,
 Ch'a fasio ste folie,
 E contèise da tomon.
 Ch'a fasio ec.

A l'è subit staita lèsta
 A piè 'l vas da sout al lèt,
 L'ha largailo su la tèsta
 Spas e rair tut bin confèt.
 L'ha largailo ec.

Costi gonso son sèntisse
 Così bin ambalsemà,
 Sì ch' d' sì ch' a son spartisse
 Sènsa gnanca pi fè fià.
 Sì ch' d' sì ec.



Delle qualità delle Donne.

CANZONE XVIII.

Chi sta amis con le fumèle
 N'avrà mai sò cheur contènt,
 A son tute tante vèle
 Ch' a van sècondand ij vènt.
 Sève nèn ch' a son d' volpasse,
 E d' serpènt stermà ant ij fior?
 I starì sèmpre ant le strasse
 An fertandve ansèm a lor.
 Gioventù, chitè le scufie,
 D' autramènt a v' costrà car;
 Sève nèn ch' a son d' bernufie.
 Incostante pi ch' 'l mar?
 Piève guarda ch' a son d' lanne
 D' un umor malign e triste,
 A son giust gate morbanne,
 Ch' anganriò l' Anticrist.
 Pr tirève a favurié,
 A san dève d' bombonat,
 Pr darè peui s' buto a rié,
 Prchè a v' han ant ij garat.

La pi part son sospetose
 A tal sègn, ch'a s'fido d'gnun,
 Son tant farde, e malissiose,
 Ch'a l'è mèi a stène giun.
 Dio guarda sol ch' ai passa
 Una mosca dnans al nas,
 Dlongh ai veulo dè la cassa;
 E ciapèla pr 'l pnas.
 Ai na jè ch'a l'han d'idèe
 Stravagante ant 'l servèl,
 Pènso d'esse tante dèe
 Calà giù dal' ultim cièl.
 Squasi tute son svergnose
 Piènne d'fum e d'ambission,
 Finna coule ch' a son pi scrose
 Tant a s' veulo tni d' an bon.
 La soa pompa a veulo fèla
 Tutti costi brlicat,
 S' a dovèisso bin paghèla
 Con dij bèi e bon crosat.
 Quand a s' buto sauté an zara,
 Van an bèstia ch'a fan por,
 Un canon quand a despara
 Fa pa tant fracas com lor.
 A san fè le savurie
 Quand a pòrta l'ocasion,
 L'è pr esse rivèrie
 Dai codògn, e dai tomon.
 A son fière e sostenue
 Pi ch' la mare del folat,
 Son nojose e brbotue,
 E bisare com d' mulat.
 Lor a rio, e lor a pìoro
 Quand ai par, e quand ai pias,

Ma s'a s'buto a fève 'l moro,
 Lo san fèlo longh un ras.
 S'a comènso piève an ira,
 E guardève pr travèrs,
 A san piève tant d'mira,
 Ch'a fan tut pr vedve pèrs.
 J'è pa forma d'apasièje
 Quand a son sul caval mat,
 Tant le giovo com le vèje
 L'han la tèsta piènna d'rat.
 Gara avèje quaich contèisa
 Con sti umor fait a feston,
 Già l'è ròba bèla antèisa
 L'han tavòta lor rason.
 Quante sufisticarie
 L'han le done d'ogidi,
 Tant le fomne com le fie
 Tute l'han l'umor così.
 Ste lecòire da bardèle
 Son le mare dij ciacòt,
 Veulo fè le santarèle,
 E son pès ch'ij diaolòt.
 Quand a s'buto con d'ingiurie
 A sgonfièsse coul gavas,
 A fan pès ch'a fan le furie
 Quand a rompo sò cadnas.
 J'avri fait pr caparèje
 Tut lò ch'maï j'avì podù,
 Ma s'i vènne ampò a truchèje,
 Tut vòst mèrit l'è prdù.
 Veulo fè le dottorèle,
 E spuè la dècision,
 Ma le cosse moscatèle
 L'han un sugh pa vaire bon.

Còsa mai podraïne dive
 Dla curiosità ch' a l' han ?
 Mi la peus pa nèn dèscribe
 Quand i stèiss fin a doman.
 Pr dla ciancia, e dla babia
 Ai na j'è pa mai mancà ;
 Una dona ampoch ardia
 Con doi oche fa un marcà.
 A son brave conterlòire,
 Prchè l' han dij bon salsat,
 J'è pa gnuinne mei tesòire.
 Pr tajè bin i colat.
 Vènta dèje peui la drita
 Quand a s' trata d' critichè,
 Coula lì va gnanca dita,
 Lor son mèistre ant coul mestè.
 A venran con bèla rusa
 Prometend pi carn ch' pan,
 Ma ste nèn a coula fusa,
 Ch' a san bate e virè man.
 S' i volè lodèje i peule,
 Ch' a l' han peui sta còsa d' bon:
 Confidèje lo ch' i veule,
 Son sègrète com 'l tron.
 A l'è brut quand a s' unisso
 Contra d' un a fè consèi,
 L'è sigur ch' ai descutisso
 Tuti ij grop dant ij cavèi.
 Crème mi, Descarognive,
 E marcèje nèn après,
 A j'è meud a divèrtive
 Sènsa andè a tachève al pès.



Sopra le Nuore, e le Madonne.

CANZONE XIX.

Di un pòch voi aitre nòne
 Rupie fin sul nas,
 Tra Nore, e tra Madone
 S'a jè mai stait la pas:
 Di franch, e nèn da farde,
 Virè pà, la frità,
 Ch'i passe pr busiarde
 S'i nèghe sta vrità.
 Ma pur pr nèn butève
 An tanta confusion,
 I veui nèn oblighève
 A descurvì ij pation;
 Stè mach pr testimòni,
 Lassème a mi l'impègn,
 Peui di ch'i son un tònì
 S'i bato pa ant 'l sègn.
 Coi dontrè di dle nòsse
 A fa pto ancor tèmp bèl
 Pr le facènde gròsse
 Ch'a l'han da dè ciadèl;
 Passà ch'a l'è la fèsta,
 I somo a tèmporai,
 E dlongh a la tèmpèsta
 Dij crussi, lande, e guai,
 A s'buto ste rognasse
 A dèsse sugèssion,
 Stasand marchè le casse

Con tuta aplicassion,
 A stan an sentinèla,
 Comènso piè d' sospèt,
 A s' fan d' eui da crivèla
 Notandse i seu difèt.

A s' guèrno sèmpre a vista
 Su tuti j' andamèut,
 A van fasand la lista
 Tenèndse bin da mènt;
 A s' pio an difidènsa
 Giugandse dij sout man
 Con la bènèvolènsa
 Ch' a j' è tra gat e can.

Se coula Nòra fica
 Sò nas ant quaich afè,
 La vèja subit pica,
 A la fa ste andarè,
 Prchè ch' a l' ha pagura
 Ch' d' vòte maraman
 Ai peussa con dritura
 Levè 'l cassul d' an man.

S' a sta marlait de bada,
 Na forma un bèl concèt,
 Disènd ch' a val pa un vada,
 Mach bonna a tao 'e lèt;
 A passa pr mincionna
 S' a mènna pa 'l salsat,
 E pr na ciaciaronna
 Apènd ampò 'l cacat.

S' a l' ~~ha~~ bonna ganassa,
 A dis ch' a l' è afamà;
 La trata da smorfiasa,
 S' a l' è un tantin dlicà;
 Rèndèndse solitaria,
 A l' è d' umor sarvai,

Surtiand a piè ampò d'aria;
L'è pr scapè 'l travai.

S'a veul fè la sustosa,
A dis ch'a l'è tirà;
Mostrandse pòch curosa,
A l'è dispènsièrà;
La tassa da bigòta
S'a va piè quaich perdon,
E pr na mal devòta
S'a spram nèn i limon.

S'a va con polissia
Tenèndse ampò ardrissà,
Coula Madona pia
A fa la ciabrisà,
Ch'a l'è n' ambissiosonna,
Ch'a val pa un fi forà;
S'a s'lassa andè a la bonna,
Ch'a l'è una gran pondrà.

S'ai ved fè cortèsia
Da l'omo, o dal messè,
La rabia e gelosia
Ai fan gonfiè 'l gosè;
Vedènd peui ch'a la lasse
Marlait a l'abandon,
Tant pi s'a la sbramasse,
Oh! che consolassion.

S'a fèisso bin d' miraco
Le Nòre d'ogidì,
Tant le Madòne ai smaco,
E sèmpre ai treuvo a dì:
Ai veulo pr servènte,
E pr storcion dla ca,
E gnanch a son contènte
Ste tèste sbusicà.

Venènd a restè gròsse,
 S' a tòrso un pòch 'l còl,
 Ai dio ch' a son d' ròsse
 D' un natural tròp mòl;
 S' a vènno mai guastèsse,
 Ai buto su 'l mostas
 Ch' a san pa règolèsse,
 Ch' a son d' bèi ciaudronass.

Quand a comènso avèje
 D' maraje da ciadlè,
 Anlora sì ch' le vèje
 A treuvo da gablè,
 Disènd ch' a son pro brave,
 E bin adutrinà
 Pr anlevè dle crave,
 Ma pa anlevè d' masnà.

Ampò d' armor ch' a fasso
 Quand a son già sgrojà,
 Le vèje s' sganasso
 A fèje d' armangia;
 Vorijne pa ch' a stèisso
 Ficà ant un scatolin,
 E squasi ch' a bogèisso
 Ne pur un di marmlin.

S' ai vedo fé quaich gnògna
 A sauto com cravieui,
 A dio ch' la pussiògna
 L' è lo ch' a guasta i fieui;
 Ch' a vènta pa ampastèje
 D' paròle con d' amèl,
 Ma ch' a l' è mèi crièje
 Tavòta su la pèl.

Le Nòre pòch al viagi
 Van arlevand ij pont,
 Al vede sti meinagi

A buto dco bon front;
 Tra tant 'a s' pio an ira
 Ma con un tal livor,
 Ch' a j' è pi gnun ch' ai vira
 A fèje cambiè umor.

Ai vèn pr confèguènsa,
 Che peui continuamènt
 Scapandie la passiènsa
 A s' van tirand dij dènt,
 Scaudà fin ant le miole,
 Sautà ch' a l' han 'l fòs,
 A s' na destaco d' coule,
 Ch' a van giù fin aj os.

Con tute le comare,
 Con tuti i seu parènt,
 Con tuti i seu compare,
 Amis, e conossènt
 A fan sauté la minna
 Contand le soe rason,
 E sfògo la cagninnia
 Dasènd 'l feu al canon.

Savèisne pur contène
 Pr desgonfiè 'l gavas,
 Pòdeisne pur butène
 An aria d' patàras,
 Lolì sì ch' ai saria
 D' un gran divèrtimènt,
 E squasi ch' i diria,
 Pi d' mèss sò nutrimènt.

Da coste ciòche rote
 Chi veul gavè 'l costrut?
 Quaich vòta fan le bote,
 E s' parlo nèn d' autut,
 E d' vòte a braio d' j ore
 Com d' anime danà,

Ch'a s' pio gust d' fè core
Tut quant 'l vsinà.

A van bin pro quaich fèsta
Pr nèn fè parlè d' lor
A squinternè la tèsta
Ai pòver confessor ;
Cos' ela peu an sostansa
Tuta sta confession ?
Nèn aut ch' un abundansa,
E sfogh d' mormorassion.

A studio mach d' poussèsse
Après ai seu mari ,
S' a peulo scavalchèsse
L' è tut sò gran piàsì
Ai van gonfiand j orie
Con sènt iniquità ,
E veulo ch' soe busie
A passo pr vrità.

Ma costa l' è pi bèla ,
Quand j' oimo ai dan 'l tòrt ,
Ataco una gabèla
Con lor ancor pi fòrt ,
A pisto , e piro d' rabia ,
E fan un rabadan ,
Ch' un ors ficà ant la gabia
Na fa pa n' autrstan.

Ai cario d' impropèri ,
Ai trato da faseui ,
Ai creuvo d' vitupèri ,
Ai veulo gavè j' eui ;
Loli sù ch' ai tarissa ,
Ch' ai fa cambiè color ,
E tant sautè la stissa ,
Ch' a rèsto fòra d' lor.

Ogn' un peul bin comprènde
 Chi n' ha da stène d' mès,
 A son peul le facènde
 Ch' a van da mal an pès:
 La ca va tuta an aria
 Pr sò tirè e scianchè,
 La ròba va an pataria,
 Lolì peul pa manchè.
 A j è d' Madòne tante,
 Ch' pr durmì soave
 A veulo pa d' guarnante,
 Pr tni tut lor sout ciav,
 Pr tant ch' coula Nòra
 S' a veul ch' un tòch d' pan,
 A s' penssa nèn fè anfora
 D' andèje al basaman.
 A s' buto mai a tao
 Nè a sinna, nè a disnè,
 Ch' ò j' une, ò j' aitre gavo
 Quaich landa da rinfnè,
 A veulo ch' la ganassa
 Travaja dopiamènt,
 E costi bon pro fassa
 Tra lor son compimènt.
 Mi i m' buto pa ala preuva
 D' volèje antrè an quèstion
 Da quala banda a s' treuva
 O 'l tòrt, ò la rason;
 Mi m' na veui pa ampacème,
 I son pa così fol,
 Prchè i veui pa tirème
 D' malèdission a còl.
 S' ant j' oimo ai fus giudissi,
 Ma ch' a son tròp bagian,
 Levrio pro i caprissi

A sti servèi tant van ;
 Vèntria con ste strèghe
 Piè un bon baston a pr un ,
 E fèje bin le frèghe
 Ala matin a giun.



Sopra il Giuoco del Seminario.



CANZONE XX.

U na bèla bisaria
 M'è sautà ant la fantasía
 Pr componne sta canson ,
 Sul gran giugh del sèminari ,
 Coul ch' 'l mond pr l'ordinari
 A lo ciamà l'estrassion.
 Vèramènt a l'è da rie
 Vede j' oimo , fieui , e fie ,
 Fomme , Prèive , Monie , e Fra
 Tuti quanti lambichesse
 Sò servèl pr guadagnèsse
 D' gratacui an quantità.
 Tuti fan i gabalista ,
 E dan man a coula lista
 Figurandse d'esse andvin ,
 Tramantrè coi Imprèsari
 Rio tant , ch' a dan an sgari
 An gratandie i seu quattrin.
 Tratenive su le piasse
 Pr sèntì dle rasonasse
 Dle pi lèpide del mond ,

An fasènd ste confèrènsè,
 J'è chi va spuand d'sèntènsè
 Sènsa riva, e sènsa fond.

Antrè drint ant le butèe
 Pr sèntì dle dròle idèe,
 E contèise d'opinion,
 Un a dà pr franch 'l tranta,
 N'autr dis ch'a l'è l'otanta,
 N'autr veul ch' 'l tre fia bon.

Ma pr piève un past'a rie,
 Basta andè con fomne e fie
 Quand a fan convèrsassion,
 Sèntirì con che babia
 Van tratand d'astròlogia,
 E parland d'supèrstission.

A staran dle sinch sès ore
 Tra lor aitre li a descòre
 Pr contè i seu seugn bagian,
 Peui a s'buto intèrprètèje
 Così bin, ch'a s'crdo avèje
 Già 'l guadagn sigur an man.

Unna dis: i son sogname
 L'autra neuit, ch'a m'han portame
 Dle pi bèle fior d'prèsent,
 A yeul di, ch' i son sicura,
 Del fait me na fas gagiura,
 Lo vedrì, tni bin da mènt.

N'autra dis: e mi al contrari,
 J'heu sognà, ch' un imprèsari
 M'ha portà un tascat d' dnè,
 Lolì dis, ch' i son pro lèsta,
 Ch'a m'han già pagà la festa,
 E ch' i m'peus gratè 'l darè.
 N'autra peui ch'è pi sapiènta,
 Dis: mi scondo a l. servènta

I me nòm sout al cussin,
 L'andoman matin mi pronta
 Fas riflès a lo ch'a conta,
 E guadagno bèl e bin.

Coula vèja sauta fòra
 An disènd: i campe all' òra
 Vòstre ciance, e 'l vostr fià,
 Ascòtè, mi veui mostrève
 La manèra pr vagnève
 Dij quattrin a sacocià.

Butè ij nòm a banda snèstra
 Una neuit fòra dla fnèstra.
 Sènsa tnìne gnun ant ca,
 E s' i seugne d'alègrie,
 Giughè pur, ma su d'folie
 Piève guarda, giughè pa.

N' autra dis: oh ste ampò chiète,
 Coste son tute lumète
 Da contè sout al fornèl,
 Son rason da ciaciaronne,
 O ch' i burle, o ch' i mncionne,
 O ch' j avì prdù 'l servèl.

A l'è mèi arcomandèsse
 A quaich'un ch'ha da ambarchèsse,
 E tirè prèst ij caussat,
 Suplichèlo, mòrt ch'a sia,
 A vnì pr cortèsia
 A portève quaich bon biat.

Vènna 'l bsèst a le tomonne!
 Sonne còse da proponne?
 L'è un afè da rompie 'l nas,
 O ciapèje pr j' orie
 An sèntiènd ste gotarie,
 E slonghèjie lunghe un ras.

Ma lassomo ste dotòire ;
 E guardomo ste arvèndioire
 Com' a son afacèndà ,
 L' è un miracò s' una manca
 A portè i seu dnè ala banca,
 Pr nèn tnje dsimpiègà.
 Ortolanne , e ghingajère ,
 E paisanne , e lavandère ,
 E servènte , e servitor ,
 S' a l' avèisso bin a pènna
 Mach sinc sòld , j' è gnunch' ai tèssa ,
 L' han piasì fè rie d' lor.
 A faran giunè la gola ,
 Ma lassè passè una sola
 Estrassion sènsa giughè ,
 L' è un spropòsit a pènsèje ,
 I podrìe massacrèje ,
 Tant e tant j' è nèn da fè.
 Quand a l' han la borsa sbrisa ,
 A vèndrìo la camisa
 Con ij mataras del lèt ,
 Stagn , e bronse , e cassaròle ,
 J paireui , palete , e mòle
 Van , e angagio tut al ghèt.
 I dorin , e le granate ,
 J cotin , faudaj , e ovate
 Ai impègno al mont d' piètà ,
 O ch' a guardo d' fè un' arsorta
 Ai marì d' antorn dla borsa
 Quand a son adormèntà.
 A son tant ancorognie ,
 Ch' a farìo d' mascarìe
 Pr podèje guadagnè ,
 A l' han tant loli ant la tèsta ,

Ch'a farìo andè la rèsta
 Fin a l' ultim doidenè.
 S' i volì amparè a dritura
 La manèra pi sigura,
 E pi fassil d' andvinè;
 Giughè nèn al sèminari,
 E mandèlo a ca dij giari,
 Tni an sacòcia i vostri dnè.



Le astuzie degli Scolari.



CANZONE XXI.

Mi veui un pòch pr rie
 Butème a trastulè
 Contand le furbarie,
 E ruse dij scolè:
 A l' han bin pòch giudissi
 Prchè ch'a son giovnòt,
 Ma peui parland dij vissi,
 A son pro d' bon volpòt.
 Tratandse d' andè a scòla,
 Parland an gènèral,
 Costa marmaja dròla
 Sovèns a l' ha quaich mal,
 Ma quand a l' è vacansa,
 Lassèje fè i corè,
 Anlora 'l mal d' pansa
 J' ampacia pa a demorè.
 S' a vènno a fè quaich fala,
 L' astussia l' è an camin

Pr fè drochè la bala'
 Ados a quaich vsin;
 S'angigno con dritura
 Curvi i seu mancamènt,
 E dèje la tornura
 Pr comparì innossènt.

L'han d'vòte pòca veuja
 D'fè la composission,
 A l'è prchè j'aneuja
 Usè d'aplicassion,
 E pr scapè fatiga,
 A treuvo dlongh 'l mèss,
 Ciuciand da riga an riga
 A coui ch'ai stan d'après.

S'a veulo nèn butèsse
 Studiè le soe lession,
 Fan tuti ij sfors pr fèsse
 Amis dij dècurion,
 A san tant bin sulieje
 Con mile compimènt,
 E bin sovèns shorgnèje
 Ancor con quaich prèssènt.

Quand 'l Magistèr s'treuva,
 A n'ausso pa la vos,
 I lo vedrì pr preuva
 Ch'a tiro tuit del dos;
 S'a vèn virè le spale,
 Lassèje fè 'l balat,
 A sauto com d'cocale,
 Ch'a par ch'ai sia 'l folat.

Quaich fèsta pr dmoressè
 A fan i nègligènt,
 Pr nèn ancomodèssè
 A fè 'l componimènt;
 Peui dio d'ordinari,

Ch' a l' han avu quaich mal,
 O ch' a j' han pià 'l scartari,
 O piùma, o caramal.

Quand pr quaich insolènsa
 Ch' a l' abio d' vòte fait,
 A s' treuvo la consiènsa
 Ambrlifa marlait,
 Anlora a scapo scòla,
 Vedènd d' avèje tòrt,
 O pur con la soa tòla
 A nègo fèrm e fòrt.

Ma quand pr gargarìa
 A van a scòla tard,
 Ai manca pa d' babia
 Pr nèn avèje d' lard,
 A treuvo mile scuse,
 Ch' a l' han avù da tè,
 E con cinquanta ruse
 A san gavèsse j pè.

Quaich vòta li ant la scòla
 A fan i seu scondion
 O d' una marèndòla,
 O d' una colassion,
 A san fè le soe frete
 Con cou ch' ai stan a fianch,
 Fasènd le soe bafrete
 Sègrète sout al banch.

S' a son ficà an dosènna,
 Anlora sti babiòt
 Son aut un fus a pènna,
 Ch' a fan già i seu complòt
 Pr durvì la crdènsa,
 O procurè d' ciapè
 Sout man ant la dispènsa
 Quaicòsa a galupè.

Ma pr nèn impègnème
 A descurviè ij stras,
 I veui nèn inoltrème
 D'andè sgate pi bas,
 Prchè ch'ai na saria
 Da dì pr tut doman,
 E i crad ch' i finiria
 Fòrs gnanch passà doman.



*Un Giovine pentito d' avere sposato
 una Vecchia per interesse.*



CANZONE XXII.

Che brutta vèja ch' i son cariaime
 Pr coul lecat dij seu quattrin,
 Prchè ch' i m'era figurame
 D' sotrèla l' andoman matin;
 Ma l' è goregna com na legna,
 E veul ancor nèn tramudè,
 Oh la vèja, la pèst a la vèja,
 E quand vorala mai crpè.
 A son dèsa gn ch' j'eu fait sta sotisa,
 Ch' a m' costa mile pèntimènt,
 Mi la vedìa tuta grisa
 Con sènt rupiasse, e sènsa dènt,
 Così i pènsava
 Ch' a fussa brava,
 E ch' a volèissa prèst petè.
 Oh la vèja ec.

A tramolava com' una feuja ,
 L' era pi' giauna d' un luvion ;
 L' è lò ch' a m' fèr vni la veuja
 A sposè dunna coul trombon ;
 Mi la crdia
 Già an angonia :
 Oh si ch' a m' ha savù trapè.
 Oh la vèja ec.

Ventava vedla com' a tranfiava ,
 L' era pi' gonfia d' un babias ,
 Sèmpre a gemia , e sospirava ,
 Com s' a fus staita a l' ultim pas ,
 S' peul dì ch' a l' era
 Giunai sout tèra ,
 Ch' a penna stava drita an pè.
 Oh la vèja ec.

S' un pcit buf d' òra l' avèis tocala ,
 A la campava a gambe lvà ,
 Lingèra com' una cocala ,
 L' avia quasi nèn ch' 'l fià ,
 Ma peui s' è arpiasse ,
 S' è arviscolasse
 Fra pochi dì coul vitupè.
 Oh la vèja ec.

Mi v' assiguro , ch' i la tnia-
 Ch' a fus pi' marsa d' un bolè ,
 E pur a l' è na maravia ,
 La qual a m' fa trasicolè ,
 Vedènd ch' a dura
 Pr' mia svèntura
 Pi d' lo ch' i m' son podù aspetè.
 Oh la vèja ec.

Una tossassa la tormèntava
 Tuta la nuit , e tut 'l dì ,
 Continuamènt a s' lamèntava ,

Disènd ch'a na podia pi,
 A l'è un miraco
 Potèr de baco!
 Ch'a l'abia tant podù rablè.
 Oh la vèja ec.

Pi non mangiava, pi non durmìa,
 A l'era sènsa carn adòs,
 Pr mi seu nèn com'a vivia,
 Avènd pi nèn ch'la pèl, e j'os;
 Ma da gramassa
 L'è restà grassa
 Com'una cagna d'un tripè.
 Oh la vèja ec.

A s'lamentava del stòmi, e tèsta,
 Spuava sangh ogni momènt,
 Andava gnanch a messa d'fèsta,
 Prchè ai vnìa d'assidènt;
 Ma antant a trènna
 Pr fème pènna,
 E dème ancor da scapinè.
 Oh la vèja ec.

Una friveta ficà ant le còste
 A l'anlasta consumand,
 A sèen ch'andava pr le pòste
 Anvèr la fòssa camiaand;
 Ma peui pèntia
 D'fè sta folia,
 L'ha ampò pensà d'tornè andarè.
 Oh la vèja ec.

Pr tuta quanta la soa vita
 L'avìa sèmpre quaich dolor,
 Slongand 'l còl com'una pita,
 Criava ch'la fasia por;
 Ma pr magia
 Mi crad ch'a sia

Sigur savusse arviscolè.

Oh la vèja ec.

La prima vòta ch' i l' hai vedula

I son resta maravios,

Pr mi l' avria mai crdula

Apassionà d' avèje un spos,

Oh che pèl finna,

E malandrinna,

L' ha bin savù fè so mestè.

Oh la vèja ec.

Vèntava vede col brut potagi

E dura e rèidia com' un pal,

E pr di mèi tut ant un viaggi,

L' era un complès d' un ospidal;

Or voi dirie,

Ch' a son busie

Tut lo ch' i v' hai savù contè.

Oh la vèja ec.

L' istèssa sèira del matrimòni

L' ha vojù fè so testamènt,

Ma mi fin or son un bèl Tòni,

E stagh ancor a tni da mént

Con impassiènsa

D' fè accogliènsa

A çoula ròba, e coi seu dnè.

Oh la vèja ec.

Pr mi l' avria pa mai sposala,

I n' era pa così tomon,

Nò nò i fasia pa sta fala

S' a m' avèiss nèn fait donassion,

Ma còsa ampòrta?

Dnans ch' a sia mòrta

A peul ancor vedme a setrè.

Oh la vèja ec.

I m'figurava con coule greuje,
 Ch'costa vèja m'ha lassà,
 D'levème tute le mie veuje
 Subit ch'a fussa trapassà:
 Con tanta dòta,
 Quaich sèrbindta
 J'avria pro savù trovè.
 Oh la vèja ec.

Ma lo ch'a m'fa pi pènna, e m'inchièta,
 A l'è ch'i son burlà da tuit,
 La gènt na fan una burlèta,
 Disènd ch'i n'hai pa 'ncor j'euì suit.
 Oh che cagninna,
 Che bruta flinna,
 Ch'a m'fan continuamènt sauté.
 Oh la vèja ec.

Voi altri giovo, ch'i veule piève
 Quaich vèja mach pr l'interès,
 Piève bin guarda, e consultève
 Prima ch'i daghe ant cost ecès:
 S'i sè nèn sèmpi,
 Piè tuit esèmpi
 Da mi ch'i m'son lassà gabè.
 Oh le vèje, la pèst a le vèje,
 Ch'a veulo mai furnì d'crpè.



Il Ruotatore.

CANZONE XXIII.

PRIMA PARTE

Sa sa chi ciama l'amolaire
 Ch vèn da Paris,
 I son tornà ch' a l'è pa d'vair
 Ant cost paijs:
 S'i veule un bon ciaramolat,
 Quandbin quaich vòta i stramba,
 Con tut loli son un omnat
 Ch'i seu 'l mestè sout gamba.
 S' i crde nèn fè ampò la preuva
 S' i sai molè;
 Portè d' framènta e frusta e neuva,
 E ste ossèrvè
 Com' i fareu la punta e 'l tai,
 Ch' i veui ch' i v' maraviè,
 Voi i dirè ch' i n' avì mai
 Vedu cose parìe.
 Stupive nèn quandbin i sia
 Ampò baleus,
 S' ai fus un' uja, i la trovria
 An mèd dle preus,
 A m' han mostrà un preservativ,
 Ch' a l'è 'l gius d' l' uva pista,
 A l'è un armèdi pa cativ
 Pr conservè la vista.

J' heu virojà tuta la Fransa ,
 E 'l Dofinè ,
 J' heu spèis mangiand a crpa pansa
 Tuti i me dnè ,
 E pur i vivo alègramènt ,
 Pichè con la mia mòla
 I vad vagnandme con poch stènt
 Sovèns quaich parpajòla.
 J' heu una còsa ch' a m' molèsta ,
 Ch' a l' è sta smèns ,
 Ch' j heu ant la camisa , e su la tèsta ,
 Ch' a m' mòrd sovèns ,
 A van dasandme quaich tnajà
 Sta rassa malandrinna
 Ampò pr dnans , ampò da là ,
 Ampò giù pr la schinna.
 S' j heu bin la borsa ampò lingèra ,
 Cos' è loli ?
 Tant a j' è gnun su costa tèra
 Pi alèghèr d' mi ,
 Prchè ch' i m' seu pro desgagè
 Con la mia brava mòla
 Pr guadagnème da mangè ,
 E andè fasand quaich giòla.

CANZONE XXIV.

SECONDA PARTE

A l' foulat malinconia ,
 E chi sta a covèla an sèn ,
 Chi veul d' crussi , ch' a s' j pia ,
 Ch' mi na veui savèje d' nèn ,
 Chi veul d' crussi ch' a s' j pia ,
 Ch' mi na veui savèje d' nen.

Cheur giojos 'l Cièl l'agiuta,
 L'è un provèrbi bin antich,
 Sta rason, chi la disputa,
 L'è una tèsta d' arabich.
 Sta rason ec.

Ste vivènd a la vèntura
 A l'è 'l stat 'l pi giocond,
 Chi del mond pi pòch a s' cura,
 L'è patron d' tut 'l mond.
 Chi del mond ec.



Il Testamento di Giacomo Tros.

CANZONE XXV.

Che lurdison ch'a m' ciapa
 E pr tuta la vita
 I m' sènto una tal sfita
 Ch'a par ch'a m' ranca 'l cheur,
 Ch'a par ch'a m' ranca 'l cheur,
 A m' vèn tante caudanne,
 Ch'a m' fan tirè d' pavanne,
 Ohimi pòvr om ch' i meuir,
 Ohimi pòvr om ch' i meuir.
 Marcè marcè ampò dunna,
 E piève tanta pènna,
 Ciamè un Nodar ch'a venna
 Ch' i veui fè testamènt; 2
 Tra tant pr cortèsia
 Portè ampò d' malvasia
 A cost pòvr languènt. 2

S' i meuiro , j' arcomando
 Ch' a m' sotro ant una cròta ,
 Dont ai sia tavòta
 Dij bon botai pièn d' vin; 2
 Li sènsa ambalsemème ,
 L' è dont i peus guarnème
 Sènt agn , e gnanch piè fin. 2.
 Fème sonè pr ciòche
 An tute j' ostarie
 Bocai , pinte , e botie ,
 Ma fèje sonè fòrt: 2
 Sèntiènd ste sarabande ,
 Le gènt da tute bande
 A savran dlongh chi è mòrt. 2
 Dij pè vèrs la muraja
 I veui ch' me còrp a rèsta ,
 Butandme con la tèsta
 A mira del pongat 2
 Pr gòde coula bagna
 Quand 'l botal a dagna ,
 Ma ch' ai sia gnun concat. 2
 Pr tòrce , e pr candèile
 Portème sinchsènt sanne
 Tra grande , peite , e msanne
 Piènne d' bon vin d' nebieul , 2
 Almanch sta luminaria
 A tam nè 'l vènt nè l' aria ,
 Ch' a sofia fin ch' a veul. 2
 Vestime peui coul camus
 Sterinà ant la guardaròba ,
 Ch' a m' fassa pa una bòba
 Ant cost ultim onor; 2
 I l' heu mai pi gavalò
 Dal di ch' i l' hai catalò
 Da Nicolà 'l brindor. 2

Cogème drint a un arbi
 Ch'a m' servirà pr cassia,
 Ma fait con bonna grassia,
 E ch'a sia bin vinà, 2
 E pr cussin butème
 Me car barlat, e fème
 Ste su bin arlevà. 2

Gropème le man gionte
 D' antorn a na boracia
 Con soa bonna cracia,
 E piènna d' breu d' autin; 2
 E an tèsta una gran bota
 Tajandìe 'l fond da sota,
 Ch'a m' scusa pr bartin. 2

Notè bin lo ch' i v' dio:
 La mia carcassa mòrta
 Sèns' autr i veui ch' a s' pòrta
 Da dodès botalè, 2
 Con una cuvertassa
 Ambriacà d' vinassa
 Ch' ai pènda fin sui pè. 2

I veui pr compagnème
 Dosènt brindor an gala
 Con la soa brinda an spala,
 E so pongon an man, 2
 E sènt brónson pr banda,
 Ma tuti bin d' olanda,
 E cioch tant ch' a podran. 2

Après a lor ch' a vènno
 Con le piorasse an vista
 E j osto, e j' obèrgista
 Ch' a son ant cost paijs, 2
 Piorand la soa svèntura,
 Vedènd, ch' an sèpoltura
 Ai va 'l so mèi amis. 2

E pr pi bèla pompa ,
 A vènta ancor ch' ai sia
 A fème compania
 La guardia dij todasch 2
 A la viron dla bèra
 Con soa bandrojèra ,
 E so picè d' vin frasch. 2
 Ai quatr canton ch' ai sia
 A tñime la cuvèrta
 Doi paira dij pi a lèrta ,
 E mèi marcant da vin , 2
 Vestì tuti da fèsta
 Portand un oiro an tèsta
 Durand tut 'l camin. 2
 Fème marcè a la tèsta
 Un timbaliè ch' a sonna ,
 Ch' a bata , e ch' a frdonna
 Su doe gran barai 2
 An mèa a doi trombetta
 Ch' a toco quaich arieta
 Con d' ponghe da botai. 2
 Peui fème con bèl ordin
 Trènè darè dle spale
 Quarant' e sès hotale ,
 Ch' a son i me canon, 2
 Tute con la valdrapa
 Bin ansupà ant la rapa ,
 Ch' a vado giù a rablon. 2
 Pr strà mi veui ch' a m' canto
 A tuta gran ganassa ,
 Massimamènt an piassa
 Coula bèla canson , 2
 La qual noi i cantavo
 Quand i stasio a tavo
 A fè voghè 'l pinton. 2

Passand dnans aj ansegne,
 I veui arcordève,
 Ch' i staghe ampò a fermève
 Fin ch' l' Osta vènnà a l' us 2
 Con una gran burnia
 Del mèi vin bianch ch' ai sia
 A dèrne dontrè sprus. 2
 Passà la quarantènnà,
 Cost' incombènsa i lasso
 Ai me compagn, ch' a m' fasso
 Marlait d' un funèral 2
 An mèi d' una cantinna,
 Cantand la brtolinna
 D' antorn al mèi botal. 2
 Al di d' me aniversari,
 Fin tant ch' 'l mond a dura,
 Su la mia sèpoltura
 Ch' a m' vèrso un baril d' vin: 2
 Lolí pr mia gran glòria,
 A servirà d' memòria
 Ch' i ciupinava bin. 2
 An tute j' ostarie.
 A m' vèn la fantasía,
 Ch' i veui ch' me nòm ai sia
 Ansèm al me ritrat: 2
 Ai na sarà pi d' quindès,
 Ch' al vedme a m' faran un brindès
 Ciapà ch' a l' abio'l rat. 2
 Mia cariga i l' armeto
 A Brtromè Bronsògna,
 Ch' a s' fa l' onor ch' a bsògna
 Tratandse pr cimpè: 2
 Tra tuit ij me camrada
 Ch' a son ant la brigada,
 Je gnun ch' ai tènnà pè. 2
 E

L' univèrsal erède
 Sarà la mia crica
 Pr l' amicissia antica,
 L' è 'l manch ch' i peussa fè, 2
 Con pat, ch' an compania
 Tut sauta a l' ostaría
 Fin ch' ai sarà un doidnè. 2
 Ch' a m' scrivo ansima un marmo
 Cost epitafi an stampa:
 L' è sì slongà ant la tampa
 Coul pòvr Giaco Tros, 2
 Prchè ch' una sol vòta,
 An leu d' andè giù an cròta,
 Andèr a bèive al pos. 2
 Piè tuit da mi l' esèmpi
 A bèive mai nèn d' eva,
 Prchè l' è ròba grèva,
 Ch' a fa marsè 'l pansat, 2
 Mandèla a la malora,
 S' i veule nèn ancora
 Tirè vostr ultim pat. 2'



*Lamenti di due Serve contro le loro
 Padrone.*



CANZONE XXVI.

Bondì Margòt com vala,
 Vahimi ch' i t' sès splufria,
 Vahimi ch' i t' sès splufria,
 I t' smie giust surtia.

Ancheui dal lasarat
 Dal lasarat,
 T'has peui cativa cèra,
 T'sès del color dla tèra,
 E tra 'l color dij pat,
 Color dij pat.

O cara mia Slufrinna,
 E com mai veustu ch'j abia 2
 Fra tanta bile e rabia
 Color e sanità,
 E sanità?
 T'sas bin ch'j heu una padronna
 Ch'a l'è la pi stangonna
 Ch'ai sia ant la sità,
 Ant la sità.

Oh! tas ampò bagianna,
 Lasme parlè dla mia, 2
 Ch'a j'è nèn la parìa
 Lontan da cost paijs,
 Da cost paijs:
 Coula è una scaramana,
 Ch'a m'fa mangè pr manà
 I trous, e j'oeuv covis,
 E j'oeuv covis.

E 'l pan mufi ch' mi mangio,
 Peu ancor con 'mesura, 2
 E con la crosta dura,
 Ch'ij can lo veulo gnanch,
 Lo veulo gnanch,
 Lolì sì ch'a m'fa arionda,
 Ch' i rèstò sènsa sponda
 Pr tni ij cotin sui fianch,
 Cotin sui fianch.

La mia veul ch' i fassa
 La mnèstra e la pitansa, 2

Con pat però ch' j' avansa
 La sal, e 'l condiment,
 E 'l condiment :
 Pr vive dla manèra,
 I peus andè a quaich fèra
 Pi prèst a vènde ij dènt,
 A vènde ij dènt.

A l' è pòch manch dla mia,
 Ch' a l' è da rair ch' a m' passa 2
 O bur, o lard, o grassa
 Pr fè quaich potagiat,
 Quaich potagiat,
 Disènd, ch' l' oitum a guasta,
 E ch' 'l breu sol a basta
 Pr tuit ij meinagiat,
 J mèinagiat.

J' heu bèl fè economia,
 Tant a m' armogna ancora, 2
 Ch' i veui butè an malora
 E d' ram', e d' rèis la ca :
 E d' rèis la ca :
 S' a m' sauta un di la venja,
 Mi pianto lì sta pleuja
 Com' un bach al marcà,
 Bach al marcà.

Sta tigna a m' fa tavòta
 Mach bèive d' vin d' lambrosca, 2
 Ch' a l' è nè asil, nè posca,
 Gnanch bon a lavè i pè,
 A lavè i pè :
 Peu ancora ch' a m' na dèissa
 Pr past tant ch' i podèissa
 Levème almanch la sè,
 Almanch la sè,

Pènsrastu fors ch' mi bèivà
 D' vin grèch, o d' malvasia? 2
 S' i t' veule ch' i t' la dia,
 A m' fa bèive al lapat,
 Bèive al lapat;
 E quand la lunna è bonna,
 Anlora st' avaronna
 A m' dà lo del concat,
 Lo del concat.

Ma scota s' a s' peul dèsse
 Una pi gran tignassa, 2
 A veul ch' una ramassa
 Dura neuv, o dè agn,
 Neuv o dè agn,
 Pr chila j' opèrari
 A peulo andè pr giari,
 S' a spèto un dnè d' guadagn,
 Un dnè d' guadagn.

E mi ch' ogn' an a m' passa,
 (Scota sta si ch' è bèla) 2
 Tre sòld pr d' rasparèla,
 E sès ambòste d' bran,
 Ambòste d' bran,
 E veul ch' j' piat a luso,
 Le siète, e tond brluso
 Dal prim a l' ultim pian,
 A l' ultim pian.

S' i vènno a ròmpe un asi,
 Gara al me pòch salari, 2
 A n' a da portè 'l cari,
 A j' è pa remission,
 Pa remission,
 S' a fus bin ch' una ghnìa
 E strusa, e già scrussia,

Tut va pagà pr bon,

Pagà pr bon.

E mi versand quaich gossa
O d'euli, o d'vin, o d'bagna, 2

A cria pi ch' la cagna,

Quand ai vèn d'forestè,

Vèn d'forestè,

Aussand coula ganassa,

A s' fa sènti d'an piassa,

Ohimi che brut mestè,

Che brut mestè!

A l'è fèrià ch' i fassa

Giamai un tòch d' marènda, 2

E vènta ch' i desprènda

A fè dcò colassion,

Dcò colassion:

Figurte ampò s' a vènta

Ch' a pòch a pòch i dvènta

Grassa com' un piston,

Com' un piston.

Mil' è un gran di, ch' a m' conta

Tuti i bocon an boca, 2

Oh! lolì sí ch' a m' cioca,

E con tuta rason,

Tuta rason;

Anlora mi sbatría

Pr rabià e bisarìa

Tut quant ant un canton,

Ant un canton.

A j' è pa mai gnun privo

Ch' a m' lassa ampò na vòta 2

Andè giù sola an cròta,

Ma con quaich sòrt d' ambreui,

Quaich sòrt d' ambreui,

D' un fieul, o d' una fia,

Ch' a son d' rascassarla,
 Ch' a m' guèrno a vista d' oeui,
 A vista d' eni.
 Pr mi lo peus giurèlo
 Sènsa parlè con finta, 2
 Da peui ch' i son li drinta,
 Ch' j' heu mai fait un bon past,
 Fait un bon past;
 Ansi a m' fa fè una vita,
 Ch' i stanto tnime drita
 Portand e 'l cari, e 'l bast,
 E 'l cari, e 'l bast.
 S' ai vèn quaicun a vedme,
 L'è subit sospetosa; 2
 A m' fa una cèra afrosa,
 Ch' a s' peul pa disse d' pi,
 Pa disse d' pi,
 Prchè l' ha sparm ch' i pia
 Quaicòsa pr dè via,
 Quand ai n' è gnanch pr mi,
 N' è gnanch pr mi.
 S' i vad scusè quaicòsa,
 Povrina mi, Dio guarda! 2
 S' a s' dà marlait ch' i tarda,
 A m' smon finna d' barà,
 Finna d' barà;
 E scota gnunne scuse,
 Disènd ch' a son mach d' ruse
 Ch' i vad studiand pr strà,
 Studiand pr strà.
 Mi m' treuvo tant sogèta
 Con coula mèsa tèsta, 2
 Ch' a m' lassa gnanca d' fèsta
 Surti marlait a spas,
 Marlait a spas:

Son pès ch' un sciav d' galèra,
 Pènsa ampò d' che manèra
 A m' fa rusiè 'l cadnas,
 Rusiè 'l cadnas.

Mi son sèmpre bacioca
 Talmènt com' a m' sèquèstra, 2
 S' a m' vad mach a la fnèstra,
 I somo a tartre e guai,
 A tartre e guai:
 L' è pa pr tema ch' l' aria
 A m' peussa esse contraria,
 Lolì n' j fa pa sgiai,
 N' j fa pa sgiai.

La mia msura chila
 E 'l gran, e la frsaja, 2
 A l' è bin esse tnaja
 Pr nèn paghè quaicun,
 Paghè quaicun,
 O fòrsi pr pagura
 D' esse angana dla msura,
 Frchè ch' a s' fida d' gnun,
 Ch' a s' fida d' gnun.

A lo fa pa la mia
 Ch' a l' ha gnumne cassinne, 2
 A cata a bèle minne
 Coul gran ch' è pi rancian,
 Ch' è pi rancian,
 A tira al pi bon prèssi
 Pr spèndè pòchi bèssi,
 E fè ch' i mangio pian,
 Ch' i mangio pian.

Ciamand 'l me salari,
 Oh che brutta gabèla, 2
 O pr di mèi ratèla,
 A m' sèrca 'l pèil ant l' euv. 3

'L pèil ant l' euv;
 S' ataca a sènto ronse,
 Prchè tratandse d' monse,
 A j'è pa vaire d'neuv,
 Pa vaire d'neuv.

Mi ch' a m' dovria dème
 Ogn' an una camisa, 2
 Prchè ch' a m' l' ha promisa,
 Ansèm a doi faudai,
 A doi faudai,
 Ma j' heu ancor por ch' a m' daga
 Nè lòn, nè gnanch la paga,
 E ch' i saroma a guai,
 Saromo a guai.

Ma s' i volèis descòre
 A m' manca pa d' matèria 2
 Dla pi massissa, e sèria
 Da di sui seu andamènt,
 Sui seu andamènt:
 Basta: i veui pa butème
 An andi pr scaudème
 Su cost ressitamènt,
 Rèssitamènt.

I na seu pro quaicunna
 Dco mi dla miapatronna, 2
 E pur a fè la spionna
 I peus mi stène d' mès,
 Mi stène d' mès;
 Ma 'l servitor na conta,
 Disènd ch' la rabia ai monta
 Giumai d' andèje après,
 D' andèje après.

Quand 'l padron è fòra,
 Anlora i seu comparè 2
 A vènno con d' comare

E 2

Ansèm a d'aitri amis ;
 A d'aitri amis ,
 E peui sarà ant quaich stansa ,
 A mangio a crpa pansa ,
 E mi m' leco ij barbis ,
 Leco ij barbis.

○ via là mi t'lasso ,
 Margòt fame coragi , 2
 Arvedse un autr viagi ,
 I m'peus papi fermè ,
 Papi fermè :
 Tra tant i son ant coula
 Ch'i veui dè un caus a l'ola
 Pr nèn ste li a crpè ,
 Ste li a crpè.

Pr mi n'j stagh pi gnanca ,
 Ch'a l'è dautut tröp cròja , 2
 I veui mandèla al bòja
 Con sò bèl umorat ,
 Bèl umorat ;
 E tute ste patronne
 Son triste , e sfondradonne ,
 Ch'a vado ampò al folat ,
 Ampò al folat.



*Sfogo lamentevole di Gervasio abbandonato
dalla sua Biasina.*

CANZONE XXVII.

Che sfortunassa maladèta
Ch'a m'fa giamai virè 'l servel,
I n'eu pi nèn un'ora chièta,
A l'è una ròba da cotèl.
Coula Biasinna tant crudèla
A l'è la causa del me mal,
(Oh ch'a m'vèn caud a nominèla,)
A m'stima giust com'un stival.
A l'è bin esse bandaròla,
A l'ha cambià talmènt d'umor,
Disènd pr tut (ela pa dròla?)
Mach'a buchème ch'i fas por?
Ch'i son restà pès ch'un morbèri,
Ch'i son tant spòrch, e tant maunat,
Ch'i fairo pi ch'un simitèri,
Ch'ij son drocà giù dij garat.
Pur minca poch i m'sguro, e m'lavo,
I stagh pa manch ant un condut,
E smijlo pa ch'i sia 'l diao,
A m'par ch'i son pa gnanch tant brut.
Mi fin adès j'era soa giòja,
So rancacheur, e tut l'eui drit,
Adès a m'buca com'un bòja,
E giubilria a vedme frit.
Finor a smiava ch'a m'volèissa
Una binassa da sciatè,

Adès quandbin i l'andorèissa,
 A m'dis ch' i vada ampò a ratè.
 Da peui ch' ai va coul Giaco Stòrta,
 A s'è lassasse caparè,
 Butandme mi darè dla pòrta
 Con un bèl pòr piantà darè.
 L'è tuta li mach con so Giaco,
 Ch'a l'ha un tratè da mamaluch,
 E mi, quandbin i fèis d'miraco,
 Tant vènta stèmne astà s'un such.
 I digh'a ti turca infèdèla,
 Mi ch'j heu chità mach pr to amor
 Lùgrèssia, Giulia, e Gabrièla,
 Adès i n'hai nè ti, nè lor.
 Costa è la paga, o cheur d'pèra
 D'nèn pi volèje fème almanch
 Una mè's onsa d'bonna cèra,
 Ansì t'm'garde papì gnanch?
 Mi seu pi nèn dont mai virème
 Tant com' i rèsto bèl e fòl,
 I son rëntà d'andè a nième,
 O d'atachème un las al còl.
 Còsa n'avrastu smorfionassa
 Quand tò Gèrvas a sarà mòrt?
 Sarastu fòrsi peui pi grassa?
 Chi tra noi doi avrà peui tort?
 Chi m'avèiss dit ch'una Biasinna
 Avèiss avù così un cheur fard,
 E ch'a m'avèis virà la schinna,
 J'avria daje del busiard.
 Pr mi seu nèn s'a t'ha anmascate,
 O s'i t'has pèrs i sèntimènt:
 Com valo mai ch' i t'sès lassate
 Ancarogni tant fassilmènt?

Veustu peui nèn ch' 'l mond descora?

Sastu la gènt còsa diran?

A ti, ch' i t' sès na traditora,

A mi, ch' i son un barbagian.

Coul me rival, s' i vènno a pièlo,

A sèntirà s' i son codògn,

Si sì, ch' i veui acomodèlo

Ant un fojòt com' a fa bsògn.

Lo stareu vaitè ch' a vènna

Un dì pr là ant ij me faseui,

I t' assigur, ch' a m' dà pa pènna

D' feje surtì i buèi pr j' eui.

I t' sès pa ancor dont i t' figure,

I m' savreu bin tant argirè,

Ch' i t' fareu piè d' aitre msure,

E fètlo ancora sospirè.

Ma giura Non e la Volvèra,

S' a fus almanch un bon partì,

T' sarie ancor an quaich manèra

Tra sout e dsour da comparì.

Ma piè una rova tant descaussa,

E abandonè così Gèrvas,

Giust com s' i fus monèa faussa,

L' è lo ch' i peus pa dèmne pas.

Cost è un afront! cos' haine fate?

Ma dimlo ampòch lì tut ariond,

I t' heu pa gnanca galufrate

La toa pitansa da sul tond.

Mia Nòna m' ha sèmpre avertime

D' lassè 'l fumlam ch' a l' era mèi,

Prchè m' avrio mach tradime,

L' è bèl avans bin pur trop vèi.

Ma i yeui giughè tre lire d' toma

Ch' ai vnirà un dì ch' i t' me sercras,

E mi t' voltreu 'l pi bèl d' Roma,

Così to dan peui si t' gratras.



*Dialogo tra due Fratelli, uno de' quali
non vuol travagliare.*




CANZONE XXVIII.

O via sbrighite Gian Matè,
Vastu ancor nèn a travajè,
Astu fors l'sparm addòs
Ch' la fatiga t' rompa j' òs?
Astu fors l'sparm addòs
Ch' la fatiga t' rompa j' os?
Còsa tènstu parlà d' guai
Tut 'l dì con to travai?
Smijlo pa ch' i sia vèndù
Pr la pèl, e pr 'l mnu!
I lo sai ch' a l' è già un pès,
Ch' i t' sès un gargas e mès,
I t' vorie mach fè 'l signor,
E ch' ai fus pa un dì d' lavor.
Sènti un pòch che tajalargh,
Dislo pa ch' i son un gargh!
Fa pa tant 'l ciaciaron,
Ti ch' i t' sès 'l prim poltron.
T' has rason brut ceca poi,
Tira' l bòc, ch' è to da doi,
I t' sès pro dij pi spèdiènt
Pr fè travajè i teu dènt.
I t' me rompe già ij garat
Pr cantètlo cìair e nat,
A m' vèn già la stissa al nas,
Lasme ste, furnisla, e tas.

I sai-pro to 'sèntimènt ,
 Ch'a l' è d' vive a tradimènt ,
 Aine mi da fè 'l fachin
 Pr mantnì to bèl bochin?
 A m' n' anpòrta pa un patach ,
 Mi veui pa butème a bsach ,
 I son pa così bagai
 D' amassème ant 'l travai.
 Fassa d' manch d' travajè
 S' i t' has venja d' sgrufiè ,
 S' no fa, cont me bèl, tabus
 D' andè crostionand aji us.
 Pataloch , cos' astu ti
 Da crussiète pr lolì?
 An tal cas j' andromo ansèm
 Quand i sio a coul' estrèm.
 Va ti sol mostas da can ,
 Mi m' guadagno pro me pan ,
 Ma pr ti t' has da crpè
 Ant un fòs , o s' un liamè.
 I t' farie mèi gamacc
 Sì ala fè , s' i t' stèisse cacc ,
 S' an fus nèn ch' i somo frèi ,
 I sarìo già a cavèi.
 I t' hai già arnonssià da frèl
 Tèsta d' aso e da crivèl ,
 Stame pa tòch d' animal
 Maipì nominè pr tal.
 O via dame mia porsion ,
 E venomo a division ,
 L' è sigur , ch' tra noi doi
 I faromo mai bon còi.
 Vate piè la toa porsion
 Su le giaire del Sangon ,

I t'has già mangiala almanch
 Dodès vòte pi ch' d' manch.
 La mia part, messè Pancras,
 I la veui fin ant un stras,
 T'has bèl di, bèl ciacotè,
 T'has da fè con Gian Matè.
 Bin ch' i t' sie così trist,
 T' sès pa gnanca l' Anticrist,
 Fa pur tut lo ch' i t' savras,
 Mi m' n' ampòrta pa un spuas.
 J' heu tant cheur, e tant bon front,
 Ch' i m' fareu pro dè me cont,
 I t' vedras a to dispèt
 Ch' i m' seu fè portè rispèt.
 Astu ancor nèn pro ciancià,
 Oh che lènga da stropià,
 I t' m' has fait gonfiè 'l servèl
 Giunai gròs com' un tinèl.
 T'has bèl esse un marochin,
 T' m' fas pa bassè 'l babuin,
 Elo giust ch' i leca 'l mon?
 I m' fareu pro fè rason.



Giorgio a Catarina



CANZONE XXIX.

Catlinna fin a quand
 Aine da ste pènan
 Con me cheur afanà,
 Con me cheur afanà,

I son continuamènt
 Ponsù da un sèrt torment,
 Ch' i seu pa còsa sia,
 Còsa sia,
 Ch' a m' rënd bèle brovà,
 Ch' a m' rënd bèle brovà.
 S' i guardo i teu bèi eni,
 I vad an breu d' faseui
 Stupì com' un oloch:
 S' i buco coul bochin,
 (Ohi de de mi povrin)
 I pèrdo la paròla,
 La paròla,
 Ch' i smio un barbaboch.
 Coul mostassin tant bèl,
 Ch' a l' ha tra carn e pèl
 La fior del lait e vin;
 Dont elo coul pitor
 Con tuti i seu color,
 Ch' a veuja dèsse d' arie,
 Dèsse d' arie
 A fè un ritrat pi fin?
 Coul to parlè grassios,
 Coul trat tant manières,
 E coul umor bisar,
 Tra tut m' ha carpionà,
 O pr mèi di anfnojà,
 Ch' a vènta ch' i t' adòra,
 Ch' i t' adòra,
 Pr me corin pi car.
 Coul spiritin ch' i t' has,
 Oh! coul li sù ch' a m' pias,
 Ch' i peus pa dite tant,
 Con coul gentil descours
 I t' ancàntré j' ors,

I such, e fin le père,
 Fin le père,
 Si, datè pur coul vant. 2

Bagianna veuime bin
 Ch' a t' costa pa un quattrin.
 E gnanch un doidnè d' pi; 2
 I t' ampromat sul pat,
 Ch' i t' sareu nèn ingrat;
 T' avras pa da pèntite,
 Da pèntite,
 Nè lamèntète d' mi. 2

I t' m' provras sincèr,
 Costant, e dur com' un fèr
 An tute j' ocasion, 2
 Fa pur l' espèrimènt,
 E peui tèn bin da mèn;
 E s' i digh la busia,
 La busia,
 Shrgiairme con d' sgrognon. 2

Crdme pur me gioijn
 Ch' i t' veui tuta mia bin,
 E peui ancor un tòch, 2
 E chi conas to umor,
 S' a t' buta nèn amor,
 Vènta bin di ch' a l' abia,
 Di ch' a l' abia
 Un spirit da massòch. 2


Dì ch' i son un savat
 S' i m' but pa a ghisa gat
 Pr fète servitù, 2
 Tant com' i son portà
 Da bonna volontà
 Vers ti me ranca fidigh,
 Ranca fidigh,
 Quand a m' costèis 'l mnu.

T'avrie tuti i tòrt
 Pr ditla pian e fort
 S'i t'm' burlèisse ancor, 2
 Ma còsa i m'pijne sgiai?
 No no ch' i crdreu mai
 Ch'a s'peussa dè ch' i t' abie,
 Dè ch' i t' abie
 Un cheur tant traditor. 2

T'avras cinquanta amis,
 E tuit a t' sarà vis
 Ch'a t' veujo na gran bin, 2
 Ma un cheur parai del me,
 I t' has bèl di, e bèl fe,
 Ti t' veule pa trovèlo,
 Pa trovèlo
 Lontan da sti confin. 2

O via tocla li,
 Arvedse un' autr di,
 Mantènte 'l cheur giojos, 2
 E buta nèn an stat
 To Giòrs a d'vantè mat,
 O cara mia Catlinna,
 Mia Catlinna,
 Leli sarà ontos. 2





*Un Padre imbrogliato, che non sa a chi
debba dare la sua Figlia.*



CANZONE XXX.

J hai una fia da maridè,
Ma mi seu pa a chi l'hai da dè,
Son ambrojà,
Anterdoà,
Mi 'n seu còsa i m' toira, vad via studiand,
La fia va sospirand,
Oh là pr mi seu pa a chi l'hai da de,
Son ambrojà, anterdoà,
Oh la pòvra fièta.

Quand i la daga a quaich Cavajèr,
La maggior part a son lingèr,
Ma tant a son
Pièn d'ambission,
Con tut lo ch' a sio caria dsour ai eufi
Da dèbit, e sènt ambreui.
Oh là ec.

Quand i la dèissa a quaich Avocat,
Coui li l'han d'grinfe pès ch' ij gat
Pr sgrafignè,
E peui grignè
Monsènd con soe ciance le horse a la gènt
Ch' a s' buto pr seu cliènt.
Oh là ec.

Un Mèdich fa pa pr ij seu dènt,
Prchè ch' a masso tròpa gènt,
E smia ancor

Ch' a sio pa lor
 Ch' a n' abio la colpa, prchè ai manca nèn
 D' rason e scuse un sach pièn.
 Oh là ec.

I veui pa dèla a un Procurator,
 Ch' a son mach bon a fè d' armor,
 E an sitassion
 A fan 'l tron,
 Ch' a smia ch' a s' veujo ranchèsse ij barbis,
 E tant a son bon amis.
 Oh là ec.

Un Inignè la sposrà pa nèn,
 Ch' a l' han tavòta 'l servèl pièn
 Dij seu dissègn,
 E tanti ingègn,
 A fan peui ch' a rèvo continnamènt,
 E son espòst ai cimènt.
 Oh là ec.

I sparmò dèla a quaich Uffissial
 Dait mach a scuffie, gieugh, e bal,
 E pr di giust,
 A l' han tant sust,
 Ch' a l' han so pensè mach a ste alègramènt,
 E dèsse ai divèrtimènt.
 Oh là ec.

I veui pa gnanca dèla a un Nodar
 Ch' a fan d' sotise sènsa par'
 Ant ij strumènt,
 E testamènt,
 Ch' a pòrto dle liti, e sconsèrt sènsa fin,
 E tant a s' fan paghè bin.
 Oh là ec.

No no ch' i m' lasso pa nèn ciapè
 D' armetla a quaich Gratapapè,
 Ch' han mach riflès

Al so intèrès,
 A san plè la pola, ma con tuta pas,
 E mnème la gènt pr 'l nas.
 Oh là ec.

Parlè d' Sirògich l'è tut an van,
 Coi tiro tròp al sangh uman,
 E lech dij dnè,
 A s' buto a mnè
 Le cure tant longhe ch' a l' han mai pì fin
 S' a j' è da gratè d' quattrin.
 Oh là ec.

Dèla a un Spesiari m' agrada pòch,
 A son mach bon a fè d' paciòch,
 E van sgatand
 Di quand in quand
 Con soe siringhe la pòrta dla pas,
 Guardè s' a son d' fica nas?
 Oh là ec.

Parland dij Musich, nessun l'avrà,
 Coui vivo tròp despensierà,
 E tant vnù,
 L'è dlongh fondù,
 Prchè lo guadagno cantand, e sonand,
 L'è lo ch' a van mach sgairand.
 Oh là ec.

Veui pa asarèla con quaich Banchè,
 Prchè la banca ai peul manchè,
 E chial dè un gnach,
 Ma dij pi sach,
 E peui piè la gèsia, o scapè a gran galòp,
 Son colp ch' arivo pur tròp.
 Oh là ec.

Dèla a un Marcant a l' è un po scabros,
 Coui veulo fè tròp i grandios,
 A sègn ch' ormai

A marcio uguai

Ai Cont, e Baron, e Vassai, e Marchès,

E tut va peui mal e pès.

Oh là ec.

Un Nègossiant, bin ch' a smia fort,

Coul li va pià quand a l' è mòrt,

Ch' anlora peui

Ai seurt j' ambreui,

E bin ch' un ij veda marcè tant sul fus,

L' è pa tut òr lo ch' a lus.

Oh là ec.

Son pa sì fòl dèla a quaich Pitor,

Ch' a stanto avèje d' pan pr lor,

E son mès mat

Peu ancor sul pat;

E fait mach a lunà risguard al travai,

Quand bin a sio ant ij guai.

Oh là ec.

Veui pa ch' a pià un Agrimènsor,

Ch' a stan al yènt, frèid e calor

A trabuchè

Le strà e ji sentè,

Pianure, montagne, busson, e rivas,

E bòsch pr suit e pautas.

Oh là ec.

Nessun Gablè sarà mai sò Spos,

Ch' i seu ch' a son tròp gramignos:

A j' è del stènt

Tèribilmènt

Pr costi ch' a s' buto anfojèsse con lor

D' surtisne sènsa brusor.

Oh là ec.

I veui pa dèla a gnun Fondichè,

Ch' a sènto d' spèssie a tut andè,

E dan mai franch

So suchèr bianch,
 Ma sèmpre lo mescio d' farina d' formèn,
 Guardè s' angano la gènt.
 Oh là ec.

L'avraïne fòrsi da dè a un Soldà?
 Ch' ancheui son sì, doman son là?
 E peui a l' han
 Mach un pcit pan,
 E apèna na paga d' andè vivotand,
 L'è lo ch' a van marodand?
 O là ec.

L'haine da armete a quaich Cassador,
 Ch' a san tni cura gnanca d' lour,
 Ma tut 'l dì
 Marciand pr lì
 S' scaudo l' urinna, s' strasso ij gonèi,
 E vènno pa vaire vèi?
 Oh là ec.

I la dagh gnanca a gnun Balarin,
 Ch' an gioventù fan ij gridlin,
 Ma peui chiètà
 Da sèrta età,
 Ch' le gambe comènso già fè genojat,
 A fan dij pcit boconat.
 Oh là ec.

La dareu mai a gnun Giugador,
 Ch' a peulo mai dvantè gran sgnor,
 Ma fan sauté
 Tuti ij seu dnè,
 E d' vòte a giugrío le braje, e 'l vestì,
 E peui mangè d' pan mufi.
 Oh là ec.

Con un Sartor a j' è nèn da fè,
 Coui son desdà mach a robè,
 E d' vòte ancor

Guasto 'l lavor
 Pr fè ch' a j' avansa dij bon scaparon,
 E fèsne braje e gipon.

Oh là ec.

Gnanch i veui dèla a gnun Cusinè,
 Ch' a son tròp caud a ciupinè,
 Prchè ch' a son
 Sèmpe al tisson,
 E la magior part son bisar com d' mulat,
 E squasi tuti sporcat.
 Oh là ec.

Un Mulinè m' arvenrà pa mai,
 Coui neuit e di son al travai,
 E peui ancor
 Da coul armor
 E d' l' eva, e dle rove, e dle père d' mulin,
 A rèsto ciòrgn com d' tupin.
 Oh là ec.

Dèla a quaich Ostò sarà pa bin,
 Coui son ficà sèmpe ant 'l vin,
 Ch' a van toirand,
 Pastrociand,
 E tant a lo vèndo pr bon pi nì manch,
 Giurand ch' a l' è tut vin franch,
 Oh là ec.

I la dareu mai a un Ciarlatan,
 Ch' a san tròp bate e virè man,
 An conclusion
 Son ciaciaron,
 E con soe ciance ancantrio 'l folat,
 Ma tant a son tuit povrat.
 Oh là ec.

Trà Viturin, e Barcareul
 A j' è da fè a trovè un bon fieul,
 Prchè son gènt

Tant insolènt,
 Ch'a temo pa vaire nè Dio, nè i Sant,
 Ansoma son tròp furtant.
 Oh là ec.

Oh che spropòsit dèla a un Paisan
 Ch' a l'han d' servèi baravantan,
 A son stissos
 E pontilios,
 E pr l' intèrèsse a vèndrìo la gènt,
 E pare, e mare, e parènt.
 Oh là ec.

Gnun Botègari, e gnun Artesan
 Avran l'onor d' spòrsie la man,
 Prchè coui lì
 Part son falì,
 E part a s' angigno pr rif, e pr raf
 A vive su i seu ciaraf.
 Oh là ec.

Già ch' i sai nè a chi l'hai da dè,
 Ch' a staga ampò da maridè,
 Almanch così,
 E chila, e mi
 Staromo pi chièt nòstra vita durant,
 A l'è 'l ripiègh pi sbrigant.
 Oh là ec.

Già ch' i seu pa a chi l'hai da dè,
 Così i sarai
 Fòra dij guai
 Tant mi, com mia Fièta.



Del Ferravecchio.

CANZONE XXXI.

Sa chi veul vènde 'l mnù,
 Mi soun 'l feramiù
 Ch' i compro bon e gram, 2
 Lassève ranchè i dènt,
 Mi ij cato prontamènt,
 Pagandie lon ch' a valo,
 Lon ch' a valo,
 Ch' a l' è sinch sòld 'l sènt. 2
 E s' i volèisse ancor
 Peui vèndme pr dsor
 Vòstre mangiòire ansèm, 2
 Mi tant ij comprrai,
 E bin ch' iv ij pagrai
 Sènsa ch' i m' fasse crèdit,
 Fasse crèdit,
 Prchè mi veui gnun guai. 2
 Mi son un òm d' angign,
 Ch' i cato fin ij sign,
 E le parpèile d' j eui: 2
 I comprereu i cavèi,
 La pèl, e fin i buèi,
 Giustomse mach del prèssi,
 Mach del prèssi,
 Ch' a sio brut o bèi. 2
 Mi son sì pr catè
 Fina j' onge dij pè,
 E coule ancor dle man, 2

Con pat e condission,
 Fomo pòche rason,
 Ch'a sio tute antrèghe,
 Tute antrèghe,
 E nèn a tòch e pson. 2
 Pr le servèle peui,
 L'è giusta lo ch' i veui,
 E ch' i vad mat cercand, 2
 I na treuvo con stènt,
 E particolarment
 An tèsta dle fumèle,
 Dle fumèle,
 Ch' a son mach piènne d'vènt. 2
 D' lènghe mi na veui nèn,
 Ch' i n' heu già un arbi pièn,
 Ch' a m' ambarasso mach, 2
 I na veui pi catè,
 Ch' a s' peulo pa esitè,
 A l'è una marcansia,
 Marcansia,
 Pi prèst da lassè ste. 2
 I comprereu an tal cas
 Pi prèst j' orie e 'l nas,
 Ch' a m' torna un po pi a cont, 2
 J' orie an conclusion
 Son bonne a fè d' tacon,
 Dij nas i na peus fène,
 I na peus fène
 Dij bei e bon stopon. 2
 S' ij avèisse dij gavas,
 Ch' a v' dèisso d' ambaras,
 Fèje tajè a me cont, 2
 Pur ch' a sio grossat,
 E nèn sti pcit cassat,
 Mi tant ij compro ancora, —

- Compro ancora
 Pr fène dij barlat. 2
 I marcandreu i polmon
 Mediant ch'a sio bon,
 Nè mangagnà, nè toch, 2
 E su tuti i marcà,
 Savì lo ch'j heu pagà?
 Trè sòld e mès la lira,
 Mès la lira
 Cheur, fidich, e corà. 2
 Dij lavè e manton,
 S'i na volì un doson,
 Ciapème dunna al mot, 2
 E s'i volì ant un bòt
 Tre psete del gariòt,
 O sia garsamèla,
 Garsamèla,
 I dagh man al horsòt. 2
 Volì vènde ij genoi,
 Mi ij cato tuti doi
 Pr fène d'massucat, 2
 E peui s'a v' agradis,
 I pio dco i polpis,
 O sia bot dle gambe,
 Bot dle gambe
 S'a son dur e massis. 2
 L'è giustamènt ancheu
 Coul di ch'i cato j'enì,
 Prdi pa st'ocasion, 2
 E fèvie prèst gavè
 Tra tant ch'i conto i dnè,
 Prchè mi seu pa dive,
 Seu pa dive
 Quand i podreu tornè. 2

Vèndme le man e i bras,
 I ciape un mès crosas,
 Còsa volive d' pi? 2
 I pio dco 'l rastèl
 Dla schinna s' a l' è bèl
 Dasandve quatr lire,
 Quatr lire,
 Ch' ij tire pa al masèl. 2
 Volive vènde j' os,
 Mi cato pcit e gròs,
 E i pago doi sòld l' un, 2
 Andè dont i vorì,
 Miraco s' i trovri
 Un autr ch' veuja dève,
 Veuja dève
 Tant com' i v' smenno mi. 2
 I nèrv da sul copat
 Tut giù fin sui garat
 Mi ij compro tuit afait, 2
 A j' è la tassa an scrit
 Pro feita ancor da drit
 A sinch e doi la lira,
 Doi la lira,
 Còsa volà tni dit? 2
 O via somne antèis?
 Ch' i daga man al pèis?
 Contomne dij quattrin? 2
 A m' è pa vantagios
 A ste sì tant ossios,
 Sbrìgoma prèst facènde,
 Prèst facènde,
 S' nò stème tuit giojos. 2

Le Serve de' Preti secolari.

CANZONE XXXII.

S' i m' volèisse dè da bèive,
 Mi v' cantrià una canson
 Su le sèrve d' sèrti Prèiye
 Tabaleuri, e tròp mincion,
 I voria ch' i rièisse
 Vöstra part siguramènt,
 E ch' da pr tut i dièisse
 Ch' a va dait divèrtimènt.
 Sul prinsipi ste patète
 Vènta vede com' a fan,
 A stan nèn a fè d' barslete,
 Lèste an gamba, adrète d' man,
 A son brave mèinagère,
 A fan tut con un bon gust,
 E pr tute le manère
 A fan vede ch' a l' han d' sust.
 A fan subit le bigòte,
 Le Simonne, e tòrsacòi,
 Savie, e chiète com marmòte,
 Anganrio i savi, e i fòi;
 Ma lo fan pr guadagnèsse
 Un bon nòm e arputassion,
 Pr podèje assicurèsse
 Ant la grassia dij patron.
 Quand a j' han acaparaje,
 A comènso lingèrmènt
 A çaussèsse lor le braje,

Ma così insensibilment,
 Ch'ij bon Prèive d'ordinari
 A s'acòrso nèn afait
 D'esse pià com tanti giari,
 O moschin bagnà ant 'l lait.
 I patron ch'a n'han già fane
 Una stima, e bon concèt,
 A s'afido a coule giane,
 E s'na stan con so cheur chièt,
 Armtèndje pòch pr vòta
 Coule ciav, e coui ciavin
 Del granè, dispènsa, e cròta,
 Dij burò, e dij crdènsin.
 Quand a s'treuvo montà an sèla
 Con la brila, e redne an man,
 A comènsò peui bravèla,
 E butè pr tut sò gran,
 E com mèistre dla finessa,
 A van mnand con tuta pas
 I patron pr la cavessa,
 Pr la barba, e pr 'l nas.
 Fait ch'a l'han le gate mòrte,
 A s'van via impossèssand
 Con manèrè drife e stòrte
 Dla bachetta del comand;
 E i bon Prèive, (soma grassia
 A fè i bòrgno, ciòrgn, e mut)
 E ste tiòrbe con audassia,
 Tramantèrè masènto tut.
 Ai fan vive com'a veulo
 Ant 'l bèive, e ant 'l mangè,
 A stirasso fin ch'a peulo
 Con la scusa d'avansè;
 Ma lor son pa tant tomone,
 A stan pa a çoula passion,

Son volpasse sfondradone,
 Ch' a l' hân sèmpre i seu scondion.
 Oh che brave conterlòire
 Ch' a san fè costi trombon,
 Che sibille, che dotòire,
 Che sèntèse, e che rason!
 E i patron fait a l' oloca,
 Ossèrvè com' a stan lì
 Con la lènga, e i dènt an boca
 A scotè lo ch' a san di.
 A bèi pòch coste servènte
 (Gnun lo peul pa nèn nèghè)
 Van restand impertinènte,
 E boriose a tut andè,
 E sti Prèive ancor a rio
 Sènsa die bin nè mal,
 Ch' an criandie a dubitrío
 D' fè quaich gròs pecà mortal.
 S' ai vèn mal a coule siale,
 Pòvri Prèive fòra d' lor!
 Van virand com le farfale,
 E butand la ca sout dsor:
 Dlongh 'l Mèdich e Spessiari,
 E Sirògich, e 'l folat
 Sènsa dan del so salari
 A s' ij treuvo lì ai garat.
 Quanta cura, quanti esame,
 Che consulte, e che d' rason!
 Gnanch antorn a le gran Dame
 A j' è pa pi d' atènsion:
 A spèndrío ste tèndinne
 Fin 'l cheur (oh i gran codògn!)
 Pr provedie le mèisinne,
 E tut lo ch' ai fa da bsògn.

Andaran a visitèje

Dès, o dodès vòte al di,
E s' un stèissa li a contèje,
A pastrà quaicòsa d' pì;
Tramantré coule smorfiasse
San tirè le soe botà,
E fè bin le soe vergnasse
Tut pr esse papotà.

Dije un pòch a costi Prèive

S' ancalran anvitè d' gènt
A soe ca pr mangè e bèive
Sènsa so consentimènt?
Che disnè, che bèla sinna
Ai farío sti ciapas,
Ai tratrió a la slandrinna
Con un moro da cagnas.

Vènta pa ch' ij Prèive fasso

I bravas, o j' armognos
Con ste bisse ch' ai sbramasso
Dandie subit su la vos;
E sti pòvri tiroliro
Fait al breu dij strassasach,
Ossèrvè com' a s' artiro
Con la soa bèrta an sach.

Chi vorà mai dèsse d' arie


Con sti Prèive a fè un contrat,
S' le servènte son contrarie,
Son inutil tuti i pat;
Vènta prima pensè d' fèje
Cort a lor, e con d' prèsent,
E caresse caparèje
Pr podèje otni l' intènt.

D' sèrti Prèive ai veulo finna

(Fòrsi i lo savri pa ancor,)
Quand a son a disnè e sinna

Godie a tao ansèm a lor;
 Costa sì l'è bin da scrive
 Fin al Papa d' Cavorat,
 Oh i taborn, còsa na dive?
 Ai n'è bin da fè un librat?
 Pòvri dodo ch'a bogrió
 Gnanch la punta d' un cavèi
 Sènsa prima ch' ai lo dio,
 E ch' a ciamo so consèi;
 E lò ch' lor treuvo a propòsit,
 Con tuta puntualità,
 Quand a fus bin un spropòsit,
 Lolì dlongh a l'è spuntà,
 Quand ai sauta 'l rat an tèsta
 D' vòte pr divèrtimènt
 A ste sòrbe d' andè an festa
 A soe ca a trovè i parènt,
 Vènta vede che mèinagi,
 E sti Prèive a patojè
 Pr prontèje l' ocupagi
 Sènsa rie, o gasojè!
 Quand la sèrva è peui partia,
 E ch' 'l Prèive rèsta sol,
 A sta giust con l' alègrìa
 Ch' a sta un gat ansima un rol;
 Ma coul dì, ch' a sa ch' ariva,
 Oh che gòì, o che festin!
 Ai va ancontra con dij viva
 Tut an glòria ant un sestin.
 Quand i venje intrè ant la scuffia
 A sti Prèive, e fevie amis,
 Caressè coula brnufia,
 Ch' a ramassa e cheui 'l mnis:
 I vedrì (i digh pa busia,
 Ma la còsa com' a sta)

A confondve d' cortèsia,
 E stropiève d' onestà.
 I veui pa peui di ch' a sio
 Tuti quanti così gnòch,
 Ma crdi pur lo ch' i dio,
 Ch' i m' falisso bin d' pòch:
 L' è un bèl seugn, se tra cinquanta
 I na treuve doi o tre
 Ch' a sio nèn dl' istèssa pianta,
 I giugria fina' l prè.



*Regole e Costituzioni lasciate dal Successore
 di Giacomo Tros.*



CANZONE XXXIII.

Com Giaco Tros m' ha dame
 Pr soa cortèsia
 La cariga cumpia
 D' esse so successor,
 Pr vanragème 'l crèdit,
 I veui fè tut me dèbit
 Da bon règulator,
 Da bon règulator.

Pr tant i son studiame
 Fondà su l' espèriènsa,
 A fè con diligènsa
 Coste constitution
 È règole, ch' son bonne
 A tuta sòit d' prsonne
 Amic del pinton,

Guardè bin d'osservèje;
 Prchè 'l bèl prim ch'a manca,
 Ij la prdonno gnanca,
 S' a m'dèis un mèis milion;
 Ma dlongh pr castigheło,
 I lo vedri scanfèlo

Dal ròlo dij bronson. 2

Chi veul esse me sudit,
 I veui bin ch'a copeta,
 Ma d'eva, nè d'acqueta
 Ch'a parla gnanch d' loli;
 E vòstra usansa sia
 D'andèvne a l'ostaria
 Almanch sès vòte al dì. 2

Empive quand i bèive
 La sanna sèmpre a randa,
 Bronsogna lo comanda
 Pr lège d'sanità;
 J'è privo ch'a podria,
 Bevèndla nèn paria,
 Empi d'vèntosità. 2

A j'è peui n'autra causa
 Ancor pi d'importansa,
 S'i mantenri st'usansa,
 I smijrè tuit a mi;
 J'acquistrè fin la simma
 D'glòria, onor, e stima
 Fasènd sèmpre così. 2

I vòstri fieui mnèje
 An vòstra compania
 Sovèns a l'ostaria
 Pr dèje educassion,
 Così pòch a la vòta
 J'anlève gènt devòta
 Dia doja, e dl'amolon. 2

I veui ch' i v' ambriache
 Sèt vòte almanch pr smanna,
 Vènta piè cost' andanna
 Com' a l'è convèniènt,
 A scusa pr fè vede
 A chi vorà nèn crde,
 Ch' i sè del règimènt. 2
 Quand i sarì malavi,
 Piè mai gnunna mèisinna,
 Snò dij dècòt d' cantinna,
 S' i v' veule arpatinè;
 Lassè tuit j' Spessiari
 Con i seu strafugari,
 Ch' a v' ròbo mach i dnè. 2
 Piè guarda ch' i desguste
 Gnun osto, nè ohèrgista,
 Mincionè pa la rista,
 Cost è un cap prinsipal;
 E d' chi mai volive,
 S' a l'è peui mach pr dive,
 Fè pi gran capital? 2
 Prima d' butève a bèive,
 Guardè 'l vin, e nufièlo,
 E peui après tastèlo
 S' a l' ha bonna savor,
 E s' i trovri ch' a sia
 Una pouvèr squisía,
 Anlora fèje onor. 2
 Sti vin ch' vènno da fòra,
 Fritèvie pa gran còsa,
 D' vòte una pcita dòsa
 A stofia pi ch' un veul:
 Pr bèive en abundansa
 Con tuta argiovisansa,
 Chitè pa 'l bon nubieul, 2

Ascotè bin cost ordin,
 Ch'adès i vad a dève,
 Ste gènt, ch'a pio j'ève,
 Stimèje pa un luvin;
 E fè mach amisissia
 Con coui ch' j' avì notissia
 Ch'a son amis del vin, 2
 Mantnive sèmpre in grassia,
 (Notè lo ch'i comando,)
 E stème pa fè 'l brando
 Con i marcant da vin;
 E tnive a la bon' ora
 Con i brindor ancora,
 Ch'a son nòstri cusin. 2
 Quand vòstre fomne brajo
 Perchè ch'i v' ambriache,
 Vènta pa ch'i v' atache
 Al cheur coule rason:
 Lassèje ch'a s' anrabbio,
 Ch'a pisto tant ch'a n' abio,
 Voi atri intant tni bon. 2
 S' un v' anvitéis a bèive,
 Usè mai ritrosia,
 Ch'a sia dont se sia,
 E guai a chi mancrà!
 Così mi veui ch'a s' fassa,
 S' a fus bin s' una piassa,
 O an mès d' una contrà. 2
 S' i se invità pr nòsse,
 O quaich autra bafrada,
 Fè vede a la brigada
 Tut l' ch' i savri fè;
 S' ai fus bin d' marca casse,
 Vènta pa nèn ch' i lasse
 Vòstra part andarè. 2 2

- Lavè giamai cōn d'eva
 Gnun amolœ, nè sanne,
 A m'fan yni le canne
 Serti sproposità,
 Ch'a s'buto li a frtèje
 Con l'eva, ch'ai peul dèje
 Sènt male qualità. 2
- Cariève mai d'fumèle,
 Nè fomne, nè matòte
 Andand a le gargòte,
 Ch'a son mach d'ambaras,
 Salvand ch'a sio d'coule
 Ch'a n'auso bin le grole
 Pr piè so bon sumiàs. 2
- Piè mai gnunne dossaine,
 Ch'a guastò mach la boèa,
 L'è ròba ch'un la toca
 Bevènd dèl vin pr dsor;
 Pr spiritos ch'a sia,
 (I'digh pa la busia,)
 A pèrd tut 'l savor. 2
- Sgurève mai con d'eva,
 (Marchè lo ch'i veui dive,)
 Nè i dènt, nè le zanzive
 Pr nèn piè quaich flussion,
 La qual podria fève
 Gran prègiudissi, e dève
 Sul cheur, o sui polmon. 2
- Sa sa chi ha bōnna veuja
 D'intrè ant la mia brigada;
 Ai costa pa un bèl vada,
 Pur ch'a shrovacià bin;
 Ma pià partì ch'a l'abia,
 A seurt papà d'an gabia,
 Salvand ch'a tema 'l vin. 2

Ste règole, e ste lègi
 Son pr comun vantagi,
 Fène tuit bon usagi
 An tute j' ocasion,
 E dnans furni i veui dive,
 Ch' i sapie mantenive
 Tavòta an bonna union. 2



*Le Donne che vogliono il comando dispotico
 di casa.*

CANZONE XXXIV.

Che sèrvei fait a granghía,
 Ch' a l' han mai lassè ch' i dia,
 Sèrte done d' ogidi;
 J' han apènna maridaje,
 Ch' veulo lor portè le braje
 Alla barba dij mari,
 Ala barba dij mari.

A fan subit le patronne,
 E boriose veulo imponne,
 Comènsand ausè la vos,
 E i mari s' a son garòfo,
 Ij vedri là astà s' un-còfo
 Bèi e cheuit, e maravios. 2
 D' vòte a s' butò fè una cèra
 La pi brusca, e la pi fièra 3
 Compagnà dà sènt strincon,
 E pr rèndse sostnue,

Tut 'l di fan le borue, 2
E bròto com 'l tron. 2

Dal prinsipi ch'a son gravie,
Vènta tnie da malavie
Con particularità,
E stofandie d' cortèsie,
Sodisfèje coule anvie.
Ch' ai venran an quantità. 2

Dio guarda a l' om ch' ai dièissa
Quaich paròla ch' ai pichèissa,
Dlongh a sauto com cravieui,
Crde pur a lo ch' i dio,
S' a podèisso ai scarpèntrio
An gavandie finna j' eui. 2

Dì un pòch a l' omo ch' a prètènda
D' antrighèsse ant quaich facènda
Risguardant al bon ciadèl,
Coula vèspa durgna e trista,
Ai darà talmènt la pista,
Ch' ai farà virè 'l servèl. 2

Vaire vòte invipèrie
S' atacran a sèrte ghnìe
Da stimèje pa un quattrin,
E su lon faran d' lègènde,
Destacandne pr un pènde
Sènsa mai pi avèje fin. 2

Quand la fomna l' ha la stissa,
Gara a l' omo ch' a cetissa,
Vènta guanch ch' a fassa fià,
A guadagna pi s' a lassa
Ch' a rasonna, e ch' a' sganassa
Fin ch' as sia desgonfià. 2

Oh che futn sout coule scèfie,
Ch' a l' han mai coste brnufie
Mal grassiose com d' aris,

Lor non venlo dipendènsa,
 Ma fè tut con prepotènsa
 Lo ch'ai dà ant 'l schiribis. 2
 Un pòvr om con coste tèste,
 Ch' veulo comandè le fèste, 2
 E peu ancor i dì d' lavor,
 A l' han pro bèl descàusèsse,
 Ch' a vèntà pensè d' chitèsse,
 E nèn fè del bèl umor. 2
 E tant pi s' a l' è ch' a sia
 D' un' età già ampò splufria,
 A l' è giust anlora 'l bon
 Ch' a lo fan stè a la ticheta
 Con sovèns quaich trebaudeta,
 Angrumli là ant un canton. 2
 Son ancora pès sènt vòte
 Coule là ch' fan le bigòte: 2
 Oh che dròla d' santità!
 Stan an gèsia con modèstia,
 Ma con rabia peui da bèstia
 A squintèrno tuit ant ca. 2
 Ma sav' l'ò ch' ai dà pènnà,
 A l' è 'l tròp bon tèmp ch' ai mènna,
 E i mari ch' a son bagian,
 (Ma so dan,) è prchè fèje
 Tante gnògne, con lassèje
 Coul cassul tant prèst an man? 2
 Pòvra servitù, s' a s' pènsa
 D' fè una longa permanènsa
 Con d' servèi così slurdì,
 Vènta pa ch' a s' lo figura,
 S' ai capara pa a dritura
 Con sposè dlongh so partì. 2
 Na vouli dle pi baronne?
 Pr podèje lor disponne

A so meud tuti j'afè,
 Fan passè pr la stamegna
 Coul bonòm fin ch' ai consegna
 Coul ciavin, o ciav dij dnè. 2
 S' a son giovo, s' a son bèle,
 Dan sovèns an ciampanèle
 S' ij galan ai van da rair,
 E i mari l' han bèl butèsse
 Sul sèrios e caprissièsse,
 Tant e tant ai fan fè ciair. 1

A sènti ste dotoresse
 Quand a veulo fè paresse
 So talènt ai oimo oloch,
 A son sèrte drolarie,
 Ch' a farìo tombe d' rìe
 Le galinne giù dal gioch. 2

Se 'l mari falis quaicòsa,
 Ai fan subit la soa glòsa
 Pr tirèlo su a caval,
 E podèje con gran fèsta
 Dèje dl' aso pr la tèsta,
 Del codògn, e dl' stival. 2

Lo ch' a l' è d' economia
 Lo fan pro su la famia
 Con un studj prinsipal,
 I vedrì com' a stirasso,
 Ma bin pòche ch' a na fasso.
 Sul so pròpri prsonal. 2

A san pro fè so mèinagi,
 Piandse lor pr fè bèl plagi
 I bocon pi da golù,
 E i mari stan a buchèje,
 Ma n' ancalo pa arbrochèje
 Chièt com l' euli i fòi folù. 2

Quand a l'ham peui dla fiolansa,
 Pr mostrè la padronansa,
 E l'autorità ch' a l'han,
 D'vòte ai pussio ste scalòrgne,
 D'vòte ai tiro giù d'babòrgne
 Strapassandie pès ch'un can. 2

Se 'l mari veul di quaicòsa,
 Ai arcarco ancor la dòsa
 Tante vòte dopiamènt:
 Maginè s'lolì ai fa pènnà,
 Con tut lò l'è mèi ch'a tènnà
 La soa lènga an mèi ai dènt. 2

Ai na j'è ch' a l'han d'dòta
 Tant da pièsse una marmòta,
 O un sumiòt da fè balè,
 Coule son pr l'ordinari
 Pi sfrontà ch'un urinari,
 E pi autère ant 'l parlè. 2

Vaire vòte l'òm magonna
 Con cla fomna sfondradonna
 Ch' a veul esse l'euli in tut,
 E tavòta contrarièlo,
 E s' a fa da bsògn strièlo,
 Ch' a l'è ancor peui 'l pi brut. 2

Mi digh nèn, ma v'assiguro,
 Ch' i seu nèn còsa s'figuro
 Coste done anspirità,
 Còsa dive voi ch' i sènte
 Con j'orie tant atènte
 Tute quante ste vrità? 2

S' ai fus quaicadun ch' volèissa
 Oblighème ch' i parlèissa,
 A sarìa natural,
 E probabil ch' i techria

Sènsa tanta astrologià
 La radis d'tut 'l mal. 2
 Mi diria a ste fumèle
 Ch'a son tèste da crivèle
 S'a fus bin su so mostas;
 Peui après i sogionsria
 Ch'a vèn tut dal' asnarìa
 Dij mari, ch'a son d'bambas. 2
 Elo pà una còsa ontosa,
 E dautut vitupèrosa.
 D'essie d'oimò tant oloch,
 E ch'a veujo maridèsse
 Squasi squasi mach pr fèsse
 Tni pr tanti barbaboch? 2
 Sul prinsipi prchè fèje
 Tant dij dos, e prchè dèje
 La bacheta del comand?
 Andè pur adès an piassa
 Publicand i bon pro fassa
 Ch'i ciaprè di quand in quand. 2
 D'or anans chi veul marièsse,
 Ch'a prœura d'atachèsse
 A j'orie sta canson,
 A lasrà pr nèn falila
 Arlamè giamai la brila,
 S'a l'è nèn dautut tomon. 2



*Antonio Pianca che vuol sposare la Figlia
di Gio. Bernardo.*

CANZONE XXXV.

Mi mi mi veu veui ma marjème
Fo fo fo foble ba ba bacat,
Chi chi chi veu veu veul pa pa parème,
Gna gna gna gnanca 'l fo fo folat,
Mi mi mi veu veu veui ma marjème
Fo fo fo foble ba bacat.

M'è m'è m'è ve ve venù veu veuja
Qui qui qui quindèdès di di fà,
Qua qua qua quand Pè pèdèr Pleuja
S'è s'è s'è ma maridà.
M'è m'è ec.

Già già già n' ha n' hai pa parlane
Co co co con i pa parènt,
Tu tu tu tuit han mo mostrane
A a agra gradi di mènè.
Già già ec.

O o o che che ma ma tò tòta
D'u d'u d'u d'un bè bèl ta talènt j
Co co co con una dò dòta
D'eu d'eu d'eu d'eut scu cud'a d'argènt.
O o ec.

L'è l'è l'è un amo morosa,
Ch'a ch'a ch'a m' fa fa pro pro ocin,
Be be be bèl gra grassiosa,
L'ha l'ha l'ha nò nom Cla clarin.
L'è l'è ec.

A l'è l'è l'è una fi fi fia

D' d' del me me mèi umo umor,

Ma ma ma mai la pa paria

J'heu j'heu j'heu vivist fi fin or,

A l'è l'è ec.

D' u d' u d' u d' una fa famia

Bi bi bi bin avo vosà,

Dle dle me me mèi ch'ach'ach'ai sia

A a ant sta sta bo borgià.

D' u d' u ec.

L'è l'è l'è erèdi ditèra

Lo lo lo ch'è ch'è 'l pr pi bèl,

Ma ma ma qua qua quand so sout tèra

Si si si sia so so frèl.

L'è l'è ec.

A cia cia cia ciaprà anco cora

Qua qua qua quaicò còsa d'bon,

Sa sa sa sarà la la la dmora

Pi pi pi d' sènt do doson.

A cia cia ec.

Se se se sènsa i ba бага gagi

A a ant u u un cò cofnat

Da da da fè un ca cariagi

D' u d' u d' u d' un bo bon asnat,

Se se ec.

J'heu j'heu j'heu pè pènsè d'piè pièje

Do do doi vi vi vir d'dorin,

Seu seu seu do dont tro trovèje

Pr pr pr un se sechin.

J'heu j'heu ec.

Fa fa fa fas co co cont d've vestila

Da da da dan te tèsta ai pè

D'rò d'rò d'rò ròba su su sutila,

La la la lassè sème fè.

Fa fa ec.

I veu veu veu veui nèn fè fème
 Bu bu bu burlè lè da da grun
 Ne ne ne svergo svergognème,
 A a a l'è l'è tu tut un.
 I veui ec.

L'è l'è l'è me mèinagè gèra
 Pr pr pr prso sonna d' sust,
 E cu cu cu cusi sinèra
 D'u d'u d'u d'un gran bo bon gust.
 L'è l'è ec.

Co co co costa l'è l'è fi fia
 Del del del ma mane nescard,
 Co co co coul ch'a ch'a l'a l'avìa
 Nò nò nòm Gia gian Be bernard.
 Co co ec.

Ve ve ve vènta ch'i ch'i ma manda
 Lo lo lo me messagè
 Fè fe fe fèje je la la la dmanda,
 E e e sbri bri brighè afè.
 Ve ve ec.

So so so son Tò tònì Pia pianca,
 Ba ba ba basta di di lo,
 A ven veu veu veul pa pa gna gnanca
 Di di di dime ch' ch' d'nò.
 So so ec.





Li Cronichismi.

CANZONE XXXVI.

Ascotè s' i veule rie,
 Bin ch' a s' trata d' un afè,
 Ch' a l' è sènsa di busié
 Pi matèria da piorè,
 Ch' a l' è sènsa di busié
 Pi matèria da piorè.
 M' è santà l' umor d' archeuje
 Quanti cronichism, e maj,
 Quanti aciach, e quante deuje
 A sti tèmp son pi usuai.
 Quanti aciach ec.
 Ogni ca, s' i riflètomo
 L' è giuimai un ospidal,
 Chi patis dolor d' gomo,
 E chi è sbors com' un caval.
 Chi patis ec.
 Chi s' lamènta dla dernèra,
 E chi dla palpitassion;
 Un a cria pr mal d' pèra,
 N' autr pr le contrassion.
 Un a cria ec.
 Chi è sogèt a le caudanne,
 Chi ale sfite, chi ai vapor,
 Chi a tirè d' sarabadanne
 Ch' ai sfogonna l' as da fior.
 Chi a tirè ec.

D'aitri van hofand pr dsora,
 Tant ch'arlamò squasi mai.
 D'aitrì son mèss an malora
 Dai gran acid, o gran sai.
 D'aitri ec.

Sènti un po coui là, ch' a tusso,
 Com' a pianto dij passon,
 A par giusta ch' a tabusso
 Su d' botai, o su d' arcon.
 A par ec.

Osservè s' a son burlète
 Sti tramblaire mòì com bioc
 A fè d' sèrte piroète,
 E strabaus com tanti cioc.
 A fè ec.

Tni da mènt sti fiacafave
 A stantè mastiè 'l bocon,
 Com' ai calo giù le bave
 Dant la boca sul manton.
 Com' ai calo ec.

Scotè coui dla gola gròssa.
 A tranfiè con tanti beu;
 Guardè coui ch' a l'han, la mòssa
 Ch' 'l mangè ai va tut an breu.
 Guardè coui ec.

Ai n' è tanti ch' a scataro,
 E ch' a fan dij caponat
 Giaun e vard, e na spataro
 Dij baros, e dij tanat.
 Giaun ec.

Chi va mat pr quaich chitara,
 Chi pr sciatica sopiand;
 J' un 'l granf ai fa dè an zara,
 J' atri andè tut rancassand.
 J' un 'l granf ec.

Sti mè s bòrgno, e dur d'orìa
 A l' avràn dco bin a car
 D'esse scrit ant la partìa
 Dle langrègne, e dij catar?
 D'esse ec.

L'è bin giust ancor fichèje
 Paralitich e gotos,
 A vèntà pa desmèntièje
 Gènt ch'a son tant fort an vos?
 A vèntà ec.

Chi patis dle flüssionasse
 Minca pòch ant 'l gariòt,
 Ant j'orìe, ant le ganasse,
 Ô catar ant ij spalòt.
 Ant j'orìe ec.

Chi è sogèt ala mingranna,
 Chi a mal d'stòmi, chi ai dolor,
 Chi è tant stitich, ch'ogni smanna
 Va una vòta al cagador.
 Chi è tant ec.

Un è mars, un autr ha un siro,
 N' autr ha pòch o nèn d'aptit,
 Un ha i nèrv del còl ch'ai tiro,
 Ch'a peul nèn portèlo drit.
 Un ha ec.

D'umor frèid, ciavèi, e scròle
 Ai na jè pa mai mancà,
 D'lurdison, zanzive mòle
 Sènsa dènt, o descarnà.
 D'lurdison ec.

Ai n'è tanti ch'a tramolo
 Chi dla tèsta, chi dle man;
 Ai n'è d'aitri ch'j' eui ai colò,
 Ch'a smia breu dij pissacan.
 Ai n'è ec.

Quanta gènt con d'fontanèlè,
 Chi ant le gambe, chi ant ij bras;
 Ma di un pòch quante fumèle
 Ch'a patisso 'l bagagias?
 Ma di ec.

Ai n'è fait a sivignòla.
 Dèsgagià com' un stival,
 D'aitri d' una pasta mòla;
 D'aitri rèidi com' un pal.
 D'aitri d' una ec.

Ai n'è tanti ch'a patisso
 Minca pòch ij strangojon,
 E d' scorbutich ch' anmaiïrisso;
 D'aitri giaun com' un limon.
 E d' scorbutich ec.

Le morbidè a quante, e quanti
 Dan dij crussi, e dij gran guài?
 E si ossèrve tante e tanti
 Son crpà com' un sernai.
 E si ossèrve ec.

Ai sarà pa gnun ch' andvinna
 Quanta gènt a son sogèt
 Tant a ritènsion d' urinna,
 Com' a strènsimènt d' pèt.
 Tant ec.

Chi surtiènd marlait a l' aria
 Ciapa subit d' anfrèidor,
 Chi pr ròba ampò contraria
 Va argitant com' un brindor.
 Chi pr ròba ec.

Chi ha la pansa, cheusse, e gambe
 Ch'a son gonfie com d' balon,
 E chi ha le servèle strambe
 Bin sovèns an prucèssion.
 E chi ha ec.

Ai n'è con la catarata,
 E chi peul nèn digèrì;
 D'aitri smòrt com' una pata
 Peulo pòch o nèn durmi.
 D'aitri ec.

Ma vèntralo ch' i tralassa
 Coui ch' a l'han la stissa al nas,
 O una lupia ant la testassa,
 O coul bon odor d' punas?
 O una ec.


Chi ha d' malandre ancor pi gròsse,
 Rasca, vèrm, e d' ostrussion,
 Chi mal d' cheur, chi va ale cròsse,
 Chi patis le spermison.
 Chi mal ec.

Ma mi veui ancor ch' i staghe
 A scotè s' i digh vrità,
 J' elo pa dla gènt con d' piaghe,
 E dle croste an quantità?
 J' elo pa ec.

E s' i veule ancor scotème,
 Sèntirì ch' a j' è dla gènt
 Con dle fistole, e postème,
 E le camole ant i dènt.
 Con dle ec.

Ai n' è d' aitari, e d' aitre ancora,
 Ch' a patisso tant j' odor,
 Ch' ij vedrì tut sout e dsora
 A cambiè finna d' color.
 Ch' ij vedrì ec.

Ma furniomla, e dont butromae
 Ste marsògne, e sti marsor?
 Piomo almanch ste fie e fomne
 Domic ampò guarnè ai sotror.
 Piomo ec.



Il Libertinaggio di questi tempi



CANZONE XXXVII.

Ch' età malandrinna,
 Che sècol vissios,
 Che gènt libèrtinna,
 Che mond licènsios
 L'è mai ogidì :
 Ste un pòch a senti,
 Ma m'vèn 'l sangiut,
 I peus pa di tut,
 Ma m'vèn 'l sangiut
 I peus pa di tut,
 I peus pa di tut.
 An gèsia a coul' ore
 A j' è sti gridlin
 Dacant a le sgnore
 Sfrontà com tupin,
 Guardè com' a stan,
 Che d'vèrgne ch' a fan....
 Ma m'vèn ec.
 Squadrè su le piasse,
 Buchè pr le strà,
 A fè le smargiasse
 Ste dònè ansucrà,
 Ch' a smio d' pavon,
 Savì la rason?...
 Ma m'vèn ec.
 Andè un pòch a vede
 Ai opère e bai,

S'i veule nèn crde
A lo ch' mi dirai,
Sté con atènsion,
Adès a l'è 'l bon...
Ma m' vèn ec.

Vèntria ch' i stèisse
Stermà ant un cànton,
Pr. tant ch' i sentièisse
Le convèrsassion,
Ch' a s' fan an pro d' leu
Da fè sonè 'l feu....
Ma m' vèn ec.

Ma còsa diromne
Dla gènt militar
Quand j' oimo, e le fomne
Son particular
A di 'bif e baf?
E fè rif e raf...
Ma m' vèn ec.

An tuti sti circol
Ch' a s' ciamo vissios,
Chi parla pi discol
L'è pi spiritos,
E rio com d' mat
Ancora sul pat...
Ma m' vèn ec.

An tante ostarie
Ch' andrìo drocà,
S' intrèisse i trovrie
Dla gènt desbocà
A cantè d' canson,
E fè d' sèrte assion...
Ma m' vèn ec.

A l' ocasion d' nòsse,
Li sì ch' as na dis

Dle ationde, e dle grösse
 Con fris e lambris,
 E con libertà
 La pi sconsertà...
 Ma m'vèn ec.

D' invèrn ant le stale
 Ch' a stan i poisan,
 A j' è coste siale
 Con dontrè galan
 Astà li d' après,
 Ch' a demoro a la pès...
 Ma m'vèn ec.

J' è d' mare scaltrie,
 Ch' a l' han pa rossor
 D' mostrè a soe fie
 La scòla dl' amor,
 E dij cumpimènt
 Da fè anliè i dènt...
 Ma m'vèn ec.

J' è d' sèrte lèngasse,
 Trovandse ai convit,
 Ch' a fan d' parolasse
 Pr stòrt e pr drit,
 Sèns ogni riguard
 Pi grasse ch' 'l lard...
 Ma m'vèn ec.

A j' è d' mandolere,
 Ch' a son ampestà,
 Ch' a dan giù d' verlère
 Adòs dl' onestà
 Con sèrti descors
 Da fè scapè j' ors...
 Ma m'vèn ec.

A j' è dla malissia
 Fin ant le masnà,

Ma chi elo ch' ai vissia
 Oli un poch ch' a son na?
 Mi si ch' i lo sai,
 E adès lo dirai...
 Ma m' vèn ec.

Andè dont a vio
 Le gènt a l' invèrn,
 Ai n' è ch' a na dio
 Ch' a smeuvo l' intèrn;
 E stèislo tut lì
 Ant lò ch' a san dì...
 Ma m' vèn ec.

Ant coste locande,
 Obèrge, e pènsion,
 Sovèns a j' è d' lande
 Ch' a dan ocasion
 D' fè ciancè ala gènt,
 E con fondamènt...
 Ma m' vèn ec.

Ma guai s' le muraje
 Savèisso parlè,
 Chì avría paraje
 Fin or da ciarlè
 Su tanti difèt,
 E toiro sègrèt?...
 Ma m' vèn ec.

Che d' ròba ch' j' avría
 Ancor da giuntè,
 Mai pi finiria
 S' i stèis a contè
 Tut lo ch' i seu ancor,
 Sarà un stupor...
 Ma m' vèn ec.

LE VEDOVE

CANZONE XXXVIII.

A j'è tante vedovèle ,
 Pr parlè così an comun ,
 Ch'a procuro d'fè le bèle
 Pr tornè gabè quaicun ;
 Ch'a procuro d'fè le bèle
 Pr tornè gabè quaicun.
 Mi m' antèndo di dle giovo ,
 Pa dle vèje bombonà ,
 Coule ij lasso ste ch'a brovo
 Ant 'l breu dla carbonà.
 Coule ec.
 L'han 'l vso ch'ai tormènta ,
 Ch'ai fa andè fòra d'servèl ,
 Una smania , l' altra stènta
 A podèje ste ant la pèl.
 Una smania ec.
 A fan tuti i stratagèma
 Pr podèje otni so intènt ,
 Pòvre dònne l'han pa flèma ,
 E bin pòch règolamènt.
 Pòvre ec.
 A faran bin le svergnose
 S'ai vèn quaich proposission ,
 Ma l'han mai tas d'esse spose
 Pr guarì dla smangison.
 Ma ec.

A fan bin dontrè grimasse
 Pr quaich di vidoe ch' a son,
 Ma son tuti tir d' volpasse
 Piènnè mach d' simulassion.
 Ma son ec.
 n' hai conossù quaich' una
 Dnans ch' 'l so mari fus mòrt,
 Caparèsse dunna dunna
 Un autr òm pr so confòrt.
 Caparèsse ec.

Vènta vede a cinfrognèsse
 Dlongh ch' a l' han furnì coul deul,
 A s' ingigno pr butèsse
 A l' incant s' quaicun ai veul.
 A s' ingigno ec.

Osservèje com' a viro
 Pr le gèsie ant j ocasion,
 Ma savì i motiv ch' ai tiro?
 L' è pa gnanch la divossion.
 Ma savì ec.

L' è pr fè la soa parada,
 E pr esse vaghègià,
 E fè vede a la brigada
 Ch' a son lèste, e desgagià.
 E fè ec.

Van e giro d' ogni banda
 Pr le piasse e le contrà,
 Prchè j' è gnun ch' ai comanda,
 Nè ch' ai rompa le soe strà.
 Prchè ec.

S' a son riche, s' a son bèle,
 L' han cinquanta galavron
 A frustèje le planele,
 Le cadrèghe, e cadrègon.
 A frustèje ec.

E lor gonfie, e sostnue
 L'han piasì d'fèsse amusè,
 Ma-quaich vòta le pi drue
 Dan del nas ant un busè.
 Ma quaich ec.

S' a son brute, e lingèròte
 A van squasi fòra d'lor,
 Vènta vedie mnè le piòte
 Pr serchèsse quaich sfojor.
 Vènta ec.

Elo nèn una vergògna
 Vedne andè bassicoland
 Tuta la giornà an gatògna,
 E la neuit pr lì gnaugnand?
 Tuta la ec.

Ai na j'è ch' ai fa pa pènna
 A chitè le soe masnà,
 Basta ch' 'l partì ij arvènna
 Pr ciapèlo a la volà.
 Basta ec.

La pi pàrt (i peus di ancora)
 Ch' a son tant acalorà,
 Ch' a sciodrìo ant un quart d'ora
 Vint dosènne d'oeuv d' pondrà.
 Ch' a ec.

Tut coul an ch' 'l deul a dura,
 J' è dco vis ch' a l' è un gran guai
 Nèn podèje fè figura
 Ai tèatri, nè sui bai.
 Nèn podèje ec.

Fin ch' an somma a torno avèje
 Un autr òm, l'han mai pi pas,
 S' ai dovèisa bin fiachèje
 Bras, e schinna, e rompie 'l nas.
 S' ai ec.

Tramantè pr soa cautèla
 Ai saria nèn d'pi bon,
 Ch'fèsse tute d'rasparèla
 Una gròssa provision.
 Ch'fèsse ec.



I Vedovi vecchj innamorati.



CANZONE XXXIX.

A m'fa rie quand i pènsò
 A sti Vido annamorà
 Già tut gris, e ch'a comènsò
 Esse fiap, e sgangarà,
 Già tut gris, e ch'a comènsò
 Esse fiap e sgangarà.
 Pur a veulo (ela pa dròla!)
 Compari da gilicat,
 E fè i dru con tanta tòla,
 Com'a fan d'istà i galat?
 E fè ec.
 Tnie un pòch da mènt a core,
 Atilà com tanti spos
 A fè visita a le sgnore,
 Aplicandse a fè i grassios.
 A fè ec.
 S'a son già goblù ant le spale,
 Vènta vedie sti bagai
 Pr le strà tut mal uguale
 Marcè drit com tanti pai,
 Pr le strà ec.

Pr la barba, e l' ampodrura
 L' han un' ora al di impiègà
 Pr podèje fè figura,
 E curvì i difèt dl' età.
 Pr podèje ec.

Van cambiandse la camisa
 Finna dontrè vòte al di,
 E vestisse d' ròba armisa
 Par ch' ai sia proibì.
 E vestisse ec.

Così a fan pr guadagnèsse
 L' eui e 'l gènio fèminin,
 E podèje prèst cobièsse
 Con quaich bèl scarabotin.
 E podèje ec.

E s' a stanto a guadagnèje,
 A s' angigno d' impièghè,
 (Costa pur lo ch' veul costèje)
 Quaich conchèra, o quaich conchè.
 Costa ec.

Cost a trambla, e coul rangòta,
 D' atri son pi mòi ch' 'l brous,
 Pur buchè sti vèi balòta,
 Calorà com tante cious.
 Pur buchè ec.

Ai n' è pòchi o gnun ch' a s' curo
 D' una ròba già arsetà,
 Ma la maggior part procuro
 D' atachèsse al fior dl' età.
 Ma la ec.

E s' a peulo nèn spuntèla
 Con le ciance e compimènt,
 A s' agiuto d' importèla
 Con dotèje grassamènt.
 A s' agiuto ec.

Osservèje com'a viro
 Pënsièros, e tut distrat,
 A fantastico e dèliro,
 E l'amour ai fa andè mat.
 A fantastico ec.

S' a fan tant d' acaparesse
 Quaich gioijn ch' ai daga ant l'eui,
 L'è da rie a slambanèsse,
 Vedie fonde an breu d' faseui.
 L'è da rie ec.

E con coula soa mètrèssa
 Sti bavos fan i galan
 Con un deuit, con una drèssa
 Da gardfo e tulipan.
 Con un ec.

A tapinno a visitèla
 Dontrè vòte almanch pr di,
 I babao stan a covèla,
 Ch' anoirio i seu pa chi.
 I babao ec.

S' un amis, o chi se sia
 Ai tochèis pa mach la man,
 Costi vèi pr gelosia
 Ai fan dlongh d' ojas da can.
 Costi ec.

Tramantrè ste lanne finne,
 Ma pi mòle d' un barbèl
 Van disèndie d' parolinne
 Ch' a son dosse pi ch' l'amèl.
 Van disèndie ec.

A s'buttan a fèje d' gnògne,
 Sènt promèsse, e quaich prèsent,
 Ai fan tute ste pussiògne
 Pr podèje otni l'intènt.
 Ai fan ec.

L' han la bòja 'ch' ai tormènta
 Neuit e di con tal vigor,
 Ch' ai fa vni fin la scorènta,
 E la tos pr sout e dsor.
 Ch' ai fa ec.

Dla fatiga ai na va pòca
 Pr guarì sti bèi umor,
 Acogèje ampò ant la fiòca
 Fin ch' ai passa coul calor.
 Acogèje ec.



Sebastiano Bodino.



CANZONE XL.

Bastian Bodin
 Cugnà d' Martin,
 Ch' a va tirand sèira e matin
 D' fusete dant le naje, o bièn,
 Ch' ai fan cuncè le braje
 Vous m' entendrez bièn.
 A l' ha acquistà
 La nobiltà
 Ant l' ospidal dla carità;
 Guardè che bèl garòfo, o bièn,
 Da tnilo sout un còfo.
 Vous ec.
 L' è stait trovà
 Na matinà
 Dnans a la pòrta del Curà
 Ficà ant una cavagna, o bièn,

Ambrlifa ant la bagaa

Vous ec.

Brut com la neuit

E sènsa deuit,

A smia giust un babi cheuit,

E sènsa di busie; o bièn,

L' ha un moro da fè rie

Vous ec.

A l' è un massòch,

A l' è un taròch

Surti d' an mèss aji articiòch,

A val pa nèn la caria, o bièn,

Da fèlo sauté an aria,

Vous ec.

Che poltronas!

Che patoflas!

Buchèlo mach ant 'l mostas,

L' ha la finosomia, o bièn,

Di' istessa gargaria.

Vous ec.

O che stransi

O che mufi

Ch' a veul ancora comparì!

Con coula soa tignassa, o bièn,

Ch' a smia una ramassa.

Vous ec.

Lo ch' è 'l pi bèl,

A l' ha un servèl

Ch' è fait sul mèdèr d' un crivèl,

Da chial a j' è pòch svari, o bièn,

A coui là d' san Sudari.

Vous ec.

Che gran paciòch,

E che fabiòch,

A smia fait al breu dij gnòch,

L'è un bèl e bon badòla, o bièn,
Pr fè virè lamòla.

Vous ec.

Veul fè 'l grassios

E 'l spiritos ,

Pènsandse d'esse manières ,

Ma l' ha d' sèrte manèrè, o bièn,

Da sbrgiairèlo a pèrè.

Vous ec.

Cristian del doi ,

L'è un ceca poi ,

Ch'a s' vada ampò stermè ant un boi,

Empiomie 'l cul d' bora, o bièn,

Mandomlo a la malora.

Vous ec.

An conclusion


A l' ha nèn d' bon ,

Salvand ch' a l' è un gran ciaciaron,

A l' ha nèn mach d' ganassa, o bièn,

Soa lènga 'l cul a n' pnassa:

Vous m' entendrez bièn.



*Dialogo d' un Medico , e Marion,
che pare inferma.*

CANZONE XLI.

Di un pòch, Marion, cos' astu
Ch' i t' sès tant contrafatta?
Povrinna i t' sès mai staita
D' un sì cativ color,

Oh s' i t' volèisse piète
 Curiosità d' specète,
 Sì ch' i t' avrìe por.

Sburdiva pa sgñor Mèdich,
 Mi n' heu pa nèn pagura
 D' andè ala sèpoltura
 Tant dunna e fasilmènt,
 A l' è pa ancor un' ora
 Ch' j heu dait così pr dmora
 Marlait da molè ai dènt.

E còsa mai saràlo
 Ch' i t' has mangià d' contrari?
 A l' è pa to ordinari
 Trovète ant un tal stat;
 J' elo fòrs quaich· empiura
 D' ròba indigèsta e dura?
 Dilo pur cìair e nat.

J' heu mangià una supetta,
 Ma l' è una bagatèla,
 Faita ant una scudèla
 Larga com' un crivèl,
 E una dosènna d' grue,
 E vint miche cornue
 Ansèm a un quart d' vitèl.

Che bèla bagatlinna!
 J' elo pi nèn d' aggiunta?
 Va pur disènd, e conta,
 Ch' i scoto atèntamènt;
 Tra tant i peus butème
 Astà ansisi pr pième
 Cost pòch divèrtimènt.

Peui trant' e sinch sautisse
 Con sèt salam d' tèsta,
 Ch' a l' è una còsa onèsta
 Pr fè una colassion,

Con sès galinne nanne,
 E dës baravantanne,
 Un ròst, e doi giambòn.
 Sossì l'è pro quaicòsa,
 Ch'a mèrita la penna
 Pr fè ch' un Mèdich vènnà
 Senti sta novità:
 Cost'è una maladia,
 Ch'i peus di ch'la paria
 A m'è mai acapità.
 Lassème di sgnor Mèdich,
 A j'è ancor d'autra ròba,
 J'heu mangià un dindo an dòba,
 Un'òca, e un bèl gingòt,
 Con un mèr rub d'anguila,
 E tut loli pr dila,
 M'ha gnanch tocà 'l gariòt.
 A s'peul pro ancora vive
 Con sta pòca comèdia
 Pr nèn patì l'inèdia,
 E gnanch j strangojon.
 Na colassion paria,
 A m'par ch'a serviria
 Pòch manch ch'a un batajon.
 A j'è ancor quaicoseta,
 Ch'a l'è una forma antèra
 D'una bonna gruvèra,
 Tre tome e doi strachin,
 E peui ancor così pr ric
 J'avrai bvù tre sie,
 E sinch sès pinte d'vin.
 Mi seu pà còsa i m'dia,
 Che dòna dlicadinna!
 T'm'smie una cardlinna
 E d'boca e d'complèssion.

Com fastu mai povrassa
 A mantnì tanta grassa
 Su j' anche, e sui rognon?
 A j' è peu ancor la fruta,
 Ma vènta gnanch contèla,
 J' heu mangià una corbèla
 Piènnà d' pom verdas,
 Vint lire d' razaròle,
 E quindès d' sòrbe mòle,
 Disdeut mas d' ramolas.

Da costa maladía
 Ai va pr fète armete
 Almanch un sach d' brochete
 Ficà ant un lavativ,
 Trant' e sès lire d' mana,
 Mès rub d' epicoquana,
 Lolì l' è pa cativ.



Il Ceco mendicante.

CANZONE XLII.

Pòver bòrgno na,
 Così vad virand
 Tut quant 'l dì a taston
 Con me baston,
 E ciamand da ca pr ca
 La ca ca carità.
 I na treuvo con gran stènt,
 Ch' ogidì j' è d' sèrta gènt
 Ant cest mond

Pr parlè ariond
 D'una gran tènacità
 Pr fè d'ca ca carità.

A faran sauté ant un past
 La borica con 'l bast,
 E mai al us
 A fè 'l tabus.
 I na sènto apènna 'l fià,
 Oh che ca ca carità!

Na daran pi prèst ai can,
 Ma 'l pòvr òrbo ciama an van
 Esclamand
 E sospirand
 Ch'a l'han dàit una stiltà
 Ala ca ca carità.

Pr mantnì coul ambission
 A spèndran i dnè a baron,
 E tratant
 Un mèndicant
 L'ha pro bèl ciamè piètà,
 J'è nèn d'ca ca carità.

Ant un bal, ant un festin
 A risparmiò pa 'l quattrin,
 Ch'a l'han por
 D'nèn fèsse onor,
 Ma pr dène a un afamà
 L'han pa d'ca ca carità.

Ai na jè ch'a vèndrìo i dènt
 Pr podèje fè d'prèsent
 A quaich bèl
 Mostas d'amèl,
 Ma a sti sì parlèje pa
 D'fè quaich ca ca carità.

Tanti e tanti-sgairo i dnè
 Pr dè aj esto, o pr giughè:

D' aïtri peui
 A fè d' ambreui,
 Ma l' han sèmpe i di argrignà
 A fè d' ca ca carità.

D' vòte un crich, una passion
 Fa sauté un patrimonion,
 Ma loli
 L'è mai sèguì
 Da ch' l' mond è fabricà
 Pr fè d' ca ca carità.

Ai na jè pr piè lession
 D' arme, o bal, o cant, o son,
 Ch' a spèndran
 A larga man,
 Ma son peui tanpì attrincià
 Ant la ca ca carità.

Fie e dònne maridà
 Pr la pompa e vanità
 Quanti dnè
 Ch' a sin sgairè!
 Ma stimrio una viltà
 Fè d' ca ca ca carità.

J'è chi s' pia dij piasì
 Bin ch' a sio proibì,
 Nè guardran
 Lo ch' a spèndran,
 Ma l' han peui dificoltà
 A fè d' ca ca carità.

Quanti dnè se spèndo ancor
 Pr spuntè coul pòst d' onor,
 Coul dissègn,
 O coul impègn!
 Na spèndèisne la mità
 Pr ca ca ca carità.

Mi pòvr òm i seu papà
 Dont andè pr nèn patì,
 E tirè
 Quaich doidnè,
 A l'è mòrta, a l'è sotrà
 La ca ca ca carità.

Quante spèise ch'a s' fan mai
 Ant ij can, ant ij cavai!

Motobin

Podrió bin

Lassè tanta spamparà,

E, fè d'ca ca carità.

Che dla gènt ch'a rèsto sbris
 Pr ste alèghèt con d' amis,
 A spèndran
 Tut lo ch'a l'han,
 Ma daran pa un fi forà
 Pr ca ca ca carità.

Coste tèste da gridlin
 Pofarbaco, e spadassin

A m' guardran

Pa pi ch'un can,

Quand i ciama pr la strà
 La ca ca ca carità.

D'vòte i stagh dij dontrè di
 Con quaich onsa d'pan mufi,

Maginè

Che bèl stèntè,

Pur j heu bèl tni sospirà,

J'è nèn d'ca ca carità.

Veule un pòch ch'i dia mi

Le prsonne ch'a dan pì?

Son le gènt

Ch'a l'han dij stènt,

E pi prèst nèssèssità,
 Coi fan d' ca- ca carità.
 L'è peui lo ch' an tante ca
 A j' ariva d' stravacà,
 E san nèn
 Da dont a vèn,
 L'è ch'a son inimicà
 Con la ca ca carità.



Una Monaca mal contenta.

CANZONE XLIII.

Che spropòsit, che folia
 J' heu mai fait mi pòvra fia,
 Son pur staita spènsièrà
 A lassème dè la spinta
 Pr dovèje mnè si drinta
 Una vita dispèrà!
 I son fame prsonèra,
 E liame d' che manèra
 Pr le gambe, còl, e bras,
 Son an mès a quatr muraje
 Tra 'l martèl, ancuso, e tnaje
 Condanà a mastiè 'l cadnas.
 Ant 'l fème monighèta
 Mi pènsava d' vive chièta
 Sènsa crussi, e sènsa guai,
 Ma mi son con ste bizòche
 Tut 'l di a sonè le ciòche
 Contra 'l tren, e i tèmporai.

J'heu da fè cont ste volpassè,
 Ch'a son bonne marcacasse,
 A san bin giughè a picat.
 Ogni pcita bagatèla
 Vènta ampò sènti eclatèla,
 Tute desgagià d' filat.
 Squasi tute m' han pià d' mira,
 Una m' poussa, l' altra a m' tira,
 E mi son la balotà.
 Ai na veul dla sofèrènsa,
 Dla politica, e passiènsa
 Con ste tèste fagotà.
 Coul digiun e dissiplinna
 Con coul còro m' assassinna,
 Pur j' è gnunne rèmission,
 Fin a tant ch' la pèl a dura,
 Vènta stèje ala tortura,
 E pènsè a tirè 'l cordon.
 Ma s' j' avèis an tanta urgènsa
 Quaich prsonna d' confidènsa
 Da sgonfième ampò 'l gavas,
 A m' è vis, ch' an quaich manèra
 I provria pi lingèra
 Costa cros ch' a m' stropia i bras.
 Bin ch' 'l parlatòri ai sia,
 A sgonfièsse l' è folia,
 Dont a jè le ascoltattris,
 Ch' a stan lì a servive messa,
 E peui vau da la Badessa
 A contè tut lo ch' un dis.
 S' un veul scrive dontrè righe
 A quaicun, l' è pièsse d' brighe,
 Prchè a veulo lèse tut:
 Son curiose tute quante,

Sul prètèst d'fè le zèlante,
 Ma l'è pr' gavè 'l costrut.
 Jè nissun da gnunne bande
 Pr scotè le nòstre lande,
 Riservand 'l Confessor,
 Ma an diverse congiunture
 L'ha dco chial a piè d'msure
 Bèl è bin con costi umor.
 Le fassion a san dco fèje
 Tant le giovo com le vèje
 Quand a pòrta l'ocasion,
 Si ch'anlora van trovèsse
 Tra lor aitre pr ciusièsse,
 E fè i toiro da scondion.
 Son bin staita una tabussa,
 A saria mèi ch'i m'fussa
 Maridà con quaich faseul,
 A peul dèsse ancor ch'j avria
 Quaich piasì, quaich alègrìa,
 Ma ansisi jè sèmpre 'l deul.



Del Magnino alla moda.



CANZONE XLIV.

Chi ha da bsògn d'un bon magnin
 Sènsa spènde gran quattrin,
 S'a m'vorà,
 S'a m'ciamrà,
 S'a m'provrà,
 Veui ch'a s'gòda,

I me strumènt son dij pi rar,
 E d' un angign particular
 Pr travajè ala mòda.
 Mi son pa d' coi pataceui
 Ch' a van taconand d' paireui,
 Barachin,
 E bassin,
 E bronsin,
 E padèle,
 Le mie manœuvre son da sgnor,
 Miraco, ma j' avì pa ancor
 Vedune dle pi bèle.
 Mi son òm intèligènt
 Ch' i travajo su la gènt
 Ch' a l' han d' mai
 Naturai,
 O causai,
 Ch' ai dan pènna,
 E in cas ch' ai fussa quaicadun
 Privilègià, ch' a n' avèis gnun,
 Magara ch' ai vènna.
 S' un avèissa tuti i dènt
 Ch' ai locèisso fortèmènt,
 Pr rangè,
 Agiustè
 Costi afè
 L' è mia sfèra;
 J' heu una prsinna tal e qual,
 Ch' ai fa ste rèidi com' un pal,
 E dur com' una pèra.
 Un ch' avèis bin un bochin
 Ch' a fus largh com' un sestin,
 Lo strènsrai,
 Lo butrai,
 Le farai

A msura

Da un cant e l'autr i lo saldreu

Così polid, tant ch' i fareu

Stupì fin la natura.

Coi mostas tant pitocà,

Mi j fas seuli com' un dà

Con sgurè,

Con lustrè,

Con dovrè

Mia rasceta

Ch' a l' ha una tal qualità,

Ch' a spianna con fasiltà

Pr pòch ch' i carca, e frta.

Sa chi avèissa quaich gavas,

Ch' a fus largh pi ch' 'l mostas,

M' ij farai

Pa gnun mai,

Lo spianrai

Com' a bsogna,

Tajà ch' i l' abia lingèrmènt,

I lo saldrai pèrfetamènt

Con la mia carafogna.

Ch' j abie d' croste, o quaich potat,

I dagh man a me rasciat

Tut d' loton

Dij pi bon,

Fait a Lion

Pr st' usagi,

Loli gatia, e dà un piasì,

Ch' a fa restè mès andurmì,

E lustra bin 'l plagi.

Pr le scròle, e panaris,

Umor frèid, e reumatis,

Me sègrèt

L' è pèrfèt,

E l'efet

Giamai manca,

Con i me fèr, e con pòch feu

I fas ch' l'oli va tut an breu,

E m' descòmodo gnanca.

Le scarvasse j mando a spas

Con pochissim ambaras

Con l' unguent

Ecèlènt,

Ma bujènt

Dla prsinna,

E dlongh ch' i sai ch' a l' è arfrèidà,

I m' buto a dèje una raspà

Con una lima finna.

Le tignòle a man e pè,

Dèrbi e rognà da gratè,

E i boron

Dur com mon,

Pr mi a son

Tute ghné,

J heu lo ch' a fa bsògn ant me cassiòt

Pr rimèdiè tut ant un bòt

A coste porcarie.

S' ai fus quaicadun, ch' avèis,

Una gheuba ch' ai pesèis

Vènna si

Pur da mi,

Ch' i vedrì

Maravía,

Lo buto sul me cavalat,

E con doi bòt del massucat

La fas dlongh vantè via.

Pr le lupie i v' ampromat,

Ch' i fas vist e pris pranat

Con un' art,

Ch'ant un quart
 Coula part
 Rèsta franca;
 Le mie tesòire son dlicà,
 E d'un' assèl tant rafinà,
 Ch' 'l tai paras pi gnanca.
 Eve d'vòte quaich ciavèl,
 O quaich piaga su la pèl?
 L'è me afè
 A saldè
 Su doi pè
 Ste facènde;
 J'heu un saldador tut fait esprès,
 E stagn pi fin ch' l'argènt istès,
 Ch'a fan còse stupènde.
 Chi volèissa peui ch'ij fèis
 D'fontanèle, o ch'i saldèis,
 Fè pur çont,
 Ch'i son pront
 Con bon front
 Pr serve:
 I veui ch'i die, o'l brav Magnia!
 Lolì l'è un travajè da bin,
 A mèrita bin d'vive.
 Sève fòrsi sfogonà
 A gran fòrsa d'canonà?
 A sti guai,
 J'arsènai
 Son pa tai
 D'armedièje
 Com'a faran ij me garson,
 Ch'a san butè i seu brav tacon
 Dont a fa bsògn d'butèje.
 Le moròide ch'ij patis
 Fassa cap dal me imprèndis,

Le soe man
 Na faran
 Prèst arlan
 Mèi dle mie ;
 I v' assiguro ch' a l' è car ,
 E pr sti afè particular ,
 I conto pa busié.
 Lo ch' a s' trata d' ajassin ,
 Mi son l' òm' l' pi latin
 Pr gavè ,
 Sradichè
 Dant j pè
 Ste brignòle ;
 Con le mie pinse faite a vis
 Mi ij ranco finna la radis
 Giust com ranchè d' famiòle.
 Pr tajè j' onge ancarnà
 J' è pa n' autr pi arnomà ,
 Nè pi fin
 Del Magnin
 Pr fè bin
 Sti mèinagi ;
 Con le mie tnaje faite a dènt ,
 Mi ij barbo délicatamènt ,
 E tute ant un sol viagi.
 Dème prèst da travajè
 Dnans ch' i vada fè 'l fait me ,
 Prchè mi ,
 Stagh mach si
 Pr cumpi
 Dontrè cure ,
 E peui j' antasco i buratin ,
 E prosèguisso me camin
 Pr brich , e pr pianure .



Pentimento Fratesco.

CANZONE XLV.

Oh mi pòvr òm i son pur disgrassià,
 Sì ch' i l' hai feita a volèime fè Frà,
 Sì ch' i l' hai feita a volèime fè Frà,
 I son butame a fè un dròlo d' mestè,
 Ch' a dila caira jè nèn da vagnè,
 Ch' d' male neuit, e cative giornà,
 Con d' crussi, fastidi, dissiplinne, digiun, e
 (fratade,
 Sì ch' i l' hai feita a volèime fè Frà,
 Sì ch' i l' hai feita a volèime fè Fra.
Quand i m' trovèr drint a coul novissia,
 Son restà fol, mut, e ciòrgn, e sbòrgnà, 2
 Chi m' avèis vist, a l' avrà stimà?
 Chi fus un such, tant com' j' era ancantà,
 I smiava giust un baston anmantlà.
 Con d' crussi ec.
Buchè ampò si ch'è bèl drap d' maison, I
 Del qual a m' han turnicà 'l cotrion, 2
 E pr sparmie botonère, e boton, 4
 Giust com' un sach m' han lià d' un cordon,
 Con pì m' agiusto, son pì fagotà.
Da li pòch tèmp a m' han fame butè
 Una sòrt d' scarpe ch' a fan pa i caliè, 2
 A son duvèrte pr dnans e darè,
 Ch' j' heu stentà bin a podèimie càussè,
 I son trovame mai tant ambrojà.

M'han dame d'braje ch'a fan compassion,
 Son pès ch'coule ch'a pòrto j viton 2
 Con una vènna anfilà d'un cordon,
 Ch'a fan figura d'mudande, e barton;
 Che rassa d'mòda ch'a l'han invèntà.

A vènta sbate sovèns 'l merlus,
 Ch'a l'è frtèsse com bate s'un us, 2
 Gnanch un galiòt l'è pa tant savatà
 Com'a l'è 'l cheuir, e le spale d'un Frà,
 Dèje pur giù, ch'a l'è pèl afaità.

Gara s'i somo trapà a fè i ciarlon,
 A n'fan mnè subit la lènga a rablon, 2
 Sènt rivèrèns, e inchin pr giornà,
 Ch'la pòvra schinna l'è mèsa dernà,
 E chi s'lamènta l'è dlongh licènsià.

Vènta ch'i fasso ogni sòrt d'mestè,
 Mèistr da bòsch, murador, e caliè, 2
 Andè frtand le bardèle aj autar,
 Fè l'ortolan, ciavurin, portinar,
 Ramassè scale, stradon, e 'l sagra.
 S'un podèis vede ant la pansa d'un Frà,
 Un j trovria un giardin trapiantà, 2
 Rave, sicòria, d'endivie, e spinas,
 Card, e caròte, cossòt, ramolas,
 Laitue, sèlèri, e còi carpionà.

Oh che misèria l'è mai con coul vin
 Ch'a dan a taola sèira e matin, 2
 L'è d'ordinari pi d'mès avansà,
 Airi, puntos, e picerla rablà,
 L'è bin miraco s'a l'è nèn bodrà.

Un' altra còsa ch'a l'è da contè,
 A jè coul pan ch'a l'è drint al panè 2
 Fait con d'arprim, e mostura, e grossè,
 Ch'a digèrilo jè tuti i dafè,
 L'è giaun, e vard, e turchin, e marbrà.

- Tute le neuit fin al gròs dl' invèrn
 A vènta andè fè doi ore d' gnaugnà, 2
 E peui après bin ch' un s' vada a scaudè,
 Surti dal feu, dlongh un torna trambè,
 Lolì va an leu dle caudanne dl' istà.
 Ma peui s' almanch après tant besodiè
 S' andèissa subit a tavo a mangè, 2
 Vènta di prima tut so mancament
 An genojon fòrt e publicament,
 E peui spetè d' esse pènitènsià.
 E vaire vòte ch' a jè pa ocasion
 Vènta andè an tèra mangè an genojon, 2
 E dla mnèstra a n' fan contèntè,
 E smia ancora ch' a n' venjo grassie,
 E chi fa 'l nèch a l'è pi petoirà.
 Tute ste lande son del novissia,
 Pòch manch a coui ch' a son già desgrojà, 2
 Al' ossèrvansa a n' fan tuit caminè,
 Nè vèi, nè giovo gnun s' peul esèntè
 Anfora d' esse dautut besancà.
 Quand i pènsomo arivè a un bon disnè,
 Oh che cagninna con coul' cusinè! 2
 A sa mach fè le soe torte salà,
 O mal condie, o pi d' mèse brusà,
 Con una mnèstra bin mal tapassià.
 I seu potagi pi bon ch' a sa fè,)
 A l' è quaich vòta ch' a fa fricassè 2
 Fidich e tripe con carn avansà,
 Cousse, sùbrich, o dij gnòch spotrignà,
 Còste, marsanne, o bolè anfarinà.
 Sossì saria ancor tut da sufri,
 S' almanch peui d' neuit an lassèisso durmì, 2
 Ant 'l pi bon vènta andè a matutin,
 Chitè pajassa, cuvèrte, e cussin,
 Trist a chi manca, l' è dlongh castigà.

Quand un sènt nèn la trabaca sonè,
 Pi prèst ch' an prèssa jè chi vèn ciamè, 2
 A vènno dène bin tanti tabus,
 Ch' a fan pr fòrsa sgabiè fòra dl' us,
 E marcè an còro ancor mèss signocà.
 Ma còsa sèrvlo ch' i m' tènna sgonfià,
 Adès ch' i m' treuvo ch' i son angabià, 2
 Tant j' heu bon pat a tirè me cordon
 Fin ch' la carcassa, e la pèl tènno bon,
 Fè finta d' nèn, e pi gnanca fè fià.
 Con d' crussi, fastidi, dissiplinne,
 Digiun, e fratade,
 Pènsèje bin dnans andève fè Frà,
 Pènsèje bin dnans andève fè Frà.



LE BIZOCHE

CANZONE XLVI.

S cotè ch' i veui cantève
 Una canson curiosa,
 Ch' a l' è ridicolosa,
 E dròla a tut andè,
 Faita su le bizòche,
 Ch' a son fumèle gnòche,
 Codògne bèle e bonne,
 E tèste da brandè.
 L' han sènt bagianariè
 E crich ant la testassa,
 Ch' a tènno sèmpèr bassa
 An Gèsia, e pr la strà,

Con coula soa cèra
 Cuvèrta an tal manèra,
 Ch'a smio giust babòje
 Da sbaruè d' masnà.

Quand a tapinno an Gèsia
 Van ardrissà a la bonna,
 Portand la sua corona,
 E coul uffissi an man,
 Piènne d' ipocrisia,
 Con so còl tòrt, ch'a smia
 Ch'a sio già bèate,
 Bin ch'a na sio lontan.

A van a strojassèsse
 Ant un canton a sprme
 I seu limon, e geme,
 E pugnanghèsse 'l pèt,
 Sospiro, ch'un diria
 Ch'a son ant l' angonia,
 Ma tute coste vèrgne
 Ai faran pa an sègrèt.
 Peui van pr descarièsse
 Ant un confessionari
 Dij scrupol, e dij cari
 Ai pè del Confessor;
 Ma con sènt frascarie
 Ai rompo mach' j' orie,
 E lolì dura un' ora,
 E d' avantagi ancor.

Arivà a ca peui gara
 A chi j vèn pr le piste,
 A son mai così triste,
 Com quand a s' van confsè,
 Pr pcite bagatèle
 A dan an ciampanèle,

Ch' a smia giust ch' a veujo
Brusè la ca, e 'l pajè.

A veulo pro paresse
Après al mond prudente,
Pacifiche, pasiènte
S' ai lasso vive an pas;
Ma vènta pa gatièje,
Ch' a sio giovò, o vèje,
Nè pr da bon, nè an burla
Sofèje sout al nas.

Son vipère maligne
Ch' a l' han 'l tòssi an boca,
E gara s' un j toca,
Dlongh aj argrigno i dènt;
A son così stissosè,
E così puntigliose,
Ch' a fan pr bagatèle
Dij gran risèntimènt.

La magior part son garghe,
E mòle com potia,
E guai a l' òm s' ai crìa,
A fan ancora pès;
Impiègo 'l tèmp an ghnè,
E soe bisodiarie,
Fratant j' afè domèstich
Na stan tavòta d' mès.

Buchè com' ant la cèra
L' han l' umiltà dipinta,
Ma s' un podèis peui drinta
Sciairè so sèntimènt,
Miraco, ma un trovria
(I crad pa di busia)
Una supèrbia tala
Da fè stupì la gènt.

Coste sante mitocè

A s' mostro tute quante

Après al mond zèlante

Dla mortificassion,

A s' vanto an aparènsa

Amie di' astinènsa,

Ma son bèle galupe,

Ch'a tiro ai bon bocon.

A fan le scrupolose

Talmènt, ch' ancàlo gnanca

Tochè (ch' 'l cheur ai manca)

Con le man oite 'l gras,

Ma lolì son vergnasse

Ch'a fan ste bagianasse

Tute pr vana glòria,

Ch'a valo gnanch un stras.

Ai n' è ch' a van vestie

Da vod, e da tersiarie,

A marcio nèn su j'arie,

Chi sa pr qual rason?

Ai na sarà, ch' a spènde

La veulo nèn intènde,

E d' aitre peui lingère

Com tanti parpajon.

A fa piàsì sèntije

Descore dla Scritura,

Quandbin a sio d' natura

Pi gòfe ch' un stival;

Tant coste dotoresse

Fan le tèològhesse,

Lontane da savèje

S' a dio bin o mal.

Sta rassa d' mone grèche

S' ataco pès ch' j' avie

A tute le granghie,

E ronse dij busson ,
 Son tant armognose ,
 Ch' a s' rendo a tuit nojose ,
 Testarde al par dle mule ,
 Piènne d' supèrstission.

Coule ch' a l' han fiolansa ,
 Ai dan pro bonna scòla
 Dla vita garga , e mòla ,
 Ch' ai fa pa mal ai rèn ,
 Ma rèsto com lambrosca
 Ch' a fa nè vin , nè posca ,
 E tra miton mitèna
 Ch' a son mai bon a nèn.

A fan la gnifa aj oimo ,
 E veulo gnanch guardèje ,
 E manich ancor parlèje
 S' a jè quaich sugèssion ;
 Ma s' a quatr eui a peulo
 Avèje coul ch' a venlo ,
 A l' è un bèl seugn s' a lasso
 Scapè coul occasion.

A son d' umor hisbètich ,
 Caciarde e gramignose ,
 Moschinne e caprissiose ,
 S' ofèndo d' ogni pòch :
 L' han d' lènghe da pessidire ,
 O pr di mèi tesòire
 Ch' a foro , tajo , e squarso
 E pòrto via 'l tòch.

A van pro tant ch' a peulo
 Tute coste Luchinne
 An Gèsia ale dutrinne ,
 A prèdiche , e funsion ,
 E fin a j' esèrsissi ,
 Ma pòso pa i seu vissi ,

Quandbin a vanto an publich
Tuta la divossion.

Ai n' è d' un' altra stampa
Dsdà a fè le pitòche,
E l' han dle bonne gnòche,
E i seu quajat da part;
Ma son usà adorèje,
E prima d' antamnèje,
Mi crdo ch' a s' fario
Butè pi prèst an quart.

Vnomo a le matòte,
Ch' a instigassion dla mare,
Sènsa gnanch dilo al pate
A fan vod d' castità:
Ma coste pòvre fie
Da li pòch tèmp pèntie,
A dan peui an matèria,
Ch' a smio anspirità.

O via là furniomla,
Ch' i veui pa pi inoltrème,
Prchè i podrìa fème
Ancor rompe 'l mostas;
Fratant pr mi diria,
Ch' 'l mèi ripiègh saria
Tute ste bigotasse
Campèje là ai crovas.

LE MADREGNE

CANZONE XLVII.

Pòvri fiast, e pòvre fiastre,
 Quanti guai con ste marastre,
 Ch'j' avi mai fin dsor ai sign,
 Pr mi in quant i compatisso.
 Vòstra sòrt, e j' aborisso
 Coui umor còsi malign,
 Còsi malign.
A son squasi tute quante
 Mal grasiose e stravagante
 Con ste fie, e con sti fieui,
 Ai petoiro com'a veulo,
Ai fan tuti i tòrt ch'a peulo
 Sènsa mai fèje bon eui.
 Solamènt coul nòm d'marastra
 A l'è un titol ch'a j' ampiastra
 Ogni stima, e bon concèt,
Dà bin pòchi un sènt lodèje,
 Ma pitòst vitupèrèje
 A risguard dij seu difèt.
 Fin th'ij fieui a son maraje
 Ai fan geme an mèss dle tnaje,
E sovèns ai dan so lard,
 Ai na fan mai una bonna,
 Ai manegio ala carlonna
 Com marmaja, e com bastard.
A procuro conservèje
 Bin lingèr pr pa agravèje

Tròp l' stòmi del mangè,
 Van dasèndie ste cosete
 Pi d'arfud, e pi gramete,
 Basta mach ch' ai tènno an pè.

A s' na pio pòca cura,
 E s' a r' fus ch' a l' han pagura
 D' incontrè d' mormorassion,
 I m' figuro ch' ai guardrio
 Gnanch adòs, ma ch' ai lasrio
 Con le tripe andè a rablon.

A fan nèn mach sbramassèje,
 E continuamènt mangèje
 (Com' a s' dis) le carn adòs,
 L' è peui lo ch' antisichisso
 Dla manèra, e ch' anmairisso,
 Ch' a l' han mach la pèl e j' os.

A jè motobin d' marastre,
 Ch' i vedrì d' vantè giaunastre
 Pr la bile, e gran fumat
 Ch' a l' han contra sta fiolansa
 Pr la minima mancansa,
 Ch' a sarà nèn pì ch' un pat. ?

A s' industrio tavòta,
 E procuro fèje bòta
 Con quaich tir malign sout man,
 Prchè tuta la soa mira
 L' è podèje fè piè an ira
 Fin dai gat, e fin dai can.

Pr sti fiast, e coste fiastre
 L' è ancor pès, quand le marastre
 A l' han dla fiolansa lor,
 Vènta-pro ch' a pènso d' fèje,
 A volèje o nèn volèje,
 Le servènte, e i servitor.

Gara a lor s' ai desgustèisso
 Marlestin, e ch' ai truchèisso
 Ant la punta d' un cavèi!
 A podrió pro segnèsse
 Dla mancinna, e peui butèsse
 A scapè su di j fornèi.
 S' a son fièui, o fie grande,
 Son pi gròsse peui le lande,
 Le gabèle, e le quèstion,
 Ma son còse gnanch da die,
 Ste marastre invipèrie
 L' han tavòta ancor rason.
 La pi part a l' han l' usansa
 D' infamè costa fiolansa
 Tant ch' ai pòrto via 'l tòch;
 Ogni pcita bagatèla
 A la san amplifichèla
 Con le frange, e con i fiòch.
 Ma so fòrt a l' è 'contène
 Ai so pare, e destachène
 Giù pr drit, e pr travèrs,
 A fan tuti ij sfòrs pr fèje
 Piè sui còrn, e scrèditèje
 O pr cost, o pr coul vèrs.
 E s' a peulo nèn poussèje
 Tant ch' a basta pr butèje
 An desgrasia del marì,
 A s' butran a fè d' matèrie,
 Ai diran tante misèrie,
 Ch' ai faran restè slurdì.
 Quand ai vedo fè d' caresse,
 A s' gavriò fin le tresse,
 E i cavèi dant 'l cupis,
 Loli j scauda an tal manèra,

Ch'ai scaprà pr' bile an tèra
 Tut l' spas ansèm al pis.
 Oh che lande, oh che gabèle
 Minca pòch con ste fumèle,
 Oh che moro, e brut ojas!
 A son còse da tirèsse
 J sgrignon après, e fèsse
 Massacrè le spale, e i bras.
 I giugria mile piastre,
 Ch'a jè nèn tra sènt marastre
 Unna, o doc afèssionà
 A coui fieui, o coule fie,
 Ch'a j' han nèn lor parturic,
 Crde pur ch'a l'è vrità.
 S'aj ocòr quaich maladia,
 Ai ciadèlo mach ch'a sia
 Con un atènsion da can,
 A vorio vede dunna
 A portèje ant una trunna,
 E sotrèje al andoman.
 Voi ch' i veule armariève,
 Pòvri Vido, còsa fève
 Quand j' avì già dle masnà?
 L'è un bagian chi s' ambarassa,
 E s' ataca con sta rassa
 Tant scrussia, e squinternà,



Le Figlie di Stefano Brombo.

CANZONE XLVIII.

Stèvo Brombo l'ha tre fie,
 Ch' a son tute anamorà,
 Ch' a son tute anamorà.
 A son nèn tre maraviè,
 Ma gnanch da campè ant la strà.
 Unna è bionda, l'autra è brunna,
 L'autra del color caffè.
 A vorio trovè dunna
 Quaicadun ch' ai volèis piè.
 Son butasse antorn al pare
 Ch' ai serchèissa quaich parti.
 J' ha rispòst, mie fie care,
 Lassè pure fè da mi.
 J' è tre Giovo, sai dont pièje,
 Ch' a stan tuti tre sul so.
 I mandreu sout man parlèje,
 A diran pa nèn ch' d' no.
 L' han ancor (da lo ch' i sènto)
 Tuti tre la soa virtù.
 Un fa i fus, e l' autr i pènto,
 L' autr è cap dij stras e miù.
 Son andait a visitèje
 Dlongh ch' a son stait avisà.
 A l' han fait nèn mach buchèje,
 Ch' a son stane carpionà.
 Ant 'l tèmp da plè una rava
 A l' han acordà l' afè.

J' un la prèssa ai sbrgiairava ,
 J' aitre avio 'l fey darè.
 Così tuti ansèm a fèro
 Le promèsse a la volà.
 E pr testimòni a pièro
 Giambatista, e Nicolà.
 L' andoman a son levasse
 Tute tre sul fè del dì,
 A son dunna desgagiasse,
 E marcià a fèsse vesti.
 Unna del color d' anguila,
 L' altra del color del breu ,
 E la tèrsa l' han vestila
 D' un garnac tra vard e bleu.
 Tre dì après a son sposasse,
 (Chi l' avria mai crdù !)
 E le nòsse ch' a son fasse
 J' han costaje pi d' un scù.
 Furnì 'l past, coula brigada,
 Dòp avèje tafià pro ,
 S' artirèr ala sfilada
 Sodisfà da còui ragou.
 Coste nòsse, e sti mariagi
 Fait ansèm li su doi pè,
 L' han-fait rie ant coul vilagi
 Tuti quanti a slambanè.
 A l' avio le livrèe
 Del color dij fricandò,
 E le gènt dant le butèe
 Tuit surtiro a fèje d' ò.
 L' andoman matin andèro
 Sènti messa vèrs mèsdì,
 E tampi ni manch a l' ero
 Ancor tuit mès ancuti.

Ai ventavà ampò sentie
 Zongonè tut longh dla strà.
 A smiava un bus d'avie,
 O un vespè ant 'l bon di' istà;
 A buchè ste maravie,
 Basta di, tut è corù,
 Prchè còse pi da rie
 Gnun j' avia mai vedù.



*Dialogo tra Madre, e Figlia che vuol
 maritarsi.*



CANZONE XLIX.

Mare"mare dème ardris,
 Vedve nèn com' i patis,
 Fème ampò nèn stantè,
 Ch' i peus pa pi nèn spetè,
 Dème prèst, fème 'l piàsì,
 Quaich bèl Giovo pr mari.
 Còsa sonne ste rason,
 Distu an burla, o pr da bon?
 Veustu ampò ch' i daga man
 Al toiror, o foat dij can?
 I t' fas pro sicuramènt
 Passèll vzo ant un momènt.
 Che cheur dur, che crudeltà!
 Vedve nèn ch' j' heu già l'età?
 Haine sèmpre da fè 'l stras
 Ant sta ca a sèrne i spinas?

A m' par bin ch' a l' è giu mai.
 Tèmp d' surti da costi guai?
 Oh che prèssa, oh che vision!
 I t' has pa gnanca ancor j spron,
 I t' sès pa ancor bonna a fè
 Una mnèstra da vachè,
 Veustu mèinagè 'l cassul
 Con la grèuja ancor al cul?
 Da sì un mèis e dontrè di
 J' heu peui quindès agn cumpi,
 E volive gnanch ancor
 Ch' i comènsa fè l' amor?
 Ai n' è tante, mi lo sai,
 Sposà giovo com' un' aj.
 Còsa tènstu ancor ciancià
 Bruta lènga da stropià?
 Fin adès t' has mai vojù
 Aplichète a la virtù,
 T' sès pa ancor erba nè fèn,
 E pr ditla bonna a nèn.
 E volive an conclusion
 Vedme dè an dispèrassion?
 Còsa peui n' avrive mai;
 S' i m' vedrì fè j' ultim bai
 Pr desgust, e pr dolor?
 V' acquistrè pro bèl onor.
 Va marlait s' i t' has tant front
 Da tò pare a dène cont,
 Quand a sapia 'l schiribis
 Ch' è sautate ant 'l cupis,
 A t' farà fòrsi cambiè
 Coul umor, e coul pensè.
 Pr me pare è pa cativ,
 I lo seu pr positiv,
 Pur ch' i m' preste voi la man,

E ch' i bute 'l vostr' gran,
 L'è sigur ch' a dis pa d' no,
 E mi dlongh i son a ciò.
 Quand to pare lo savrà,
 Oh che gnogne ch' a t' farà!
 I t' has pa ancor conossù,
 Nè provà l'umor borù
 Ch' a l' ha quand ariva 'l cas,
 Ch' 'l fumat ai sauta al nas.
 Sta rason mojà ant 'l lait
 A m' sbarua nèn afaìt,
 I seu bin 'l cheur ch' a l' ha
 Tenèr com' una quajà,
 E ch' a l' è così bon fieul,
 Ch' un lo vira com' un veul.
 Chièlo coul ch' è stait tant lèst
 Pr robète 'l cheur si prèst?
 Gnun ha mai ancor vedù
 Nessun Giovo ch' sia vnù
 Sì pr ca fète l' amor,
 E passè pr to sfojor.
 Quand i sapie coul ch' a l' è,
 Forsi voi v' apasirè,
 A l' è un bèl garson bin nà,
 Spiritos, e desgagià,
 E d' una famia tal,
 Ch' a s' peul nèn parlèsne mal.
 S' a fus' bin 'l fieul del Rè,
 Tì t' sès nèn dà maridè,
 T' has pa ancor un pluch' d' fardèl,
 Còsa mènstu 'l bertavèl?
 Va amparè filè e cusì
 Dnans d' mariète, e tasme lì,
 A m' par bin ch' i lo savi,
 Ch' a son rair i bon partì,

E ch' a vènta pièje al vòl
 Pr nèn rompsè d' vòte 'l còl
 Piand quaich lord o patanù,
 Ch' abia nèn ch' j dènt e 'l mnù.

Atsàdès tèn bin da mènt,
 Ch' i t' arfilo un sgiaf sui dènt;
 Tirme via dant i pè
 Sènsa fèilo rèplichè,
 E con to bèl umorat,
 Vèn pi nèn rompmè j garat.

Voi i veule ancora fè
 Ch' 'l mond parla del fait mè,
 I m' farì piè pr da bon
 Una tal arsolussion,
 Ch' a n' farà fòrsi pènti
 Tute doe, voi e mi.

T' has fait bin, e santamènt
 A scuryi to sèntimènt,
 I t' has dame la lession
 Pr butème an atènsion
 A desblète i teu disègn,
 Lassa pur la mi l' impègn.

Piève ampò nèn tant ambreui,
 Ch' i savreu fèvla su j' eui,
 Marcandème pur di e neuit,
 Tant i savrai dème deuit,
 E fève restè an tal cas.

Con na branca e mèsa d' nas.
 Adès sì ch' i vedo bin,
 Ch' i t' sès lorda, o piènna d' vîn,
 Fa una còsa, va a durmì
 Fin ch' i t' l' abie digèri,
 Tramandrè fòrsi doman
 To servèl sarà pi san.

*Uno che si vorrebbe maritare, ma non sa
a qual Donna appigliarsi.*

CANZONE L.

Mi m' voria maridème,
Ma j' heu por d' angavignème,
E carième d' una cros,
Ch' 'l fumlam pià com se sia
L' è una sèrta marcànsia,
Ch' andvinèla l' è scabros,
Ch' andvinèla l' è scabros.
Una bèla a m' piasiría,
Ma sarà pa tuta mia,
Prchè a tuit a pias 'l bèl,
A l' avrà cinquanta givo
Sèmpre antorn, cha sarà privo
Ch' i restèis un bèl osel.
Gnanca bruta i veui pa pièla,
Ch' a m' vnèis veuja d' campèla
D' vòte peui s' un liamè,
Prchè vedse una frèidura
Sèmpre dnans, l' è còsa dura
A podèila suportè.
S' i m' butèis a fè la ronda
A quaich una ch' a fus bionda,
I restria fòrs gabà;
Motobin l' han curta vista,
A son mòle com la rista,
E d' un natural dlicà.

S' a m' santèissa peui la lunna
 D' acobième con quaich brunna,
 I saría dco ambròjà :
 Tutta costa sòrt d' fumèle
 Son ardìe e tartavèle,
 E pi d' j' aitre acalorà.
 Quante angano dco la spia,
 Ch' a buchèje ognun diría,
 Ch' a restran mai mangagnà,
 Ma patiènd peui la graviansa,
 Un ij vad a cambiè ciansa,
 E restè d' ocat bagnà.
 A s' peul dè ch' i capitèissa
 Una turgia, e chi restèissa
 Sènsa erède, e sucèssion;
 O peul esse ch' a saría
 Una vaca a dè an partía,
 Ch' a m' na fèissa giù un baron.
 Coni ch' a pio ste goblue,
 Ste morflose e gavassue,
 A l' han bin un gust da gnòch;
 Sève lo ch' mi na faría?
 L' è sigura ch' ij daría
 Tute an cambi d' articiòch.
 M' è pi car piè una borica,
 Ch' una fomna ch' a sia rica,
 Ch' un la peul pa dominè,
 Tuti i dì pr lor l' è fèsta,
 E l' han tanta bòria an rèsta,
 Ch' a s' vergògno d' andè a pè.
 Piè quaicunna sènsa dòra,
 Quand i fèissa coula bòta,
 I saría bin un mat,
 A m' costría bin la sausa

A sposè una rova scausa;
 E mantnìla ancor sul pat.
 Una ch' abia gran habia,
 S' i la pièis a m' sturnichria
 Tuti quanti i di 'l cupis,
 E peul costè d' ordinari
 Son sfrontà com d' urinari,
 E l' han pòch o nèn d' ardris.
 S' i m' carieis d' una mutinna,
 A m' faria vni la flinna
 S' a m' parlèissa pòch o nèn;
 Da ste sì un peul pa gavèje
 So pensè, nè mai savèje
 S' a l' è nivó, o pur sèrèn.
 Piè quaicunna tròp alègra,
 A peul esse una pèlègra,
 O ch' a l' abia bin pòch sust,
 E ch' a m' oblighèis a pièje,
 A volèje a non volèje,
 Bin sovèns quaich msura d' bust.
 A carieime d' una sposa
 Ch' a fus tròp malinconiosa,
 Che piasì n' avriine mai?
 Vedme fè tavòta 'l muso,
 I restria dco mi un tuso,
 O ch' j avrio sèmpre d' guai.
 M' han propòst una garsonna
 Vèramènt d' famia bonna,
 Ma l' ha un nas ch' è tròp puntù;
 Coule li son tròp dotorue,
 Puntigliose, e subricue,
 Tant ch' a m' han pa mai piasù.
 Unna ch' abia 'l còl da grua,
 Mangia d' ròba cheuita e crua
 Sènsa invidia a un animal;

Ala larga una paria,
 L'è pèricol ch'a m'butria,
 Prèst aji us, o al ospidal.
 N' autra ch' fassa la piètosa,
 Am'pias nèn ch'a m'par svèrghosa
 Fatta esprès pr gabè'l mond,
 S'i na pièis una paria,
 L'è infalibil ch'i saria
 Sènsa riva, e sènsa fond.
 S'i ciapèis bin gròssa dòta,
 Ma ch'a fus una bigòta,
 I faria un gram giornal;
 Coste sì son d'una rassa,
 Ch'a s'fan vede sante an piassa,
 Ma son tèste d'paramal.
 A saria còsa dura
 ,Sia m' tochèisa pr svèntura
 Una fomna desbaucià,
 Com pur tròp ai na j'è tante,
 Ch'a s'figuro esse galante,
 Ma fan mille pastrocià.
 E, s'i capitèis quaich lòira,
 O servèl da davandira,
 Com'avriine mai da fè?
 L'è innègabil ch'a m'faria
 Consumè tut lo ch'j'avria,
 E peui fòrsi ancor crpè.
 Ma mi veui furnì sta landa,
 Già ch'i seu pa da che banda
 Trovè coula ch'a m'convèn,
 I concludo, e peui i taso,
 E mandrai a fè dal'aso
 Le fumèle, e chi i sostèn.

Le Figlie da maritare.

CANZONE LL.

Scorè bin, voi aitre Fie,
 Gh' i sè tant acalorà,
 Ch' a s' peul disse ch' j' aviscrìe
 Le motère an mèd dij prà,
 Ch' a s' peul disse ch' j' aviscrìe
 Le motère an mèd dij prà.
 Acogève ant quaich bialèra
 D' un mulin, o d' un bator,
 A sarà la mèi manèra
 Pr' calmève coul calor.
 Fòra apènna dant la greuja
 I comènsa furmiolè,
 Peui a v' sauta dlongh la veuja
 D' esse sposè al carlevè.
 E già ch' i sè tant ardìe,
 A sarà mèi pensà
 Ch' i v' arvòite pr' j' urtie.
 Quaich matin su la rosà.
 Pr' smiè bèle i v' onse' l plagi
 Del mostas, del còl, e man,
 Ma sarà manch darmagi
 S' i dovrèisse d' sira d' gran.
 Quand i sè peui già grandette,
 E giamai da maridè,
 I fè dlongh le brufiètte
 Pr' podèive fè stimè.

Ale fèste pr tiffève

I ste mèsa la matin ,

Ma loli l'è tut pr fève

Marcè après tuit i gridlin.

Peui a v' ciapò ala brassetta

Pr mnève un pòch a spas ,

E contève quaich barsletta

Ampastà tra mairi e gras.

E voi rie com d' folasse

An scotand coule rason ,

Tant ch' i slarghe le ganasse ,

Ch' ai podria intrè un micon,

La pi part d' voi aitre inclinne

Mach a ròbe d' vanità ,

Costa l'è (pòvre doninne)

Tuta vòstra santità.

J' avì 'l vzo quasi tutè ,

E 'l servèl fòra da pòst ,

D' esse bèle , d' esse brute,

I sè tante scume d' ròst.

Gioventù , dnans piè ste fie ,

Pensè bin a lo ch' i fè ,

Sève nèn ch' a son granghie ,

O sia ronze da brusè ?



LE MODE

CANZONE LII.

Oh quante mòde baravantanne
 Ch'a va invèntand la vanità!
 Ai passa pòchi mèis, o smanne
 Ch'un veda nèn quaich novità:
 Che smargiassade,
 Che arlichinade
 Tant strambalà ch'a fan sturdì!
 Oh le mòde, malan ale mòde,
 E quand voranne mai furnì?
 I n'heu vedune già tante e tante,
 Ch'a j'è pa forma tnie a mènt;
 Ma tute ant coste gènt galante,
 Ch'a l'han la tèsta piènna d'vènt;
 Prsonne sòde
 Stan pa ale mòde,
 Ansi ch'ai peulo pa sufri.
 Oh le mòde ec.
 Le mòde son pr còste prsonne
 Ch'a san pa còsa fè dij dnè,
 O ch'a son tròp dautut tomonne,
 Ch'a j'è pi car pi prèst giunè,
 O fè dij dèbit,
 Comprand a crèdit,
 Con sènt pastròc mèi da tasi.
 Oh che spropòsit, oh che folie
 Andè sgairand così i quatin
 D'antorn a tante frascarie

Da butè adòs ai buratin!
 Epur ch' ai vada
 Tuta l' intrada,
 La gènt gridlinna veul lolì.
 Parland mach solamènt dle quèfure,
 Oh quanti toiro difèrènt!
 Ris, è topè, e anmaronurè,
 E sinquant' atri cambiament;
 E ste smargiasse
 Con le carcasse,
 Ch' a smio giust rovat turnì.
 Quante manèrè son già trovasse
 D' orcin, bindèi, fissù. e colie,
 E antorn dla tèsta ficognasse
 Punte, fior, e gabriolè:
 Vaire cosete,
 Scufie, e cornete,
 Hanne cambià già ai nòstri di?
 D' un tèmp portavo la quèfa an tèsta,
 Or le mandilie son in us,
 Con so capus, massime d' fèsta,
 Ch' a s' buto ancora pi sul fus;
 E tute quante
 Con j' angagiante,
 Ch' a s' pòrto ansèm fin a durmì.
 Vèntava vedie quand a portavo
 Coule gran creste a dontrè rèn,
 A l' è sigura ch' a smiavo
 Babao surti d' an mèl al fèn,
 Peui d' arxivòle
 Sèmpre pi dròle,
 Peui nèn dautut ch' a l' è ancor pi.
 Dnans a portavo le gènevrinne,
 Adès a pòrto 'l parasol,
 E d' aitre van con le caplinne,

Ch'a smio tanti virasòi;
 E tante veulo
 Fè pi ch'a peulo
 Mach pr podèje comparì.
 Prima fasèndse le soe tresse
 Con un ponson fasio 'l borlat,
 Peui con butè d' aguce spesse
 L' han comènsà fèsse 'l copat;
 Peui d' sèrté creste,
 Ch'a smiavo d' seste
 Con i canton largh sinch sès di.
 Un viaggi usàvo le palatinne,
 Ch'a l' era un gnòch e dròlo d' pòrt;
 Peui maraman le pèlègrinne
 Or bianche, or nèire, or d' altra sòrt,
 Moschè postisse,
 E dle manisse
 Vint cambiamènt son già surti.
 M' arcòrdo ancora ch'a s' pavonavo
 Con coule scirpe, e coi mantò,
 Ch'a l' ero ròbe ch' ai costavo
 Un diaschène e mè, ma nèn del sò;
 J' oimo badòla,
 Portand baciòla,
 Andavo d' vòte lor falì.
 Da li pòch tèmp a son invèntasse
 Vèste volant, e petanlèr;
 A s' guarda nèn a fè d' spesasse,
 Nè ch' 'l quajat a sia lingèr,
 E d' mèinagère
 D' mile manèr
 Con i farabalà scufi.
 Adès a pòrto dco lor le braje,
 E da gran tèmp i guardanfan,
 Ch'a smio gromo da polaje

Mòbil dle fomne dij paisan;
 Sonne pa còse
 Da fèje d'glòse,
 E dè la baja ai seu mari?
 Tute le sgnore veulo tavòta
 La tabachèra, e mòstra d'or,
 Peui bin ch'a sio sènsa dòta,
 E lingeròte com' un pòr,
 S' nò brajo, e crio,
 E tute dío,
 Ch' 'l stil a l'è così.
 A veulo fesse ciamè Madame,
 S'a fusso bin fomne d' sotror,
 E vènta vedie dè ant le fiamme
 S' ai dar' nèn coul titol d' onor,
 E damisèle
 Ste pativèle
 Ch' a stanto avèje d' pan mufi.
 Guardè pr rie ste mèse sgnore
 Marcè con so servitorat,
 D' un tèmp andavo a tute j' ore,
 Ma sènsa tanti nufia pat:
 Adès l' usansa
 L' ha cambià ciansa,
 E l' ambission pòrta così.
 S' a s' podèis dèsse là mòda neuva
 D' fesse cambiè fin' l' mostas,
 I na vedríó fè la preuva
 Da motobin, e minca pas.
 E fomne e fie
 A son parìe,
 Ch' 'l cambiamènt ai fa piassi.
 D' scarpe, e pantofle, vaire manèr
 Homne giamai vedù cambiè,
 D' sèda, damasch brocà, e bandèrè,

E d'bruna, e d'pan, e d'votornè,
 E d'bocle tante,
 Prchè galante
 Fin ant j pè veulo lusi.

Adès a s' vedo dle tovalète

Ch' a costo quaich pessià d'schin,

A son pa fave, o nos confète,

Ma bruti sgiaf al borgiachin;

E li ste sgnore

Ai spèndo j'ore

Dla matinà fin a mèsdì.

Quanta matèria, ch' ancor j'avria

Da giunse a cost componimènt,

I seu pa quand i furniria,

S' i dovèis dì minutamènt

Tuta l'istòria

Dla pompa e bòria

Ch' un vad a trionfè ogidì.

Ma son pa sòle mach le fumèle

Ch' abio ste mòde, e st' invènsion:

J' oimo n' han dco sovèns dle bèle

Nèn d' infèrior amirassion;

For ch' a s' descreuva

Quaich mòda neuva,

A na son dlongh ancarogni.

I veui però pi nèn inoltrème

A fè una neuva descrission,

Saria ròba d' anojème,

E fè tròp longa la canson:

Basta buchèje,

Ch' un peul savèje

Ch' a stan dco lor sui branch fiorì.

Ma dnans furnì, lassè ancor ch' i dia

Dontrè paròle sui gran past,

Ch' a l' è la mòda dla sgnuria

Faïta còn tanta spèisa e fast ;
 Quante portade ,
 Che spamparade
 D' vin forestè , e bocon squisi .
A j' è sautaje una dròla d' vela
 D' andè pr li sènsa capèl ,
 Portandne un stras sout al' assela
 Gnanch da argalè a un spacia-fornèl ;
 Sarà d' pièilo ,
 E d' anciodèilo
 An mès d' la schinna , o d' amburì .
Oh quanti mòbil , ch' a son pa ghné
 Bin difèrènt dai tèmp antich !
 Lèt , e burò , e tapissarie ,
 Spèc , e trèmò , ch' a fan gran spich ,
 E d' care antrèghe
 D' sofà , e cadrèghe ,
 E cadrègon , ch' a fa stupì .
A brajo tuti ch' a j' è d' misèrie ,
 : Ma tant le mòde van pa giù ,
 Ansi a sostènno ste matèrie ,
 Bin ch' a dovèisso angagè 'l mnu ;
 Ma pr mi a peulo
 Fè com' a veulo ,
 Già ch' i peus nèn fèila capì .



I Giovani innamorati.

CANZONE LIII.

Guardè un pòch, s'i veule ric,
 Costi giovo annamora,
 S'a na fan d' bagianarie,
 Dle' matèrie, e folairà,
 S'a na fan d' bagianarie,
 Dle' matèrie, e folairà.
 A comènso fè la ròn da,
 E virand antorn aj us,
 Dont a jè quaich brunna, o bionda,
 Com' j'avie antorn al bus.
 Intrà drinta, che inchinade,
 E d' sirimoniai ch' a fan,
 O pi prè d' arlichinade
 Con so brav capèl an man.
 Peui dan dl' eui a coula fia,
 E s'ij van astè d' après,
 Comènsand con soa babia
 A contèine un diaschne e mè.
 Ai na pianto dle lumète,
 Ai na dan dij boubonat,
 Ai na fan dle catlinète
 Pr tirèje al trabiciat.
 Anciodà ch' a l'han la bròca,
 E ch' a s' vedo ij bin vnù,
 Van pr vènt, pr pieuva e fiòca
 Sèmpre a fèje servitù.
 L'han peui tant loli ant la tèsta,

Ch'a van squasi fora d'lor,
 A san gnanch quand a l'è festa,
 D'vòte jèlo, o di d'lavor.
 J'un ai fan fè quaich sernada
 Pr podèisse angrassianè,
 Elo pa una bagianada
 A sgairè così i seu dnè?
 Vaire vòte stan vaitèla
 S'a va an gèsia, o s'a va a spas
 Pr podèje salutèla,
 E ciapèla sout al bras.
 Quand a peulo acompagnèla
 A quaich bal, o quaich festin,
 Stan con j' eui ala padèla
 Sèmpre arach a coul cotin.
 Ai n'è d'aitri, ch'andario
 Angagè j'orie, e i dènt
 Pr paghèje d'ragousio,
 E portèje dij prèsent.
 Gara a chi tantèis d'manère
 Da semnèje la porà:
 Che fracas, che sciapapère!
 Ai ranchrío la corà.
 Pr sospèt e gelosía,
 Vaire vòte s'è vedù
 Sti sfojor pr coula fia
 A ranchèsse 'l cheur, e 'l man?
 E sicom ai va dle greuje
 Pr podèje fè l'amor,
 E nèn comparì pr plenje,
 Ma surtisne con onor,
 A s'angigno d'raspinène
 O pr rif, o rat ant ca,
 E s'a peulo nèn gratène,
 A son bèi e dispèrà.

An tal cas a fan dij débìt,

O negossi d'carossin,

Bin ch'apès a pèrdo l'crèdit,

Ai n'impòrta pa un quattrin,

Gara peui a coula Giòja

S'ai vnèis a voltè i garat,

Ai furio lor'l bòja

Con la rabia del folat.

Pr dè ant l'eui a coula Cara,

Osservèje a caminè

Ala mòda pi bisara

Tuti costi Galinè.

O pr Giulia, o pr Gianeta

A san pa règnè ant la pèl,

E'l so cheur giamai s'achièta

Fin ch'a j'han butà l'anèl.

A sta gènt a j'andaria,

Pr guariie 'l mal ch'a l'han,

Una hrustia, o raspa, o strìa,

E gratèje 'l bufabran.



*Le Donne sgraziate per i cattivi Mariti,
o sia mal capitate.*



CANZONE LIV.

Pòvre Dòne van bin compatie
 Quand ancapito d'oimo lordon,
 L'han bèl fè, bèl toirè, bèl diè,
 Tant a pèrdo la pènnà, e'l savon;
 O ch'a ventà ch'a seufro d'ingiurie,

E ch' a tènno la bèrta ant 'l sach,
 O cianciand ai faran dè ant le furie
 Tant da fèsse butè j' os a bsach.
 Ai na jè ch' han la rèsta scrussia,
 E ch' a son bèi e bon sansosì,
 A s' ammoco quambin la famia.
 Abia pòch, e ch' a staga a patì,
 Pur ch' a peusso fè lor gaudinèta,
 E ste alèghèr ansèm aji amis,
 La soa gent a la buto an burlèta,
 E s' na curo pa pi ch' del mnis.
 Motobin son desdait a coul vissi
 D' anbronsèsse com tanti bestieù,
 Ciupinand a so gust e caprissi
 Fin ch' 'l vin veul surtie pr j' eui;
 Arivà peui a ca, che gabèle
 Con la fomna s' ai treuva da di!
 E l' ciacòt furnis con patèle,
 L' asmanach peui a marca così.
 Ai n' è d' atri inimis dla fatiga,
 Ch' ai pias tròp 'l mestè del Miclas,
 Sènsa crussi, lontan d' ogni briga,
 Veulo mach mangè, bèive, andè a spas:
 A pretèndo ch' la fomna s' amassa
 Al travai, e ch' a s' lèva la pèl,
 E lor aitr butè la bedrassa
 Sènsa avèje da rompsè 'l servèl.
 S' a l' han nèn una fomna paria,
 Sève nèn sti slurdi còsa fan?
 A s' angigno d' raspè, e portè via
 Tut dant ca lo ch' ai vèn pr le man,
 E lo vèndo, o ch' a van angagèlo
 A quaich Osto, Giudim, o Patè,
 Cost mèinagi lor s' aplico a fèlo,
 Prchè sènsa sudor fan dij dnè.

Peui a van a giughè, o divertisse
 Con d' fumèle ch' ai fan pòch onor,
 O ch' a coro sovèns a tratnisse
 Con dij safer ch' a son parai d' lot;
 Costa l' è la soa gran compania
 Ch' a dèsidero sèira e matin
 Pr. podèje sgairè an alègria,
 E fè arlan del so pòch sancrispin.

A l' avran una fomna grassiosa,
 Brava, e bèla com' un' angelat,
 Mèinagèra, modèsta, e sustosa,
 Dominà da gnun spirit folat;
 Pur coi brombo faran amississia
 Con quaich' unna pi bruta ch' la neuit,
 Mal forgià, piènna d' fum, e malissia,
 Ch' a l' avrà nè manèrè, nè deuit.
 Buchè un pòch coi tavan ch' acudisso
 Tuta quanta la smanna al travai,
 E fasènd so dovèr a cumpisso
 Bèl e bin tuti i dì i seu giornai,
 Ma sicom' a l' han mach mèsa tèsta,
 So guadagn d' sinch, o sès, o sèt dì
 A lo fan sautè tut ala fèsta,
 S' a n' avèisso tre vòte bin pi.
 Quanti ancora mach pr bisaria
 Abandonno le fomne, e masnà,
 E s' la sbigno d' ascous, e van via
 Bin lontan, o ch' a van fè'l soldà:
 Coul è un cheur, e una bènèvolènsa
 Al so sangh (oh che turch ch' a son mai!)
 L' è una còsa ch' un vad pr spèriènsa
 Gnanca fèsse dai stèss' animai.
 Tanti e tanti, marlait ch' un ij toca
 Sauto, e giuro com tanti carton,
 Una bonna paròla d' an boca.

Ai seurt mai tant sborà com'a son;
 Minca pòch van disènd d'parolasse
 Ch'a fario scapè fin i can,
 Le pi spòrche, sacrileghe, e grasse,
 Coul'è 'l so bon esèmpi ch'a dan.
 Coule fòmne ch'a l'han costi tuso
 D'un umor stravagant e mutin,
 E ch'a s' vedo tavòta fè 'l muso,
 E d'ojas, com'a fan i mastin,
 Coula ancor l'è una gran pènitàsa,
 E una cros ch'a l'è grèva a portè,
 Pur a vènta ch'a l'abio pasiènsa,
 E pr'forsa sufri coi mortè.
 Coi brdovia ch'a van atachèsse
 A j' imprèse, nègossi, e contrat,
 Ma sicom'a san pa mènagèsse,
 Fan dij boro, e spropòsit da mat,
 E la fòmna, marlait ch'a s'ampacia,
 E ch'a veuja trovèje da di,
 Ai daran dij sgrognon su la pacia,
 O pr'grassia la mardo a durmì.
 Vaire sonne ch'a l'han dla fiolansa,
 Ch'a l'anlèvo pur tròp mal e pès
 Con gnun deuit, nè virtù, nè crèansa,
 Nè timor, prchè ai guardo pa après,
 E le mare, s'a veulo butèje
 Su la strà da portèje a bon fin,
 Costi pare fan nèn ch'armognèje
 Dala seira fin ala matin.
 Che desgrassia pr'coste meschinne
 Quand a dan ant un omo gelos,
 Coul'è un vive tavòta ant le spinne
 Ch'a peul nèn esse pi doloros;
 A son gnanca patronne a descòre
 Con quaich giovo, o quaich òm maridà,

Sotopòste a ciapè tute j' ore
 Quaich verlèra da coui mal fidà.
 Ma vèntralo peni fòrsi ch' i passo
 Pr bardèt cost e coul ganivèl,
 Ch' acaresso la fomna, e l' ambrasso
 Pr rusièje la dòta, e 'l fardèl?
 Consumà ch' a j' han coula sos'ansa,
 E ch' a j' è pa pi nèn da fè sfars,
 A la buco con mal ala pansa
 Com' un tros, o rusi d' un pom-mars.
 Quand a capito d' esse malavie
 Pr desgust, pr desgrassia, o pr stènt,
 O ch' a son ant' l' numèr dle gravie,
 Andario tratà diferènt;
 Ma coui rustich ch' han pèrs 'l giudissi,
 E ch' a son mal grassios, e brandè,
 A s' na pio pa vaire caprissi,
 E ch' a crpo s' a veulo crpè.
 L' han rason a piorè ste fumèle
 Ch' a l' han d' oimo così intèressà,
 Ch' a van squasi mostrand le buèle,
 Mal vestie, descausse, e strassà;
 Mā con costi atacà a l' intèresse,
 E ch' a l' han nè vergògna, nè onor,
 L' han pro bèl tut 'l dì lamèntèsse,
 A son ciòrgn, e pi dur ch' un strompor.
 D' aitri tènnò le fomne sogète
 Com' i can da pajè atacà al las,
 Bin ch' a passo pr brave, e pr chiète,
 Tant ai veulo concède gnun spàs;
 A t' i tènnò lì d' una manèra
 Com sa fusso servènte, o masnà,
 A l' han por ch' l' aria ai guasta la cèra,
 O ch' a vado pr lì fè 'l marcà.

Quand ai vâin fè l'âmôr pr' sposèje,
 Ai fan 'sènt mile bonne rason,
 Prià ch' a j' han, stan pa vaire a plinèje,
 O lassèje pr là ant un canton,
 Prchè prèst a comènso stoflèsne,
 E guardèje com fa' l can 'l gat,
 E s' a s' dèis ch' a podèisso desfèsne,
 A pagriò quaicòsa sul pat.
 Te fè, ch' j' avì tanta veuja,
 E 'l gatij d' esse prèst maridà,
 Bin eh' 'l sangh ant le vènne av beuja,
 Aspetè d' esse bin anformà,
 Prchè d' vòte podria arivève
 D' incontrène quaicun ancor pès
 Dlo ch' i v' abia savù racontève,
 E peui fève burlè ancor après.



CON PERMISSIONE

die

10

die

10

10

